

O Le Liahona


**O Le Auala e Mafai Ai E
Le Faamasino Tonu ma le
Alofa Mutimutivale ona
Faasaolotoina i Tatou mai
le Pologa, i. 20**

**O Le Ala e Galue Moni ai
le Alofa Tunoa o le Atua,
i. 42**

**O Le A La Le Mea e Sili Ai
le Fale Tele ma le Ateatea? i. 48**

**Tamaiti, o Lau Faataitaiga
e Faia ai se Eseesega, i. 67, 71**





*"Ae o se inu i le
vai ou te avatu
ia te ia e inu e
le toe fia inu
ia, a o le vai ou
te avatu ia te
ia . . . e puna
i luga i le ola
e faavavau."*

Ioane 4:14

O Le Liahona, Setema 2013



26

O SAVALI

- 4 **Savali a le Au Peresitene Sili: O Le Au Paia mo Vaitau Uma**
Saunia e Peresitene Dieter F. Uchtdorf
- 7 **Savali a Faiaoga Asiasi: Faalagolago o le Tagata ia te la Lava**

TALA FAAALIA

- 18 **O A'u Tatalo o le Lotofaafetai**
Saunia e Christie Skrinak
Sa manaomia tele e lo matou aiga faamanuiaga. E mafai faapefea ona ou maua le lotofaafetai a o'uu oo ai i nei tofotofoga?
- 20 **O Le Faamasinoga Tonu ma le Alofa Mutimutivale o le Atua**
Saunia e Elder Jeffrey R. Holland
Afai e mafai ona tatou salamo i a tatou agasala ma ia alofa i isi ua agasala, o le a aapa mai i lalo le Tama soifua o i tatou uma e sapasapai tatou i luga.

I LE FAAVAA

Luma: *O Le Tamai Mamoe na Leiloa*, saunia e Newell Convers Wyeth, toelolomiina i le faatagaga a le Falemataaga o Faatufugaga a le Kolisi o Colby. Tua: ata na pueina e © Thinkstock. Totonu o le faavaa pito i luma: ata na pueina e Chelsea Stark.

26 Alofa Mutimutivale Faa-Keriso

Saunia e Randy L. Daybell
E mafai e nei tala faatusi paia mai le soifuaga o le Faaoala ona aaoaina i tatou i auala e maua ai le alofa mutimutivale.

30 E Faapefea ona Faamautuina Aoaoga Faavae?

Saunia e LaRene Porter Gaunt
Faaaoga lenei siatafaasolo ina ia malamalamama atili ai e uiga i le auala e faaali mai ai e le Atua ia aoaoga faavae i perofeta ma aposetolo.

32 E Manaomia e Alii Talavou o Aso Nei Ni Faataitaiga Amiotonu

Saunia e Hikari Loftus
I le feagai ai ma lona lava talavou faigata, ua taumafai nei Todd Sylvester e aapa atu i alii talavou o aso nei

36 Avea Pea O se Valaau Malosi

Saunia e Richard M. Romney
"O Le Aiga, O Se Folafolaga i le Lalolagi" ua avea ma autu o le saolotoga, e maua ai le manino ma le taitaiga i aiga.

MATAGALUEGA

- 8 **Tusigāmanatu Konafesi Aperila 2013**
- 10 **O Le Mea Tatou Te Talitonu I Ai: E Tatau Ona Faaaogaina ma le Agavaa le Perisitua**
- 12 **O Tatou Aiga, O Tatou Auaiga: E Lei Avaavau Mai Lava le Alii ia te Au**
Taofia le igoa
- 14 **Tala Faamamai o le Talalelei: O Le A Le Uiga o Iesu ia i Tatou i Aso Nei?**
Saunia e Elder David B. Haight
- 16 **Tala Fou o le Ekalesia**
- 38 **O Leo o le Au Paia o Aso e Gata Ai**
- 80 **Seia Tatou Toe Feiloai: O Le Sauniga Faamanatuga Aupito Umi**
Saunia e Okon Edet Effiong

42

**42 Ua Lava Lona Alofa Tunoa**

Saunia e Brad Wilcox

O le wavega o le alofa tunoa o Keriso e le faapea e na o le mafai ona tatou toe foi i le lag i ae e mafai ona suia ai i tatou ina ia tatou lagonaina le i ai i le aiga ina.



Vaai pe mafai ona e mauaina le Liahona o loo natia i le lomiga lenei. Faa-iteite: Na asia e Iesu tagata i Amerika.



52

46 O Laasaga i le Fifia

Saunia e Elder D. Todd Christofferson
Pe a tatou malamalama i le faamoemoega o poloaiga, o le a tatou mananao atili ai i ni isi poloaiga—ae le o le faaititia.

48 O Le A La Le Mea e Sili Ai le Fale Tele ma le Ateatea?

Saunia e Dennis C. Gaunt

52 Ia Avea ma se Malamalama i Au Uo

Saunia e Elder Benjamín De Hoyos
O le galuega faafeautalai e amata i se faataitaiga lelei.

54 Tuusao i le Mataupu**56 Mo Le Malosi o le Autalavou: O Faatosinaga a Musika**

Saunia e Rosemary M. Wixom
O le a se mea e mafai ona aoao mai e isumu ia i tatou e uiga i le filifilia o musika lelei?

58 O se Tatalo o Lo'u Loto

Saunia e Ma. Consuelo N.
Sa fesoasoani fetalaiga a le Alii ou te fiafia atili ai i musika.

59 Pepa Lautele o I Ai se Savali: Faaoso Lou Lumanai**60 Mai le Misiona:****E Ala i Puipui Manifinifi**

Saunia e Monica Garcia Adams
Sa le na o Soledad na faalogo; sa faalologologo mai foi ia Juan i le isi itu o le puipui.

62 Aoao mai Perofeta Soifua

Saunia e Elder Neil L. Andersen
O fesili nei e fa e mafai ona fesoasoani ia te oe e mulimuli ai i le perofeta.

64

**64 Tusi la Sa'o**

Saunia e Jan Pinborough

Na fai mai le faiaoga a Kara, o le Tama Faalelagi, o Iesu Keriso, ma le Agaga Paia o le tagata e toatasi. O le a se tala e mafai ona fai e Kara?

66 Pese: Iesu o Lo'u Leoleo Mamoe

Saunia e Tammy Simister Robinson

67 Faataitaiga Faamaoni

Saunia e Jean A. Stevens

O le faataitaiga a nei tamaiti o le Peraimeri i Hong Kong na fesoasoani ai i tagata o la latou uarota ia maua le faatuatua e ola ai i le talalelei.

68 I le Auala: O Le Malumalu o Navu ma le Falepuipui o Karesasi

Saunia e Jennifer Maddy

70 Molima Faapitoa: Aisea e taua ai le i ai uma o le Tusi Paia ma le Tusi a Mamona?

Saunia e Elder L. Tom Perry

71 Sa Ou Filifilia le Mea Sa'o

Saunia e Ekene B.

Ou te lei manao e inu le uaina, ae o le a se mea e tupu i lo'u aiga pe afai ou te lei inuina?

72 O La Tatou Itulau**74 Aumaia o le Peraimeri i le Fale: O Le a Ou Auauna atu i le Atua ma Lou Loto Atoa, Manatu, Mafaufau, ma le Malosi****76 Mo Tamaiti Laiti****81 Atatosi o le Perofeta: Siaosi Alapati Samita****FAASA'OGA**

Matou te faamalulu atu ona o se mea sese i "Kata o Mau" o loo i itula e 65–66 o le lomiga o Aokuso. O mau mo le kata "Pe a ou lagonaina le fiafia . . ." o le Salamo 118:24; Ioane 13:17; ma le Alema 26:35. O mau mo le kata "Pe a ou manaomia le lototeli . . ." o le Tanieli 6; 1 Nifae 3:7; ma le Alema 56:44–48. E mafai ona lolomiina ia itulau ia ua uma ona faasa'oina mai le liahona.lds.org.



Saunia e Peresitene
Dieter F. Uchtdorf

Fesoasoani Lua i le Au
Peresitene Sili

O Le Au Paia

MO VAITAU UMA



Ei ai ni mea ou te manatua i lo'u laitiiti o se vaega o le lalolagi e mafai ona avea ma se ata o se kata e lafo i le meli mo vaitau fesuisuiai o le tausaga. E mamalu ma matagofie masina taitasi e sau ma mou atu. I se aso matagofie naua o le taumalulu, sa faapulou ai e le kiona momosi ia atumauga ma magaala o le aai. Na aumaia e le tautotogo timuga faamama ma le fotu a'e naua o le ola lanlauava. Na avea ia lagi gase o le taumafanafana o se tapoleni lanumoana matagofie mo le mutigitigi o se la susulu. Ma o le tautoulu mata'ina na liuaina le natura e avea ma atalafoia feilafi o le lanumoli, samasama ma le lanumumu. Ao ou tamaititi, sa ou fiafia i vaitau taitasi, ma e oo mai i lenei aso, ou te fiafia i uiga ma le tulagaese o vaitau taitasi.

Ua i ai foi ni vaitau i o tatou olaga. O nisi e mafanafana ma faafiafaina. O isi e leai. O nisi o aso i o tatou olaga e matagofie e pei o ni ata i se kalena. Ae e i ai foi aso ma tulaga e mafua ai le lototiga ma e ono aumaia ai i o tatou olaga ni lagona loloto o le faanoanoa, inoino, ma le ita.

Ou te mautinoa sa i ai se taimi sa tatou mafaufau uma ai lava e manaia le nofo i se lauelele e na o aso o vaitau o ata atoatoa e faatumulia ai ma aloese ai mai taimi lē fiafia i va o ia vaitau.

Peitai, e le mafai. E le manaomia foi.

A o ou vaavaai atu i lo'u lava olaga, ua manino ai lava o le tele o taimi o le tuputupu ae aupito maoae, na oo mai ia te au a o ou uia vaitau matagiā.

Na silafia e lo tatou Tama Faalelagi ua i ai le poto uma, ina ia tuputupu a'e Ana fanau ia avea ma tagata na

mamanu i latou ia avea ai, o le a manaomia ona latou oo i vaitau o faigata i le taimi o lo latou olaga faaletino. Fai mai le perofeta o le Tusi a Mamona o Liae a aunoa ma mea faafeagai, “e le mafai ona i ai o le amiontonu” (2 Nifae 2:11). O le mea moni, o le oona o le olaga e mafai ai ona tatou iloa, faatusatusa, ma talisapaia lona suamalie (tagai MF&F 29:39; Mose 6:55).

Ua faaupu e Peresitene Polika Iaga i le ala lenei: “O tagata atamamai uma e faapaleina i palealii o le mamalu, tino ola pea ma le olaga e faavavau e tatau ona laasia puapuaga uma na atofaina mo tagata atamamai e laasia, ina ia maua ai lo latou mamalu ma le faaeaga. O mala uma e mafai ona oo mai i luga o tagata ola o le a puapuagatia ai . . . e saunia ai i latou e olioli i le afioaga o le Alii. . . . O tofotofoga ma aafiaga uma e te laasiaina ua tatau ai mo lou faaolataga.”¹

O le fesili e le o le, pe o le a tatou oo i vaitau o faigata ae o le, pe faapefea ona tatou tatalia ia afā. O lo tatou avanoa sili i le taimi o vaitau fesuisui'a'i o le olaga o le pipiimau lea i le afioga faamaoni a le Atua, aua o Lana fautuaga ua mamanuina e le gata ina ia fesoasoani ia i tatou e tatalia ai afā o le olaga ae faapea foi ona taiatalaina ai i tatou ia manumalo ai. Ua tuuina mai e lo tatou Tama Faalelagi Lana afioga e auala mai i Ana perofeta—o le malamalamalama taua lea ua mamanuina e taitaia i tatou e ui atu i luitau o vaitau faigata e agai atu i le olioli e le mafaa-matalaina ma le malamalamalama susulu o le ola e faavavau. O se vaega taua o le aafiaga o o tatou olaga le atiina ae o



le malosi, lototele, ma le amiosa'o e pipiimau ai i le upumoni ma le amiontonu e tusa lava po o a fesouaiga tatou te oo i ai.

O i latou ua ulu ifo i le vai o le papatisoga ma mauaina le meaalofa o le Agaga Paia ua tutu o latou vae i luga o le ala o le avea ma soo ma ua poloaiina ai e mulimuli mausali ma le faamaoni i tulagaaao o lo tatou Faaola.

Na aoao mai e le Faaola e oso a'e le la "i e ua amioleaga atoa ma e ua amiolelei, ma le . . . ua [e to ifo] i e ua amiontonu ma e ua amioletonu" (Mataio 5:45). O nisi taimi tatou te le malamalama pe aisea e tutupu ai ni mea faigata, pe le talafeagai, i le olaga. Ae i le avea ai ma soo o Keriso, tatou te faatuatuaina afai tatou te "saili ma le filiga, tatalo e le aunoa, ma ia talitonu, . . . o le a galulue faatasi mea uma mo lo [tatou] lelei, *pe afai* [tatou] te savavali sao" (MF&F 90:24; ua faaopoopo le faamamafa).

I le avea ai ma tagata o Lana Ekalesia, o le Au Paia, tatou te auauna atu ma le fiafia ma le naunautai i

soo se tau ma vaitau uma. Ma a o tatou faia faapea, o le a faatumulia o tatou loto i le faatuatua paia, faamoe-moe faamalolo, ma le alofa mama faalelagi.

Ae, e tatau lava ona tatou uia vaitau uma—o taimi fiafia ma taimi tiga. Ae po o le a lava le vaitau, i le avea ai ma soo o Jesu Keriso, o le a tumau lo tatou faamoemoe ia te Ia pe a tatou savavali atu i Lona malamalama.

O le otootoga, o i tatou o le Au Paia a le Atua, ua naunau e aoao ia te Ia,

ia alolofa ia te Ia, ma alolofa i o tatou uso a tagata. O i tatou o tagata malaga i luga o le auala faamanuiaina o le avea ma soo, ma o le a tatou savavali ma le mausali e agai atu i la tatou sini faalelagi.

O le mea lea, ia avea i tatou ma Au Paia i le tautotogo, taumafanafana, tautoulu, ma le taumalulu. Ia avea i tatou ma Au Paia mo vaitau uma. ■

FAAMATALAGA

1. *Aoaoga a Peresitene o le Ekalesia: Polika Iaga* (1997), 261–62.

AOAO ATU MAI LENEI SAVALI

Ua aoao mai le Au Peresitene Sili, "O nisi o lauga aupito maoae o loo talai-ina e ala i le lagii o viiga" (*Viiga*, ix). A o outou talanoaina lenei savali, mafaufau e usu faatasi ma i latou tou te aoaoina se tasi o nei viiga po o se isi pese e uiga i le onosaia o faigata: "Le Faavae Malosi" (nu. 45); "O Le Alii o Lo'u Leoleo Mamoe" (nu. 60); po o le "Faamalosi ia i le Galuega Nei" (nu. 152). Afai e te lagona le uunaiga, faasoa atu se taimi na avea ai se vaitau matagiā i lou olaga o se faamanuiaga.



Sa Mafai ona Ou Faagalo Lo'u Faanoanoa

Saunia e Juan Zhu

Ina ua papatisoina au uo o Uso Chen ma lona faletua i totonu o la matou uarota, sa ou matuai fiafia lava. I se tausaga talu ona mavae lo latou papatisoga, na faamauina ai i latou i le malumalu, ma sa faamauina lo la atalii ia i laua lea na maliu ae latou te lei auai i le Ekalesia. Sa matagofie le vaai atu i le Au Chens o tuputupu ae i le talalelei.

Ona maliu lea o Uso Chen i se faalavelave tau taavale i le tausaga na sosoo ai. Ina ua mavae le faalavelave, sa foliga mai ua i ai pea lona maliu i taimi uma i lo'u mafaufau ma ua tele ina taufaafefe i a'u miti. Sa ou ala ae i loimata ma tuufesili pea lava pea, "Aisea? Aisea e faatagaina ai e le Alii lenei ituiga o faalavelave e tupu? Aisea ua tupu ai lea mea faapea i lenei aiga matagofie?" I se tasi aso a o ou tauivi ma nei fesili, sa ou tago ai i se tusi lesona ma faitau i upu nei mai ia Peresitene Spencer W. Kimball (1895–1985):

"Afai tatou te vaavaai i le olaga faaletino o le soifuga atoa lava lea, o tiga, faanoanoaga, toilalo, ma le puupuu o le soifua o le a avea ma mala. Ae afai tatou te vaavaai i le olaga o se mea e faavavau e oo mamao atu i tua i le muai olaga ma oo atu ai i le lumanai pe a mavae le oti, ona mafai lea ona tuu uma mea e tutupu i se vaaiga tatau. . . .

"Pe tatou te le oo ea i faaososoga e tofotofo ai lo tatou malosi, o ma'i ina ia tatou aoao ai le onosai, o le oti foi ina ia mafai ai ona maua le tino ola pea ma le faamamaluina?"¹

O le taimi lena, sa ou filifili ai e faagalo lo'u faanoanoa ma vaai atu i le lumanai folafolaina e mafai ona maua. Sa ou vaai faalemafaufau i le toefaatasia fiafia o Uso Chen ma lona aiga. O lena vaaiga na aumaia ia te au le filemu. Ou te iloa o le a aumai ia i tatou e le Tama Faalelagi le poto ma le lototele e feagai ai ma faigata.


O le tusitala e sau mai Taiuani.

FAAMATALAGA

1. *Aoaoga a Peresitene o le Ekalesia: Spencer W. Kimball* (2006), 15.

Auauna atu i Vaitau Uma

Ua aoao mai Peresitene Uchtdorf e tatau ona tatou "auauna atu ma le fiafia ma le naunautai i soo setau ma i vaitau uma." I ata o i lalo, o loo faaaoga ai e tamaiti mea faitino mai vaitau eseese e auauna atu ai i isi. Faafetaui le mea faitino o loo i le koluma taumatau i lona ata o i le koluma agavale.



Suesue ma le agaga tatalo i mea nei, ma pe a talafeagai ai, ia talanoaina faatasi ma uso e te asia. Faaoga fesili e fesoasoani ai ta te oe e faamalolosia ai ou uso ma avea ai le Aualofa ma se vaega malosi o lou lava olaga. Mo nisi faamatalaga, alu i le reliefsoociety.lds.org.

Faalagolago o le Tagata la te la Lava

Ole faalagolago o le tagata ia te ia lava o le tomai lea, tautinoga, ma o se taumafaiga ina ia saunia mo le manuia faaleagaga ma faaletino o i tatou lava ma o tatou aiga.¹

A o tatou aoao ma faaaoga mataupu faavae o le ola faalagolago o le tagata ia te ia lava i o tatou aiga ma nuu, ua tatou maua ai avanoa e tausia ai e matitiva ma e le tagolima, ma fesoasoani ai i isi ia ola faalagolago ia i latou lava, ina ia mafai ai ona latou onosaia taimi o faigata.

Ua tatou maua le avanoa ma le tiute e faaaoga ai lo tatou faitalia e ola faalagolago ai le tagata ia te ia lava faaleagaga ma faaletino. I le saunoa ai e uiga i le ola faalagolago o le tagata lava ia faaleagaga ma lo tatou faalagolago i le Tama Faalelagi, na aoao mai ai Elder Robert D. Hales o le Korama a Apostolo e Toasefululua e faapea: “E liua i tatou ma ola faalagolago ai le tagata ia te ia lava faaleagaga pe a tatou ola ma le agaga tatalo ia tatou feagaiga—e ala i le aai ma feinu ma le tatau i le faamanatuga, agavaa mo se pepa faataga o le malumalu, ma ositaulaga e auauna atu i isi.”²

Ua fautuaina i tatou e Elder Hales ia ola faalagolago le tagata ia te ia lava i le faaletino, “lea e aofia ai le aoga i le iunivesite po o le aotauina faalematata, aoao e galue, ma le ola ai e tusa ma mea tatou te maua. E ala i le aloese mai le aitalafu ma teu ni tupe i le taimi nei,



tatou te saunia ai mo auaunaga tumau i le Ekalesia i le olaga atoa i tausaga o lumanai. O le faamoemoega o le ola faalagolago o le tagata ia te ia lava faaletino ma faaleagaga o le ave lea o i tatou lava ia tutu i ni tulaga maualuluga, ina ia mafai ai ona tatou siitia i luga isi o pagatia.³

Mai Tusitusiga Paia

Mataio 25: 1–13; 1 Timoteo 5:8; Alema 34:27–28; Mataupu Faavae ma Feagaiga 44:6; 58:26–29; 88: 118

FAAMATALAGA

1. Tagai *Tusitalima 2: Taitaiina o le Ekalesia* (2010), 6.1.1.
2. Robert D. Hales, “O Le Manatuaina Pe O Ai i Tatou: O Le Faamanatuga, o le Malumalu, ma le Ositaulaga e Ala i le Auauna Atu,” *Liahona*, Me 2012, 34.
3. Robert D. Hales, “O Le Manatuaina Pe O Ai i Tatou,” 36.
4. Tagai *O Afafine i Lo'u Malo: O Le Talafaasolopito ma le Galuega a le Aualofa* (2011), 51.

O Le A se Mea e Mafai Ona Ou Faia?

1. O faapefea ona ou fesoasoani i uso o loo ou vaavaaia ia maua ni fofo i o latou manaoga faaletino ma faaleagaga?
2. O ou faateleina lo'u ola faalagolago ia te au lava faaleagaga e ala i le saunia mo le faamanatuga ma ositaulaga e auauna atu?

Faatuatua, Aiga,
Toomaga



Mai Io Tatou Talafaasolopito

Ina ua maea ona faapoto-poto le Au Paia o Aso e Gata Ai i le Vanu o Sate Leki, o se toafa mamao ese, sa manao ai Peresitene Polika laga ia i latou ia uluola ma atiae ni aiga tumau. O lona uiga sa manaomia e le Au Paia ona aoaoina ni tomai o le a faatagaina ai i latou e avea ma tagata ola tutoatasi. I lenei tau-mafaiga, na matuai faatuatuaaina ai e Peresitene laga ia malosiaga, taleni, faamaoni, ma le naunau-taiga o tamaitai, ma sa ia uunaia i latou i tiute maoti faaletino. E ui e tele lava ina eseese ia tiute maoti o le usoga a le Aualofa i le taimi nei, ae e tumau pea ia mataupu faavae e le sua:

1. Aoao ia fafia e galue ae aloese mai le paie.
2. Ia maua se agaga o le ositaulaga o oe lava ia.
3. Ia talia le tiutetauave patino mo le malosiaga faaleagaga, soifua malolina, aoaoga, galuega, tupo, meaai, ma isi mea e tatau ai mo le tausiga o le ola.
4. Tatalo mo le faatuatua ma le lototele e fetaiai ai ma luitau.
5. Faamalolosia isi o e manao-mia le fesoasoani.⁴

TUSIGĀMANATU KONAFESI APERILA 2013

“O le mea ua fai atu ai A’u o le Alii, ua Ou fai atu ai; . . . pe i lo’u lava leo po o i le leo o a’u auauna, ua tutusa lava” (MF&F 1:38).

A o e iloiloina le konafesi aoao ia Aperila 2013, e mafai ona e faaaogaina nei itulau (ma Tusigāmanatu o le Konafesi i lomiga i le lumanai) e fesoasoani ai ia te oe e suesue ma faaaoga aoaoga talu ai nei a perofeta soifua ma aposetolo ma isi taitai o le Ekalesia.

TALA MAI LE KONAFESI

O Se Malamalama i Aferika

Saunia e Peresitene

Dieter F. Uchtdorf

Fesoasoani Lua i le Au Peresitene Sili

Ini nai tausaga talu ai, sa ma maua ai ma lo’u toalua o Harriet se aafiaga e le faagaloina lea na ma vaaia ai le faataunuina o lenei folafolaga. Sa ma i ai i Aferika i Sisifo, o se vaega matagofie o le lalolagi lea sa tuputupu ae ai le Ekalesia ma fiafia ai le Au Paia o Aso e Gata Ai. Peitai, e anoanoai foi luitau i Aferika i Sisifo. Aemaise lava, sa ou faanoanoa i le mativa sa ou vaaia. I aai, e anoanoai e e leai ni galuega, ma e tele lava na tauivi aiga e saunia mea e manaomia i aso uma faapea ai ma lo latou saogalemu. Sa momomo lou loto i le iloaina o le toatele o o tatou tagata faapelepele o le Ekalesia o loo ola i ia tulaga mativa. Ae sa ou iloa ai foi o nei lava tagata lelei o loo fesoasoani le tasi i le isi ina ia faamama i a latou avega mamafa.

Sa mulimuli ane matou taunu i se tasi o a tatou falelotu e latalata i se aai tele. Ae nai lo le mauaina o se nuu o mafatia ma faavaivavaia e le

Ina ia faitau, matamata, pe faalogologo foi i lauga o le konafesi aoao, asiasi ane i le conference.lds.org.



ATA NA TUSIA E RICHARD M. ROMNEY

pogisa, sa matou maua atu se nuu fiafia o e sa susulu i le malamalama! O le fiafia na latou lagonaina mo le talalelei na matou aafia ai ma siitia ai o matou agaga. Sa latou faailoa mai se alofa faamaualalo mo i matou. O o latou fofoga fiafia na matou fiafia ai foi.

Ou te manatua sa ou tau mafau-fau i lena taimi pe faamata o i ai nisi tagata o fiafia atu i lo latou nei i luga o le paneta. E ui na siomia nei Au Paia pele i faigata ma tofotofoga, ae sa faatumulia i latou i le malamalama!

Na amata le sauniga, ma amata ona ou lauga. Ae e lei pine ae pe le eletise i le fale, ma tuua ai matou i se pogisa atoa.

Mo sina taimi sa le mafai ona ou vaai atu i se tasi i le faapotopotoga,

ae na mafai ona ua ou vaaia ma lagonaina ia lau fofoga fiafia susulu ma matagofie a o tatou Au Paia. Oka sou fiafia tele e faatasi ma nei tagata lelei!

Sa faaauau pea ona pogisa le falelotu, ma o lea sa ou nofo ifo ai i talaane o lou toalua ma faatalitali mo le eletise e toe ola mai. A o matou faatali, sa tupu se mea ofoofogia.

Sa amata ona usuina e ni nai leo se tasi o viiga o le Toefuataiga. Ona pepese atu ai lea ma isi. Ma faaopoopo ai ma isi. E le i pine ae faatumulia le falelotu i pesega malu ma faagaeetia.

Sa lei manaomia e nei tagata o le Ekalesia ni tusipese; sa latou iloaina upu uma o viiga uma na latou usuina. Ma sa latou lagiina lea pese ma lea pese i se malosi ma se agaga na ootia ai lo’u agaga.

Mulimuli ane, na toe momu mai moli ma lilofoia ai le potu i le malamalama. Sa ma fetilofa'i ma Harriet i le tasi ma le isi, a o susu o ma alafau i loimata.

I le lotolotoi ai o le pogisa tele, na faatumulia ai e nei Au Paia matagofie ma le ofoo fogia lenei fale o le Ekalesia ma o matou agaga i le malamalama.

O se aafiaga o'oo'o tele lea mo i maua—o se mea o le a le galu lava ia i maua ma Harriet.

Mai le "O Le Faamoemoe o le Malamalama o le Atua," *Liahona*, Me 2013, 76.

FESILI E MANATUNATU LOLOTO I AI

- E mafai faapefea ona e tatalaina ou mata i le faamoemoe o le malamalama o le Atua?
- E mafai faapefea i le mulimuli i tulagaaao o lesu Keriso ona fesoasoani ia te oe e savali i Lona malamalama?
- O a ni suiga e manaomia ona e faia ina ia lagona atili atoatoa ai le malamalama o le talalelei?

Mafaufau e tusi ou mafaufauga i lau api talaaga pe talanoaina foi ma isi.

Punaoa faaopoopo i lenei autu: *Mata-upu Faavae o le Talalelei* (2009), "O Le Agaga Paia," 32–34; Autu o le Talalelei i le LDS.org, "Faamoemoe," "Agaga Paia"; Dieter F. Uchtdorf, "O Le Mana e Le l'u o le Faamoemoe," *Liahona*, Nov. 2008, 21–24.

O UPU A PEROFETA E UIGA I VAIVAIGA FAALETAGATA

"I lenei Ekalesia, o le mea ua tatou iloa o le a sili atu ona taua i taimi uma nai lo mea tatou te le o iloa. Ma ia manatua, i lenei lalolagi, ua ao lava ona savavali tagata uma i le faatuatua.

"O le mea lea ia agalelei ona o vaivaiga faaletagata—o ou vaivaiga faapea foi vaivaiga o i latou tou te galulue faatasi i se Ekalesia o loo taitaia e alii ma tamaitai e galulue fua. Vagana ai i le tulaga o Lona Alo Pele e Toatas e atoatoa, na o tagata lē atoatoa lava sa galue ai le Atua. Ai lava se faigata tele ia te la, ae na la taulimaina lava. E tatau foi la ia i tatou. . . . O le mea lea ia onosai ma agalelei ma loto faamagalo."

Elder Jeffrey R. Holland o le Korama a Apostolo o Toasefululua, "Le Alii e, Ua Ou Faatuatua," *Liahona*, Me 2013, 94.

O LE PAIA O LE FAAIPOIPOGA

"O le poloaiga ia fanafanau ma ululuola ma ia tumu ai le lalolagi, o loo tumau pea e oo mai i le taimi nei. O le mea lea, o le faaipoiopoga i le va o le tane ma se tamaitai o le alafua faata-gaina lea, e ulufale mai ai agaga o le muai olaga i le olaga nei. O le faafitia atoatoa o feusuaga a o lei faaipoiopo ma le faamaoni a'ia'i i totonu o le faaipoiopoga, e puipuia ai le paia a'ia'i o lenei alafua paia."

Elder David A. Bednar o le Korama a Apostolo e Toasefululua, "Matou Te Talitonu i le Nofomama," *Liahona*, Me 2013, 42.

O TALI MO OE

O konafesi taitasi, ua tuu atu ai e perofeta ma aposetolo ni tali mo ni fesili o ono i ai a tagata o le Ekalesia. Faaaoga lau lomiga o le konafesi pe asiasi i le conference.lds.org e saili ai tali i fesili nei:

- E faapefea ona tumau lo'u malosi pe a tauemuina a'u mo o'u talitonuga? Tagai ia Robert D. Hales, "Tutu Malolosi i Nofoaga Paia," 48.
- O le a se mea e mafai ona ou faia pe afai o se tasi ou te alofa i ai o loo faia ni filifiliga leaga? Tagai Henry B. Eyring, "O Mai ia te Au," 22; ma Richard G. Scott, "Mo Le Filemu i le Aiga," 29.
- Aisea e taua tele ai le faaipoiopoga i le va o se alii ma se tamaitai? Tagai David A. Bednar, "Matou Te Talitonu i le Nofomama," 41; L. Whitney Clayton, "Faaipoipoga: Matau ma Aoao," 83; ma L. Tom Perry, "O Le Usiusitai i le Tulafono o le Saolotoga Lea," 86.
- O le a le faamoemoega o le perisitua? Tagai M. Russell Ballard, "O La'u Galuega ma Lo'u Mamalu Lenei," 18.
- Aisea tatou te manaomia ai se lotu? Tagai Quentin L. Cook, "Filemu o le Tagata lava la: O Le Taui lea o le Amiontonu," 32; ma D. Todd Christofferson, "Togiola," 109.

E TATAU ONA FAAAOOGAINA MA LE AGAVAA LE PERISITUA

Ua tuuina mai e le Tama faalelagi se vaega o Lona mana ma le pule i alii agavaa o le Ekalesia. O lenei pule faamatuu ua ta'ua o le perisitua. Ua faatagaina i latou o e umia le perisitua e galulue i le suafa o le Alii i le tai-taia o Lana Ekalesia, aoaoina atu o le talalelei, faamanuiaina o e mamai, ma le faataunuui o sauniga paia e tatau ai mo le faaolataga.

O le perisitua e tatau ona faaaogaina ma le agavaa aua, e pei ona faaali atu e le Alii ia Iosefa Samita, "o aia o le perisitua ua fesootai e le mavavae-eseina ma mana o le lagi, ma o mana

o le lagi e le mafai ona pulea pe faaaogaina tau lava i mataupu autu o le amiotonu" (MF&F 121:36). O lea la, o loo i ai se eseesege i le va o le pule ma le mana o le perisitua. "O le pule o le perisitua, o le pule lea e galue ai i le suafa o le Atua, . . . e tuuina atu e ala i le faaee atu o lima. O le mana o le perisitua e na o le pau le taimi e oo mai ai pe a faatinoina e i latou e agavaa ma galulue e tusa ma le finagalo o le Atua."¹

Talu ai o le perisitua o le mana o le Atua, o lea ua Ia faatuina ai tulaga faatonuina o le agavaa mo

lona faaaogaina ma ua faaalia mai na tulaga faatonuina i Ana perofeta ma aposetolo. E agavaa e umia le perisitua pe a salamo i a latou agasala ma ola e tusa ma le talalelei atoa ai ma poloaiga a Iesu Keriso. E mafai ona fesoasoani le mafutaga a le Agaga Paia i o latou olaga ia latou iloa ai lo latou agavaa. ■

Mo nisi faamatalaga, tagai Mataupu Faavae ma Feagaiga 121:34–46; Thomas S. Monson, "Mano o le Perisitua," *Liahona*, Me 2011, 66–69.

FAAMATALAGA

1. M. Russell Ballard, "O La'u Galuega ma Lo'u Mamalu Lenei," *Liahona*, Me 2013, 18–19.

MALUPUIPUIA MA OLA AGAVAA MO LE PERISITUA



"O a tatou amioga i nofoaga faitele e le tatau ona faitioina. O a tatou amioga i nofoaga le faalauaiteleina e sili atu ona taua. E tatau ona manino i tulaga faatonuina ua faatulagaina e le Alii. E le mafai ona tatou faalolololo i le agasala, pe taumafai foi e ufiufi a tatou agasala. E le mafai ona tatou faamalieina

lo tatou faamaualuga. E le mafai ona tatou faaaogaina le fialauiloa le aoga ma le amioletonu. E le mafai ona faaaoga le pule, po o puleaga, po o le faamalosi i luga o o tatou avā po o fanau, po o soo se isi i soo se tikeri o le amioletonu.


"Afai tatou te faia soo se mea o nei mea, o le a aveesea mana o le lagi. E faanoanoa le Agaga o le Alii. E aveesea le mama o lo tatou perisitua. E leiloa lana pule. . . .

" . . . E avea [le perisitua] o se taiala e ola ai o tatou olaga. I lona atoaga, o lona pule e oo i talaatu o le veli o le otu ma oo atu ai i le faavavau o i le lumanai.

"E leai se isi mea e faatusatusa i ai i lenei lalolagi atoa. Ia malupuipuia, ia faapelepele i ai, alofa i ai, ia ola agavaa i ai."

Peresitene Gordon B. Hinckley (1910–2008), "O Le Agavaa Patino e Faaaoga ai le Perisitua," *Liahona*, Julai 2002, 58, 61.

E maua e i latou e umia le perisitua le mana o le perisitua e ala i le faatuatua ma le usiusitai:



Taulima ma le agalelei lau avā, fanau, ma isi tagata.



Tapuai i le malumalu.



Auauna atu ma le faamaoni i lou valaauga.



Taumafa ma le tatau i le faamanatuga.



Faaaoga le perisitua pe a valaaufina oe.

E LEI AVAAVAU MAI LAVA LE ALII IA TE AU

Taofia le igoa


Sa ou lagonaina le faavaivai i le vaavaai atu i lo ma atalii ulumatua ua pa'u atu i mailei a Satani, ma sa masani ona faailoa atu lo'u fefe e ala i le ita. Sa ao ina ou sui au lava nai lo le taumafai e suia lo'u atalii.

Ao laiti le ma fanau e toafa, sa ma manatu ma lo'u toalua e faapea, afai ma te faia ni faataitaiga lelei ma aumaia i latou i totonu o le talalelei i le tele o le alofa ma le tumau, e mautinoa lava o le a le o ese mai i lena ala.

I se tasi aso o le taumafanafana na faamalosia ai i maua e lafoai lena manatu. Sa alu lo ma atalii ulumatua, pe tusa ma le 14 tausaga le matua, e taele i le vaitaele ma ana uo. Ina ua ou sau i le vaitaele ma le fanau laiti, na ou manatu sa ou vaai atu ia te ia ma se sikaleti i ona lima. Sa ou popole, o lea sa ou talanoa atu ai ia te ia i lena mea i se taimi mulimuli ane. Sa na ona ia fai mai lava e sese au. O le mea e faanoanoa ai, o le amataga lena o ana pepelo.

I le aluga o taimi sa taumamao atili ai pea o ia mai ia i maua. Sa le toe mafai ona talanoa i ai ma e tele lava ina ita e aunoa ma se mafuaaga e ita ai. Sa faaopoopo atu i sikaleti le ava malosi, fualaau faasaina, gagana masoa, ma le faupuega o pepelo. Ma sa avea ma avega mamafa ana amioga e faasaga i le aiga.

O le taimi muamua sa ma taumafai ai e faatapulaa ana gaoioiga ina ia mafai ai ona puipuia o ia, ae na atili ai ona faatautee mai. Sa le aoga ia aoaiga. Ina ua ou fautuina o ia ma luiina o ia sui, sa oo ai lava a ma talanoaga i le tele o taimi i finauga leotetele lea sa atili ai ona i ai lo ma va.



Sa faigata ia i maua ma lo'u toalua lo ma popolega mo lo ma atalii ulumatua. Sa ma taumafai e saili le taitaiga e ala i le tatalo, ae sa ou lagonaina le faavaivai i le vaavaai atu i lo'u atalii ulumatua o loo filifilia lea ala matautia. Ao ma tatalo, sa taialaina i maua e tuu atu i lo ma atalii nisi avanoa sili atu nai lo le puleaina o ia i ni tulafono saisaitia sili atu. Na foliga mai na matuai tutupu mai ai pea faafitauli e le tusa ai ma o ma faamoemoega, ae o

a ma taumafaiga uma muamua e taofi ana amioga sa lei faamanuiaina. O lea na ma filifili ai e faasala o ia pe taofia o ia pe a aafia tonu lava lo matou olaga faaleaiga i ana amioga.

E ui i le taumafai e mulimuli i fautuaga a le Alii, ae sa ma iloaina le faateleina o le leaga o le faafitauli. Sa ou tauivi e faatoilalo ou lava ia le mautonu ma le lotovaivai. Sa ma taumafai ma lo'u toalua ina ia fai pea aafifi faaleaiga ma tatalo faaleaiga, ae



IA ILOA LE LELEI O LOO I ISI

"Ou te tuuina atu ni manatu faaiu mo i latou o e alolofa

i se tagata o le aiga na te le o faia filifiliga lelei.

O lena mea e mafai ona luitauina ai lo tatou onosai ma le faapalepale. E manaomia ona tatou faalagolago i le Alii ma i Lana taimi e mafai ona maua ai se tali lelei i a tatou talosaga ma taumafaiga laveai. Tatou te faia mea uma e mafai e auauna atu ai, e faamanuia ai, ma ia faailoa atu ma le usiusitai le finagalo o le Atua i mea uma. . . . Tatou te faaaoga le faatuatua ae manatua e i ai nisi o mea e ao ona tuu pea i le Alii.

"Ua la valaaulia i tatou e lafo atu a tatou avega i lalo o Ona aao. Faatasi ai ma le faatuatua e mafai ai ona tatou iloa, o lenei tagata peleina ua se ese e le o tuulafoaia ae o loo i ai i le tausiga a se Faadola agaalofa."

Elder Richard G. Scott O Le Korama a Aposetolo e Toasefululua, "Mo Le Filemu i le Aiga," *Liahona*, Me 2013, 31.

sa lofituina au i le tausalaina a o ou manatuaina i taimi uma lava lo ma le atoatoa ma taimi uma sa sese ai lo ma taulimaina o le ma atalii. Ou te tagi soo, moe itiiti, ma o nisi taimi sa matua vaivai ai lava le tino lea sa na o le gafatia lava e gaoioi ai.

O le olaga faaleaiga lea sa matou iloaina, ua seasea toe i ai. O afiafi faaleaiga sa tele lava ina faaiu i vesiga ma finauga. Ae maise lava sa ou le onosai i e sa pele ia te au ma faailoa atu ia i latou i le leotole.

Na ma iloaina ma lo'u toalua e le mafai ona ma tuua lo ma aiga e noatia i lalo i lea tulaga. Sa ma filifili e faauau pea ona mulimuli i le fautuaga a le Alii ma perofeta, o lea na ma faia ai se taumafaiga e faia ni afiafi faaleaiga faasamasamanoa e le fuafuaina, faatasi ma le fanau o e na naunau mai. Ae sa ou le mafai lava ona taliaina le saisaitia o lo ma atalii ulumatua i mailei a Satani. Faatasi ai ma le tatalo, anapogi, ma le faamoemoe—o mea uma na foliga mai na totoe ia i maua—sa ma lafo atu le ma avega i le Alii ma faalagolago atu ia te Ia.

Sa faateteleina le leaga o faafitauli. I se tasi taimi sa sili ona faigata, sa ou talosaga atu ai i lo'u toalua mo se faamanuiaga faaleperisitua. Sa ou faamoemoe mo upu faamafanafana ma faamalosiauga. Ae, sa silafia e le Alii ou manaoga moni. Sa lapataiina au i le fefinauai leotetele ma lo'u atalii. Sa faailoa mai e le Alii ia te au, e le'i i ai se taimi se tasi na Ia avaavau mai ai ia te au—ae o lea ou te e'e i la'u fanau i taimi uma.

I lena faamanuiaga, sa toe fautuaina ai au e manaomia ona ou talanoa i lo'u atalii e uiga i ou popolega mo ia

nai lo le faitioina o ia. Na ou iloaina ai o lo'u ita ma faitioga sa o se faailoga moni lava lea o lo'u fefe mo ia. Sa ou osofaia pea o ia, ma sa ia puipuia o ia lava i soo se ala na te mafai ai. Sa ou mafaufau i auala e suia ai la'u amio.

O le taimi lea, sa ou auauna atu ai o se faiaoga o le inisitituti. Na ou iloa sa le faigata ona taulimaina le autalavou i le lotu ma le toofilemu ma le magafagafa lelei ona sa le faigata ia te au lagona o se tina.

Sa ou le taumafai e vaai atu i lo'u atalii i ni mata o se tina popole ae o se tagata ese. O lenei fuafuaga, ma le tele o le tatalo ma anapogi, sa fesoasoani ai ia te au e pulea o'u lagona ootia ma vaai atu i lo'u atalii—lea ua toeitiiti atoa le 18 i le taimi nei—i ni mata fou. Sa toe mafai ai ona ou toe vaai atu i ona uiga lelei. Na mafai ona ou faailoa atu o'u lagona ma popolega ia te ia ma le faamaoni e aunoa ma le atuatuvalue.

Sa avea lea mea ma se suiga tele i le ma mafutaga. Sa ma talanoaina ma lo'u atalii le tele o mea, ma na mafai ai ona ou tuu atu ia te ia e onosaia e ia lava ia taunuuga o ana amioga. Sa tau na ona ma faufautua atu ma lo'u toalua ia te ia i auala e mafai ai ona ia foia ona faafitauli mo ia lava.

Sa faasolosolo lava, ona amata ona ia taliaina lo ma alolofa ma le lagolago. O a matou fegalegaleaiga ma ia, ina ua mavae tausaga faigata e lima, ua faavasegaina muamua nei i le faaloalo. O lona olaga, i le tele o tulaga, o loo faaletonu lava, ae ua i ai o ia i luga o le ala o le toe faatulagaina. Ua faasolosolo malie lava ona ia iloaina le mea e taua moni i le olaga ma mea e aumai ai le faamalieina tumau.

O le faatinoina o le fautuaga a le Alii ua fesoasoani i lo matou aiga e toe maua ai se olaga e sili atu ona fiafia. Ua ma aoaoina ma lo'u toalua le mamanuina o o maua lava olaga ma lo matou olaga faaleaiga nai lo le taumafai e mamanu le olaga o lo ma atalii.

Ua ou iloa nei le uiga o le tuu atu o la'u fanau i le Alii. Na te silafia i latou e sili atu nai lo au. Ua ou aoaoina e aua nei ou lagonaina o a'u e faaminoina mo filifiliga uma a la'u fanau. Ua ma iloaina ma lo'u toalua, o le fesoasoani sili ona lelei e mafai ona ma tuuina atu i lo ma atalii o le liliu atu lea i le Alii ma faalagolago atu i Lona finagalo ma fautuaga. ■



**Saunia e Elder
David B. Haight
(1906–2004)**

O Le Korama a Apostolo
e Toasefululua

OLE A LE UIGA O IESU IA I TATOU I ASO NEI?

Sa faauuina Elder David B. Haight o se Apostolo i le aso 8 o Ianuari, 1976, ma sa auauna atu i lena korama seia oo ina maliu o ia i le 2004. I le avea ai ma se Fesoasoani i le Aufono a le Toasefululua, na ia fofogaina ai lenei lauga i le konafesi aoao i le aso 6 o Aperila, 1974. Mo le anotusi atoa i le Faaperetania, tagai i le Ensign Me 1974 i le LDS.org.

OIesu o loo ou iloa ma talitonu i ai o Iesu le Keriso, le Alo o le Atua. O lenei molimau ua faaalia mai ia te au e ala i le faamanuiaga ma le uunaiga a le Agaga Paia. Ou te iloa o Ia o . . . le Foafoa o le lalolagi ma mea uma o loo i ai, o Ia o lo tatou Faaola o lē alofa ia i tatou taitoatasi ma o lē na maliu i luga o le satauro mo i tatou, o lē o loo aoao mai ia i tatou le agaalofa ma le faamagalo atu, o le uo a tagata uma lava, o lē faamalolo i e mamai, o lē foai mai le filemu ia i latou uma o le a faalogo ma talitonu.

E le tatau ona se ese tagata o aso nei mai upumoni anamua ma aso e gata ai—upumoni ma aafiaga faaleagaga ia na tutupu ao savavali perofeta ma talanoa faatasi ma Iesu. O le a le uiga o Iesu i le au apostolo

anamua? O le a Lona uiga ia Peteru?

Ua tusia e Mareko mea na tutupu i le taeao o le Toetu, o loo taua ai na faatonuina ia Maria le Makatala ma Maria le tina o Iakopo e ni [agelu se toalua] na latou fetaiai ao ulu atu i le tuugamau e faapea, “O atu . . . ina ta’u atu i ona soo atoa ma Peteru” (Mareko 16:7). Sa patino lava le faatonuina o i laua ia faailoa atu ia Peteru. Sa faanatinati atu Peteru ma Ioane i le tuugamau. Sa ulufale atu Peteru, ma vaaia lavalava o ie lino ua gaugau faalelei ma le solosolo na i ai i Lona ao. Ua avea nei Peteru ma se molimau patino o lenei mea maoae ua tupu.

I le aso o le Penetekoso, sa tali atu ai Peteru . . . e uiga i le talalelei mamalu ma molimau atu e uiga ia Iesu o Nasareta. Sa tuia loto o tagata ma fesili atu, “Sema e, le au uso e, se a se mea matou te faia?” (Galuega 2:37) Ma o Peteru, faatasi ai ma lena talitonuga maumaututu fou ua faalolotoina, na tali atu ai, “Ina salamo ia, ma ia taitasi ma papatisoina outou uma i le suafa o Iesu Keriso mo le faamagaloina o agasala, ona maua lea e outou o le mea foai fua mai, o le Agaga Paia lea” (Galuega 2:38). Sa talitonu tagata e tolu afe ma na papatisoina. Sa latou lagonaina le agaga ma le mana o le Apostolo sinia a lo tatou Alii. Pe tatou te masalosalo ea i le uiga o Iesu ia Peteru?

E faamalosia lava au i taimi uma e ala i le tuuto ma le maoae o le talitonuga maumaututu o Ioane. Sa matua

leai lava se masalosalo. Na ia molimau mai: “Sa i le amataga le Lokou, sa i le Atua le Lokou, o le Atua foi le Lokou. . . . Na ia faia o mea uma lava. . . . Sa ia te Ia le ola; o le ola foi o le malamalamala lea o tagata. Ua pupula mai foi le malamalamala i le pouliuli; ae lei talia e le pouliuli” (Ioane 1:1, 3–5). . . .

Atonu e le oo lo tatou lava ia malamalamala e iloa ai le uiga o Iesu ia Nifae ina ua faaali atu le Keriso toetu i le konetineta i sisifo, ma fetalai atu, “Faauta, o Au o Iesu Keriso, o le na molimau i ai perofeta o le a sau i le lalolagi.” . . .

Ona tusia lea e Nifae e faapea, “Na o atu le motu o tagata i luma, ma tuu atu o latou lima i lona itu, ma latou tagotago i tulaga o fao i ona lima ma ona vae” (3 Nifae 11:10, 15). . . . Sa latou i ai i Ona luma, ma sa mafai ona latou molimauina.

O le a le uiga o Iesu i le taulealea o Iosefa Samita? O le faaali mai o le Atua le Tama ma Iesu Keriso i le perofeta taulealea i aso nei ua faamatalaina i ana lava upu: “sa ou vaaia se malamalamala faaniutu tonu lava i le aluga o lou ulu, e sili atu le pupula nai lo le la. . . . Ina ua oo ifo le malamalamala i o’u luga, sa ou vaaia ni Tagata se toalua, e le mafaaamatalaina lo la’ua mamalu ma lo la’ua pupula, o tutu mai i ou luga a’e i le ea. Sa fetalai mai le tasi o i laua ia te au, ma sa ia ta’u lo’u igoa ma fetalai mai a o tusi ane lona aao i le tasi—O Lo’u Atalii Pele lenei. Faalogo ia te Ia!” (Iosefa Samita—Talafaasolopito 1:16–17). . . .

O malamalama faaleagaga ma aafiaga faaleagaga e le tatau ma e le manaomia ona mou mai le mafaufau o tagata o aso nei, aua o le molimau a perofeta anamua ma aso nei ua faamaumauina mo le manuia o le a le tagata lava, ma o le taimi nei, ua molimau atu ai tagata talitonu i nei upumoni. O tagata o ona po nei e tatau ona suia le le mautonu ma le masalosalo i se naunautai e fialoa atili e uiga ia Iesu.

O lo tatou tiutetauave ma avanoa mamalu o le molimau soo atu e uiga ia Iesu Keriso. E tatau ona tatou

molimau atu i le lalolagi i Lona tulaga-faaleatua, i le moni o Lona soifua mai i le tino i ni matua faalelagi ma faale-lalolagi. Sa filifilia o Ia e faatino le misiona taua o le Toefuataiga ma le Togiola. O lenei mea na Ia faia—faasatauroina o Ia ma toetu mai mai le tuugamau, o lea ua mafai ai e tagata uma ona toetutu e ala mai i lenei Togiola ofoofogia a Iesu, e tutusa pau ai le tagata amiontonu ma le tagata agasala.

E mafai ona tuu atu mea uma i le ala o le alualu i luma e faavavau. O tagata uma o e talia o Ia ma salamo

e maua le faamagaloga o ana aga-sala ua tuanai ma le avanoa e maua ai le faaeaga. “O a’u nei le ala, ma le upu moni, ma le ola: e le alu atu lava se tasi i le tama, pe a le ui mai ia te a’u” (Ioane 14:6). Mata e mafai e le mafaufau o le tagata ona atiina ae se manatu sili ona tamalii mo le faasino-maga o le tagata? O Iesu Keriso o le tagata autu lea.

I le fesili “O le a le uiga o Iesu i le tagata o aso nei?” Ou te molimau atu o Ia ua faauigaina o mea uma lava. ■

Ua faatulagaina faailoga, mataitusi tetele, ma le tetele o faamatalaga.



E le tatau ona se ese tagata o aso nei mai upumoni anamua ma aso e gata ai—upumoni ma aafiaga faaleagaga ia na tutupu ao savavali perofeta ma talanoa faatasī ma Iesu.

TALA FOU O LE EKALESIA

Asiasi ane i le news.lds.org mo se faaopoopoga o tala fou ma mea e tutupu i le Ekalesia.

E Amata ia Oketopa ia Autu Fou mo Faiaoga Asiasi

E amata atu ia Oketopa 2013 o le a taulai atu ai Savali a Faiaoga Asiasi o le Aualofa i le misiona paia a Iesu Keriso ma le tele o Ana matafaioi ma uiga paia.

E pei ona tatou faitau ai i le *O Afafine i Lo'u Malo: O Le Talafaasolopito ma le Galuega a le Aualofa*, “A o i ai Iesu Keriso i le fogaeleele, sa Ia faailoa mai ia i tatou ia ala e tatau ona tatou ola ai.”¹ E ala i le suesue ma le taulai atu i matafaioi ma uiga paia o le Faaola, o le a aoao ai ia tuafafine i le Ekalesia ia avea e faapei o Ia² ma o le a mafai ai ona talanoaina faatasi ma tuafafine latou te auauna i ai le auala e mafai ai e aoaoga ma faataitaiga a le Faaola ona uunaia o latou olaga.

Sa faaali mai e le Alii ia i tatou le auala e auauna atu ai—le auala e leo-leo ai, faamalosia, ma aoao ai e le tasi le isi. O Lana galuega o se auaunaga

i tagata, e taitoatasi.³ O faiaoga asiasi o la tatou avanoa lea e mulimuli ai i Lana faataitaiga.

Sa molimau mai Peresitene Henry B. Eyring, Fesoasoani Muamua i le Au Peresitene Sili e faapea, “o faiaoga asiasi o se vaega o le fua-fuaga a le Alii e tuuina atu ai fesoasoaniga mo tagata i le lalolagi atoa. . . ‘Sa Ia faatulagaina se mamanu.’⁴ I le avea ai ma faiaoga asiasi, tatou te manatua foi le fautuaga a Peresitene Thomas S. Monson: “O i tatou o aao o le Alii i le lalolagi, ua i ai le tiute-tauave e auauna atu ma siitia Ana fanau. O loo faalagolago mai o Ia ia i tatou taitoatasi.”⁵ ■

FAAMATALAGA

1. *O Afafine i Lo'u Malo: O Le Talafaasolopito ma le Galuega a le Aualofa* (2011), 113.
2. Tagai Moronae 7:48.
3. Tagai *O Afafine i Lo'u Malo*, 113; *Tusitalima 2: Taitaiina o le Ekalesia*, 9.5.
4. *O Afafine i Lo'u Malo*, 118–19.
5. *O Afafine i Lo'u Malo*, 120–21.



Ua i ai Nei
Faamaumauga
e Tasi Piliona i le
FamilySearch

Saunia e R. Scott Lloyd
Church News

Ua faavasegaina (faanumeraina) e volenitia i le lalolagi atoa le faa-putuga tele a le Ekalesia o faamaumauga o gafa lea na ausia i se tulaga maoae tele i le aso 19 o Aperila, 2013. I lena aso na latou ausia ai ni faamaumauga sailia e tasi piliona ua faaopoopo atu i le uepsaite a le Ekalesia o le FamilySearch e itiiti ifo ma le fitu tausaga.

Sa faatulagaina pe faavasegaina e volenitia ia faamaumauga talu mai le 1978, ae ia Setema 2006 sa faalauiloa mai ai e le Matagaluega o Talafaasolopito o Aiga se faagasologa tele ma valaaulia ai soo se tasi i soo se mea e alu i totonusi i le saite lea ma saini ai ina ia auai ai i le galu-ega faatino o le faavasegaina o igoa.

“O le tele o faamaumauga e aumai mai se faaputuga o lola mataninii e 2.4 miliona o loo i ai ia ata pue o faamaumauga faasolopito mai atunu ma malo e 110,” sa faamalamalama mai ai se tasi e faaaogaina le saite o le FamilySearch. “O faamaumauga e aofia ai faamaumauga o le faitau aofai o tagata, pepa fanau ma pepa maliu, laisene o faaipoipoga, faamaumauga faalemili-teli ma meatotino, ma isi faamaumauga taua o loo tausia i le lotoifale, setete, ma faigamalo a atunu.” ■

Ua Tau Atu e Elder Perry i le Au Faauu o le Iunivesite ia Faatumaufina le Paleni o le Olaga

Sa saunoa atu Elder L. Tom Perry o le Korama a Apostolo o Toasefulua i le sauniga o le faauuga mo le Iunivesite o Polika laga i Provo, Iuta, ISA, ia Aperila 2013. Sa ia saunoa e uiga i le manaoga mo le sailia o le paleni i le olaga ma ia faamamafa atu le manaomia ona tuu atu se taimi mo le aiga, taimi mo le galuega, taimi mo suesuega, taimi mo auauanaga, taimi mo le tagata lava ia, aemaise lava o le taimi mo le talalelei a lesu Keriso.


Sa ia fautuaina le au faauu ia ola fuafua ma faautauta. "O se tasi o lesona taua o le a e aoaoina, o le puipuiga ma le filemu lea e sau mai le ola e tusa ma mea ua e maua," sa ia saunoa ai.

Sa ia faamamafa atu foi le taua o le faavaeina o se aiga e faatutotonu ia Keriso. "O tatalo ma le suesueina o tusitusiga paia i aso taitasi e tatau ona avea ma se vaega o aiga uma o le Au Paia o Aso e Gata Ai," sa ia saunoa ai. "la avea le talalelei a lesu Keriso ma se vaega taua ma le ola o lou olaga."

Ua Asia e Elder Nelson le Eria a Asia i Matu

Mai le aso 23 o Fepuari i le aso 3 o Mati, 2013, sa asia ai e Elder Russell M. Nelson o le Korama a Apostolo o Toasefulua le Eria a Asia i Matu. Fai mai Elder Nelson po o fea lava o le lalolagi e malaga i ai, e tasi lava lana savali. "Ua matou i ai iinei e aoao atu ma molimau atu e uiga i le Alii o lesu Keriso ma Lana talalelei toefuataiina," sa ia tau atu ai i tagata o le ekalesia i le eria. "O la tatou savali o le savali o le filemu ma le olioli, o le faamalolosia o aiga, fusia o tane ma ava, o fanau i o latou matua, faapea ma tagata i o latou tuaa . . . ina ia mafai ona latou olioli uma ai i le ola e faavavau i le afioaga o le Atua pe a maea la latou malaga i le lalolagi."

E faaopoopo ai i le fono ai ma taitai perisitua ma tagata o le ekalesia i le eria atoa faapea ai ma se itu faapitoa mo taitai o le militeli i Okinawa, sa feiloi ai foi Elder Nelson ma ni taitai o le malo se toalua i le lotoifale i Japani.



Ua Oo Mai le Konafesi


Ua toe tulalata mai foi le konafesi aoao, o le taimi e faasoa mai ai e taitai o le Ekalesia i tagata le afioga a le Alii. E pei ona fetalai mai le Alii, "Pe i lo'u lava leo po o i le leo o a'u auaua, ua tutusa lava" (MF&F 1:38). O se aafiaga lenei mai le konafesi aoao ia Aperila 2013:

Konafesi i luga o le Sami i Kalilaia

Pe a ma le 60 tamaiti aoga mai le lunivesite o Polika laga i le Nofoaga Autu i Ierusalem mo Suesuega e Latalata i Sasae na faapotopoto i le matafaga o le Sami o Kalilaia ia Aperila talu ai e maimoa i le sauniga o le taeao o le Aso Sa o le konafesi aoao. O se faasalalauga tuusao i le initonetia o le sauniga sa fana i luga o le pito o se tamai fale na tu e le mamao lava mai le sami. Sa i ai tamaiti aoga i Kalilaia o se vaega o se malaga e 10 aso i le itulagi. Sa latou iloaina ma talisapaia le taua o lea mea na tupu.

Sa saunoa Jennie Smithson, o se tasi o tamaitai aoga, e faapea o se mea e ofo ai "le aoaoina e perfecta ma apostolo o aso e gata ai a o vaai faalemafaufa i apostolo anamua o aoaoina i luga tonu o nei lava matafaga e Keriso lava la." ■

Vaaiga mai le BYU Jerusalem Center.



PULITAORA ELEIRI

o aiu Tatalo *ole* Lotofaaafetai

*A o matou tauivi
i mea tautupe,
na ou lagonaina
e tele naunau o
matou manaoga
e manaomia ona
matou tatalo ai.
Mata e mafai moni
ona taula'i atu a'u
tatalo i le na o le
agaga faafetai?*



SauSa Saunia e Christie Skrinak

Otausaga ua mavae sa ma faatauina ai ma lo'u toalua se fale sa ma faamemelo i ai ma faaaluina le tele o taimi ma tupe i le toe faiga. O le sefuluvalu masina mulimuli ane, na tifato ai le tamaoaiga. Na tatau ai ona matou faaaluina le matou teugatupe sa faigata ona maua, i se nonogatupe na faatau ai le fale, ma le tele o tupe faaalu matou te le'i mafaufauina o le a i ai.

Na mavae atu masina o tofotofoga ma faigata tautupe. Sa matou feagai ma se masina na faapitoa le faigata ona o lipea o le fale ma le taavale, pili o le vaaiga o fomai, ma se faaitiitia o le totogi. Sa vave ona nimo atu le matou tupe teu.

Ou te manatua le tatalo ma aioi atu pea mo mea na matou manaomia. O le tumu i le atuatuvalo, sa faigata ai ia te au ona vaai faalelei le ma fanau ma manaoga o le matou aiga, a o ou pau atu i le atuatuvalo ma le faanoanoa. Ae, sa faaauau pea ona ou tatalo, sailia o le faalaeiauga ma le iloa o lenei mea o le taula lea na taofiofia a'u mai le pau atili atu i le pogisa.

Ina ua mavae masina o tatalo mo se fesoasoani, na amata ona ou mafaufau i ni auala e tatalo atili ai ma le loto atoa. Na aumai e le Agaga i lo'u mafaufau le fautuaga mai taitai perisitua ma tusitusiga paia na aoao mai ai le taua o le faaalia o le agaga faafetai i le Tama Faalelagi. O nei uunaiga sa fesoasoani ou te iloa ai, na manaomia ona ou faailoa atu le loloto o le agaga faafetai mo o'u faamanuiaga ae faaitiitia le ole atu mo mea sa manaomia e i matou ma le matou aiga. Sa ou filifili ai ou te taumafai mo le tasi le vайaso e faataatiae a'uolega i aso taitasi ae ia faaali atu na o le agaga faafetai i a'u tatalo.

Sa faigata. Sa ou lagonaina le i ai o le anoano o manaoga o lo'u aiga. Sa ou lagonaina e pei lava na ou tuua i lalo lo'u aiga e ala i le ole atu mo faamanuiaga sa matou matuai manaomiaina lava. O le a faapefea ona faamanua a'u e le Alii pe afai ou te lei ole atu?

E ui lava i lo'u le mautonu e uiga i ai, ae sa ou taumafai pea. E le'i umi ae ou iloaina o a'u tatalo sa le toe avea o ni olega ta'ufaafia. Sa ou toe mauaina le tomai e iloa ai manaoga o isi ma vaai i tua atu o o'u faafitauli i faamanuiaga na fai pea mo a'u. O lo'u agaga faafetai na ou latalata atili atu ai i le Faaola, ma faamafanafanaina ai a'u i auala ma semanu ou te le mauaina.

Na oo mai pea se mau i lo'u mafaufau: "Afai e faapea ona faafuina e le Atua le vao o le fanua, o ola mai i le aso, a e lafaina a taeao i le ogaua, e le sili ea ona

faafuina o outou e faatuatua itiiti?" (Mataio 6:30). O lenei mau na faalotomaualaloina au a o faaauau pea ona ou tatalo. E ala i le loto faafetai, na ou aoao atili ai e uiga i le lotomaualalo moni.

A o faagasolo le vайaso, sa suia a'u tatalo mai le "Ou te faafetai i Lau afio mo meaai, lavalava, ma le malutaga" i le "ou te faafetai i Lau afio mo se aiga ua E faasaoina ma tausia lelei, mo le puipuiga o loo faaauau pea ona E tuuina mai ia i matou. Ou te faafetai i Lau afio mo mea o le a faaauau ona E faamanua ai i matou." Ou te manatua foi na ou tatalo, "Ou te faafetai i Lau afio mo le matou faalagolago atu i Lau afio, mo Lou manatu mai ia i matou, ma mo le ala o loo E sauniaina mo i matou e sao ese ai mai lenei nofopologa, po o le a lava." O se mea faapena, na oo ina avea ai a'u tatalo ma tatalo e le na o le agaga faafetai, e le na o le lotomaualalo, ae o le faatuatua foi. E aunoa ma le ole atu mo le faamanuiaga, sa ou faaali atu ai le faatuatua o le a tausia i matou e le Alii, ma sa matuai maualuga le tupu o lo'u faatuatua.

I le taimi o nei talosaga, na tele ina tosina atu o'u mafaufauga i le ositaulaga a le au Paia anamua, ma ou te fesili ifo ai ia te au lava, po o le a se mea sa ou naunau e ositaulaga. Na mavae atu nai nisi aso, ona matou tuuina lea o le matou fale pele mo le faatauina atu. Sa matua maualalo le maketi o fanua ma fale, ae o le mea na ofo ai, sa faamanuiaina i matou i le taulia o le matou fale. E ui ina sa tele le matou tupe na gau—e pei ona sa matou manatulia—ae na i ai nei lo matou aiga i se tulaga e amata fausia ai se faavae sili atu ona mausali faaletino.

E ui i lea, o le faatauina atu o lo matou fale i taimi faigata faapena, e le o le vavega lea ua ou aoaoina mai i lenei aafiaga. O le vavega o le faatuatua na ou atiina ae ma le malamalamana ou maua ai. Ua folafola mai e peresitene James E. Faust (1920–2007), Fesoasoani Lua i le Au peresitene Sili, o le agaga faafetai o se "mataupu faavae faaola."¹ Ou te manatu na ou oo i se mea e pei o le mea sa ia talanoa mai ai, a o liliu atu lo'u loto ma a'u tatalo i le Tama Faalelagi, mauaina o le faamafanafanaga, toofilemu, ma le taitaiga. O la'u molimau fou na maua e uiga i le agaga faafetai o le, e musuia ai le lotomaualalo, o le lotomaualalo e uunaia ai le faatuatua, ae o le faatuatua e aumaia ai vavega. ■

E alala le tusitala i Nevada, ISA.

FAAMATALAGA

1. Tagai James E. Faust, "Gratitude as a Saving Principle," *Ensign*, Me 1990, 85–87.



Saunia e Elder
Jeffrey R. Holland
O Le Korama a
Aposetolo e
Toasefululua

O Le Faamasinoga Tonus ma le



Ou te iloa o le a tatou toe faatasi ma le Faaola, pe afai lena tatou te faamaoni ia te Ia, o le a tutu saoloto—e aunoa ma ni noataga ma ni avega—ma o le a tatou iloa i le faailoga i Lona tino se mea o Lona nofopologa ma le faapagotaina ma le tauлага malii mo i tatou.

Alofa Mutimutivale o le Atua

Sa lei pei o nisi sauniga faauu na ou auai atu i ai muamua. E toa 44 le au faauu, o alii uma. Sa lei i ai ni o latou ofu talaloa faaakatemia masani ai po o ni pulou po o ni ofu faauu. Na tofu laeina e alii taitasi se ofutino lanumoana vaivai ma se ofuvae lanumoana malosi.

E lei faia le sauniga i se faletaalo po o se malae taalo pe oo lava i se fale faafafia mata-gofie. Sa faia i se tamai falelotu e faaaoga e le tele o lotu i le Falepuipui o le Setete o Iuta. O le vasega faauu na maea ma le manuia se tausaga o le suesue i le Tusi Paia, lea sa lagolagoina e Le Eklesia a Iesu Keriso o le Au Paia o Aso e Gata Ai ae sa tatala mo i latou uma o e na fia auai.

O le tatalo amata sa faia e se alii talavou sa foliga mai o se tama itiiti. A oti o ia i le fefe, ae sa ia tuuina atu se tatalo mai lona loto. Sa faafalepuipuiina o ia mo le 10 tausaga atonu foi o lona olaga atoa i se faasalaga o le gaoi faaauupegaina. O le tatalo faaiu na saunia e se alii na 45 pe 50 tausaga le matua ma na foliga mai o se alii o se aiga o se tasi. Sa

faasalaina o ia e soloatoa i le falepuipui ona o le fasioti tagata faamoemoeina.

O se alii talavou na tatala mai i tua mai le falepuipui na toe foi e avatu lana tusi faamaonia ma ia faamalosiau i ana paaga. Sa ia faapea mai, “Alii, o le vaaiga i le falepuipui e matua mataga lava. E sili atu le manaia o foliga o fafo. Taumafai e manatua lena mea.” Ona ia liliu atu lea i tagata fai mai, i uo ma aiga o e na o mai, ma faapea atu, “O outou o se malamalamama i se nofoaga pogisa. Pe ana leai lo outou alolofa, semanu e le mafai ona matou o ese mai i le mea o loo matou i ai i le mea e tatau ona matou i ai.”

Ina ua maea le sauniga, na faapea mai le pagota lea na taitai, ma se lagona ootia i lona leo ma sina puao i ona mata, “O se mea sili ona lelei lenei ua tupu i lo matou tausaga. E sili atu nai lo le Kerisimasi. E sili atu nai lo le aso Faafetai. E sili atu foi nai lo le Aso o Tina. E sili atu ona ua matou malamalamama, ma o le latalata lena matou te oo atu i ai i le ola saoloto.”

Ona pao lea o le tapuniga o faitotoa i o maua tua ma lou toalua. I lena po na ma o ai



*Ia tatou o i le
nofoaga o le
faanoanoa—i le
epikopo po o le
Alii po o i latou
ua tatou faatiga
i ai, pe ia i latou
na faatiga ia
i tatou.*



i le fale, ma ou te faailoa atu sa le mafai ona ou moe. Sa faapopoleina au e lena aafiaga. I le vaveao o lena taeao, sa ou maua ni lagona ma ni manatu ma se tali atu i le faafalepui-puiina ma le saolotoga (ma lo la fesootaiga i le malamalama ma le alofa) ou te lei mauaina muamua.

O Le Faamsinoga Tonu a le Atua

O se tasi o lagona sa ou maua i lena po e faapea, o le Atua e sa'o ma tonu. Fai mai Alema: "E te manatu ea e mafai e le alofa mutimutivale ona faoa le faamsinotonu? Ou te fai atu ia te oe, e Leai; e leai sina iota e tasi. Afai e faapea, po ua le toe avea le Atua ma Atua" (Alema 42:25). Na faapea atu le Aposetolo o Paulo i Kalatia, "Aua nei faaseseina outou; e le ulagia le Atua: aua o le mea e luluina e le tagata, o le mea lava lea e seleseleina mai ai e ia" (Kalatia 6:7).

O se tasi o o'u manatu na sosoo ai e faapea, o le uiga moni lava o le tala a Paulo tatou te mauaina taunuuga e tusa ai ma a tatou amioga ma galuega. Na ou toe manatuaina foi afai tatou te totolina ni vaotuitui, tatou te le fuafua moni lava e selesele mai ni sitolōperi [strawberries]. Pe afai tatou te totolina le ita, tatou te le faamoemoe moni lava e maua mai ai le tele o le alofa. Tatou te mauaina mai mea sa tatou totolina.

Ona oo mai lea o se isi manatu a ou manatuaina na alii i o latou faanoanoaga: o se mea e tasi le seleseleina o se mea na tatou luluina, ae i se isi itu, o le a tatou seleseleina pea i ni aofaiga tetele. Tatou te totolina se vaotuitui laitiiti, ma tatou maua ai le tele o vaotuitui—o tausaga ma tausaga o vaotuitui, o togavao tetele ma ona lala. E le mafai ona tatou tineia seiiloga e sasa i lalo. Afai tatou te luluina sina ita laitiiti, e le umi ae tatou seleseleina le matua faateleina o le ita—feitagai ma le le fiafia ma taua'iupuga ma iu ai ina fetauai ma amioleaga.

Ma, o le le mafaufauina, sa ou maua ai se malamalamaaga faamafanafanaina o lo'u manatu muamua sa i ai—o le Atua e sao ma

tonu—sa le tiga tele e pei ona faalogoina ai. Pe o le a lava le taufaafefe atonu e i ai le mafaufau i se Atua e tonu ma sao, ae e sili atu ona matua taufaafefe ia te au le mafaufau atu i se Atua e le tonu ma sao.

O se mataupu faavae autu o aoaoga faavae o le Au Paia o Aso e Gata Ai, o le tatau lea ona tatou iloa o le Atua e sao ma tonu ina ia mafai ai ona agai i luma. O se tasi o uiga taua o le Atua o le faamasino tonu, ma o le a tatou le maua le faatuatua—ona o le fefe—e ola amiontu ai pe ia lelei atu ona alofa ai, pe ia sili atu ona naunautai ma vave salamo ai, pe afai tatou te lei manatu o le a tatou taulia mo le faamsinoga tonu, ae afai na tatou manatu o le a sui e le Atua Lona finagalo ma filifili ai sa i ai se isi seti o tulafono.¹ Talu ai ona ua tatou iloa o le Atua e sao ma tonu, ma o le a le toe avea ma Atua pe ana faapea e le faapena, ua ia i tatou le faatuatua e agai ai i luma, ma le iloaina o le a le avea i tatou ma tagata e aafaa fua i faaiuga le talafeagai, po o ni suiga e lei fuafuaina, po o se aso leaga, po o se ulaga le lelei. O lena faamautinoaga e ese le faamalosiauina.

O Le Alofa Mutimutivale o le Atua

Ona ou mauaina lea o se isi foi manatu. Oka sou faafetai ona o le Atua o Ia lava lea, e tatau foi la ona avea o Ia ma Atua alofa mutimutivale. I le Alema e 42, ina ua uma ona faamautinoa atu e Alema ia Korianetona o le Atua e sao ma tonu, sa ia tautino mai o lena lava Atua e tatau ona alofa mutimutivale foi ma o le a maua e le alofa mutimutivale le *tagata salamo*. Ia, o lena manatu sa ese ia te au aua o lea na ou i ai nei lava i le falepuipui a le setete.

O lenei manatu na aumaia ia te au le faamalosiauga: E maua e le alofa mutimutivale le tagata salamo. Sa tonu ia te a'u e faapea, afai e tatau ona o na alii i le *falepuipui* ina ia faaaoga ai le meaalofa o le alofa mutimutivale—ma afai o le o atu iina latou te maua ai le talalelei a Iesu Keriso po o tusitusiga paia po o le Togiola—o lona uiga na aoga lo latou faafalepuipuiina.

Afai tatou te totolina ni vaotuitui, tatou te le fuafua moni lava e selesele mai ni sitolōperi [strawberries]. Pe afai tatou te totolina le ita, tatou te le faamoemoe moni lava e maua mai ai le tele o le alofa. Tatou te mauaina mai mea sa tatou totolina.

O lea ia tatou o ai i le nofoaga o le faanoanoa—i le epikopo po o le Alii po o i latou ua tatou faatiga i ai, pe ia i latou na faatiga ia i tatou. Ou te matea, o loo i ai o tatou lava tamai falepuipui, ua siomia ai i tatou. Afai o le o i ai iina o le mea lena o le a tatou salamo moni ai, ma ia mafai ai ona tatou talosagaina ai ma le tatau le meaalofa o le alofa mutimutivale, ona tatau lea ona tatou faia.

Ou te iloa e le faigofie le foi i tua ma toefaafoi i tua mea ua uma ona fai ma faia se amataga fou, ae ou te talitonu ma lo'u loto atoa e faigofie atu ma e mautinoa lava e sili atu ona faamalieina le toe amata nai lo le alu ai lava ma taumafai e talitonu o le a leai se aafiaga o le faamasinoga tonu.

Fai mai se tasi o tagata Peretania atamai ou te fiafia i ai: “Ou te le manatu o tagata uma o e filifilia auala sese e fano; ae o lo latou laveaiina e aofia ai le toe faafoi atu i le auala sao. O se faaopoopo [faamatematika] e [le sao le faiga] e mafai ona toe faasao: ae na pau lava le ala e mafai ai o le toe foi i tua seia e mauaina le measese [ona] toe fai atoa lea mai lena tulaga, aua e le mafai lava ona sa'o pe a *faaauau ai pea*. E mafai ona toe faaleaoga le leaga, ae e

le mafai ona ‘oo atu’ i se mea lelei. E le faaleleia e le taimi. E tatau lava ona aveese le mala.”²


O lea la, o le Atua e sao ma tonu, e “maua e le alofa mutimutivale le aia i le tagata ua salamo” (Alema 42:23), ma e mafai ona toe talepeina le leaga.

O Le Manaomia o le Salamo

O le manatu faaii ma le sili na ou maua na fesoasoani ou te malamalama ai i le mea atonu ou te lei malamalama moni i ai. O le mafuaaga lea i augatupulaga uma, i tisipenisione uma, na fetalaiia mai ai e le Alii le mea na Ia fetalaiia mai i le amataga lava o aoaoga faavae o lenei tisipenisione: “Ia leai se mea e te fai atu i lenei tupulaga tau lava o le salamo; tausi i a'u poloaiga” (MF&F 6:9). Na avea lena mea ma se manatu ma se fuaiupu ua sili ona lelei, aoga, ma faagaeetia mo au. I se isi itu, na ou iloaina, ou te lei malamalama muamua, e leai lava se isi auala e ese mai i le salamo.

Afai e pei oe o isi tagata o le olaga nei, e i ai nisi o vaega e tatau ona tatalaina mai ai oe lava ia, e i ai ni ou noataga ma saisaitiaga e mafai ona faasaoloto mai ai oe, ma e i ai nisi o agasala e mafai ona e salamo mai ai. Sei ou





faaaogaina sina faataitaiga lava e tasi: o le nofologa i le valea.

O le a mea e foliga mai ia te au o le saisaitiaga muamua aupito maualuga i o tatou olaga, o le utiuti lea o mea tatou te iloa. Tatou te vave aoaoina i o tatou olaga ni faaupuga laiti tautalagia soo. O le lua o ia mea o le, “O le valea e taitai atu ai i le fiafia atoatoa” ma le “O mea ou te le iloaina o le a ou le tiga ai.” Sei ou fai atu ma le malosi uma o ia te au, e leai se mea o le a *sili atu* ona tiga ia te oe nai lo mea e te le iloa. Ou te talitonu o le a tuuaia i tatou mo noataga faaleagaga tatou te aafia ai, ma o le a faasalaina i tatou i lenei olaga po o le isi foi olaga mo mea tatou te le aoaoina.

I totonu o mataupu faavae o lo tatou faatuatuaga ua tatou aoao ai e le mafai ona faasaoina i tatou i le valea (tagai i le MF&F 131:6), o mea tatou te aoaoina i lenei olaga o le a tutulai ae ma i tatou i le toetetu (tagai i le MF&F 130: 18), o le a tatou maua faamunuiga e tele i le lalolagi a sau, pe afai tatou te maua le atamai (tagai i le MF&F 131:19), e faaolaina i tatou i le aofaiga o mea ua tatou

aoaoina,³ o le malamalama ma le upumoni o le a lafoaiina le leaga (tagai i le MF&F 93:37), o le mamalu o le Atua o le atamai lea (tagai i le MF&F 93: 36), ma isi lava mea. I se tasi taimi i le amataga o le tisipenisione lenei, na tuuaia uma ai le Ekalesia atoa. Ua fetalai mai le Alii i le vaega e 84 o le Mataupu Faavae ma Feagaiga:

“Ma ou te tuu atu nei ia te outou se polo-aiga ia outou faaeteete e faatatau ia te outou lava, ia outou gauai ma le filiga i *upu* o le ola e faavavau.

“Ona ia outou ola i *afioaga* uma e tulei mai le fofoga o le Atua.

“Aua o le *afioaga* a le Alii o le upumoni lea, ma o soo se mea ua moni, o le malamalama lea, ma o soo se mea ua malamalama, o le Agaga lea, o le Agaga lava lea o Iesu Keriso” (fuaiupu 43–45; ua faaopoopo le faamamafa).

O le amataga o le a iu ina tatou oo i ai i le afioaga o le Alii o Iesu Keriso, lea o loo ave i ai i tatou e le vaega e 84 o le *upu* lea.

“Afafai tou te tumau ia te au, a tumau foi a’u *upu* ia te outou,” na tautino mai e le Alii i Lana auaunaga, “o mea uma lava tou te

Ou te iloa e le faigofie le foi i tua ma toefaafoi i tua mea ua uma ona fai ma fiafa se amataga fou, ae ou te talitonu ma lo’u loto atoa e faigofie atu ma e mautinoa lava e sili atu ona faamalieina le toe amata nai lo le alu ai lava ma taumafai e talitonu o le a leai se aafiaga o le faamasinoga tonu.

mananao i ai, tou te ole atu ai, ona faia lea mo outou" (Ioane 15:7; ua faaopoopo le faamamafa).

O Le Taua o le Saolotoga

Afai tatou te filifilia se autu mo lo tatou olaga—le olaga lea ua tatou iloa i le taimi nei, e le o lo tatou olaga ua mavae i le muai olaga ma e le o le olaga foi o loo i le lumai—o lena autu e tatau ona i ai se mea e fai i le sailiga mo le saolotoga moni. Ua tatou iloa o se vaega taua o le Fono tele i le Lagi sa faaaluina lea i le aoaoina o i tatou i le auala tatou te ono agai atu ai i luma i le saoloto atoatoa. O le ala a le Tama o le faitalia ma filifiliga—o le saolotoga e faia ai se mea sese ae i le iuga lava o le saolotoga ia faamanuaaina. Na tuuina mai le tele o malupuipuiga faapea ma mana uma o le atulaulau ina ia tuuina mai ai le faamaoniga o lo tatou saolotoga e faaaoga ai o tatou faitalia ma toe foi atu ai i lo tatou aiga faaselesitila. O nei malupuipuiga e aofia ai le atoatoaga o le upumoni o le talalelei ma le Togiola a le Faaola o Iesu Keriso.

Tatou te oo moni lava i le nofologa ma le falepuipui pe a tatou le saoloto. Na toeitiiti lava a ou moomoo maimau pe ana faapea sa faafalepuipuiina au i se taimi o lou olaga, ina ia matuai manino ai lenei faamatalaga. Maumau pe ana mafai ona ou tautala e pei o Peteru po o Paulo ma o mai ai agelu e faatei leoleo ma tatala faitotoa o le falepuipui (tagai i le Galuega 12:5–11; tagai foi i le 16:25–26) pe faapei o Alema ma Amoleka lea na solofa ai puipui o le falepuipui (tagai i le Alema 14:23–29) pe faapei o Iosefa Samita, o lē na mafai ona tusia ia mea atonu e sili ona musuia o tala faatusipaia o lo tatou tisipenisione i le lotolotoi ma le totonugalemu o se falepuipui laitiiti, eleelea, ma faavaivai loto (tagai i le MF&F 121–23). Tatou te faafetai i le Atua ua tatou ola i se vaitaimi e pei ona tatou ola ai nei, lea e le manaomia ai le soifua o le Peresitene ma le perofeta o le tatou Ekalesia i le mata'u i le faafalepuipuiina, ma e le o manaomia ona tatou, oo i le faapologaina

pe avea ma ni pologa, i tulaga faaupufai ma faaletino. Ae o loo i ai isi ituaiga o noataga ma o loo i ai isi ituaiga o falepuipui i o tatou olaga lea e tatau ona tatou faatamaiaaina. O mea uma ua tatou o mai iinei e fai, e tatau ona tatou faia.

Ou te talitonu ma lou loto atoa afai e mafai ona tatou salamo i a tatou agasala, pe afai e mafai ona tatou malamalama i agasala a isi, pe afai e mafai ona tatou maua le lototetele agai atu i o tatou tulaga ma manao e faia se mea e uiga i ai, o le aapa mai i lalo le Tama soifua o i tatou uma ma, i le faaupuga faatusipaia, "sapasapa i [tatou] i luga e pei o i luga o apaaau o aeto" (MF&F 124: 18).

Sa sapasapaia a'u i luga o apaaau o aeto. Ou te iloa ma lo'u loto atoa o loo soifua le Atua ma o Iesu o le Keriso. Ou te iloa o loo taitai e Iesu lenei Ekalesia, o Lana Ekalesia, o Ia o le maatulimanu autu, lea ua faataatia faataamilo ai le faavae o apostolo ma le perofeta soifua. Ou te iloa o le a tatou toe faatasi ma le Faaola, afai o le a tatou faamoni ia te Ia, ma o le a tatou tutu saoloto—e le noatia ma saisaitia—ma o le a tatou matauina i faailoga i Lona tino se mea i Lona nofologa ma le faafalepuipuiina ma le maliu e ositaulaga ai mo i tatou. Ou te iloa e tatau ona tatou salamo i a tatou agasala ma o le Atua e tatau lava ona faamasino tonu, ae ou te fiafia tele i tuisusiga paia ma upu a perofeta soifua e faapea, o le mea e tele ai le agasala, e sili atu foi ona tele ai le alofa tunoa, ma o le "alofa mutimutivale e maua le aia i le tagata salamo." ■

Mai se lauga o le faeasaite, "Borne Upon Eagles' Wings," na tuuina atu i le aso 2 Iuni, 1974, i le Iunivesite o Polika Iaga. Mo le tusiga atoa i le gagana Peretania, alu i le speeches .byu.edu.

Mo nisi faamatalaga i lenei autu, tagai D. Todd Christofferson, "Togiola," *Liahona*, Me 2013, 109; ma Craig A. Cardon, "E Finagalo le Faaola e Faamagalo Atu," *Liahona*, Me 2013, 15.

FAAMATALAGA

1. Tagai i le *Lectures on Faith* (1985), 50–54.
2. C. S. Lewis, *The Great Divorce* (1946), viii.
3. Tagai i le *Aoaoga a Peresitene o le Ekalesia: Iosefa Samita* (2007), 266.

Na tusia e Iosefa Samita, ia mea atonu e sili ona musuia o tala faatusipaia o lo tatou tisipenisione i le lotolotoi ma le totonugalemu o se falepuipui laitiiti, eleelea, ma faavaivai loto.



Alofa Mutimutivale FaaKeriso

O le misiona faaletino a le Faaola, ua tatou maua ai ni faataitaiga o le faatinoga o le auala e mafai ai ona tatou maua le alofa mutimutivale.

Saunia e Randy L. Daybell

Tna ua leiloloa i le Perofeta o Iosefa Samita ma Matini Harisi ia itulau e 116 o le faaliliuga o le Tusi a Mamona, sa la mauaina se aoaiga malosi mai le Alii (tagai i le MF&F 3:6–8, 12–13). Na aveesea mai ia Iosefa le avanoa e faaliliu ai mo se taimi ma sa faanoanoa ai i lona le usitai.¹ Ina ua uma ona ia faamaualaloina o ia lava ma aioi atu i le Alii mo le faamagaloga, sa faamautinoa mai e le Faaola ia Iosefa, “Ae ia manatua, ua alofa mutimutivale le Atua; . . . ma ua filifilia pea oe, ma ua toe valaaulia oe i le galuega” (MF&F 3:10).

Na aoao mai Peresitene Dieter F. Uchtdorf, Fesoasoani Lua i le Au Peresitene Sili, e faapea: “O Keriso o lo tatou faataitaiga. I Ana aoaoga [e uiga i le alofa mutimutivale] e pei ona atagia i Lona soifuaga, sa Ia faaali mai ai le ala ia i tatou. Sa Ia faamagalo i tagata leaga, o e le taupulea, ma i latou na saili e faatiga ma faamanua ia te Ia.”²

Ua faaali mai i tusitusiga paia o le alofa mutimutivale o se tasi lea o uiga paia o le Faaola. Na aoao mai Iesu, “Amuia e alolofa atu” (Mataio 5:7), ma le “Ia mutimutivale lo outou alofa, pei ona alofa mutimutivale o lo outou Tama” (Luka 6:36).³ O le Alofa Mutimutivale o lona uiga o le agalelei ma e aofia ai lagona ma galuega agaalofa, agalelei, faamagaloga, ma le alofa. O lo tatou agavaa mo le alofa mutimutivale e masani ona oo mai pe a tatounofouta i tulaga e le masani ai ma le faapopoleina o isi. Na faaalia e Iesu Keriso se gafatia e le i'u o le alofa mutimutivale. Sa le “mafai ona [ia] tagai atu i foliga o tagata e aunoa ma le tiga i lo latou le mautonu, lo latou le malamalama, ma lo latou faanoanoa. . . . Soo se taimi lava na te vaia ai ni tagata ua matapogia ma tuulafoaiina e pei o mamoe e leai so latou leoleo, na ootia lona finagalo i le alofa ia i latou.”⁴

O aoaoga faavae nei mai tala o le Feagaiga Fou o loo faaalia ai le auala na faalautele atu ai e le Faaola le alofa

mutimutivale ma le auala e mafai ona tatou filifilia e alofa mutimutivale atu ai i isi.

Na faaali atu e lesu le alofa mutimutivale e ala i le le tuuaia o isi.


I le Talisuaga Mulimuli, i itula ao lei oo i le faalataina, na talisua faatasi ai Iuta Isakara i le Paseka ma isi au soo. Ina ua fetalai atu Iesu, “E faalataina ai e so outou,” na tuufesili le au soo, na aofia ai ma Iuta, ia te Ia, “O au ea?” (Mataio 26:21–22). Na tali atu Iesu ia Iuta, “O le mea e te faia, ia vave ia ona fai” (Ioane 13:27). Ma i le faitotoa o le Faatoaga o Ketesemane, na toe feiloai ai Iesu ma Iuta. Na faapea mai Iuta, “Rapi e, si ou alofa” ma faafeiloai i le Faaola i se sogi (Mataio 26:49), lea na fesili ai Iesu, “E te faalataina ea le Atalii o le tagata ma le sogi?” (Luka 22:48). O le tali a Iesu, e ui e lei aveesea ai mai ia Iuta ia taunuuga o ana amioga, e lei taoto foi le tuuaiga i ona luga ae nai lo lena o le aioiga ina ia lagona e Iuta le sa'o ma le sese.

Ina ua mavae ona onosaia e Iesu i lima o fitafita Roma le taimi o le faapagotaina, sasaina, sauaina, savalia o le ala i le aai, ma amoina ma le tutuina i fao i se satauro, Na Ia silasila atu ma le alofa mutimutivale i e na pueina o ia ma aioi atu, “Lo'u Tama e, ia e faamagaloia atu ia te i latou; aua ua latou le iloa le mea ua latou faia” (Luka 23:34).

Na faaali atu e lesu le alofa mutimutivale e ala i le filifili e alofa nai lo le faasala.

I le amataga o Lana galuega, na tu ai Iesu e malolo ma ia maua Sona faasiligamalosi i se vaieli i Samaria i se tasi o Ana

“Soo se taimi lava na silasila atu ai [le Faaola] i tagata e matapogia ma tuulafoaia ma faataapeapeina e pei o ni mamoe ua leai le leoleo mamoe, na ootia lona finagalo i le alofa ia i latou.”



THE LOST LAMB, SAUNIA E NEWELL CONVERS WYETH, TOELOLOMINA I LE FAATAGAGA A LE COULBY COLLEGE MUSEUM OF ART

malaga. Sa sau se fafine i le vaieli e utu vai, ma sa fetalai atu le Faaola ia te ia. Na faateia o ia i Lona fetalai atu ia te ia, “aua e leai ni mea e feaveai a Iutaia ma Samaria.” Peitai Na te lei amanaiaina ia aga masani ia na ta’ufaatauvaaaina ai o ia i le vaai a isi tagata. Sa Ia aoaoina o ia e uiga i le vai ola o le talalelei, ma sa Ia molimau atu ia te ia, “O Au lava lenei, o le tautala atu ia te oe [o le Mesia].” (Tagai Ioane 4:3–39.)

I aso faaiu o Lana galuega i Perea, na ui ane ai Iesu i le aai o Ieriko e agai atu i Ierusalema. O se tagata saasaa, mauoa e igoa ia Sakaio na ae i luga o se laau ina ia matamata i le Faaola ao Ia ui ane. Sa silasila atu Iesu ia te ia ma valaaulia o Ia Lava i le pale o Sakaio. Na tomumu nisi o soo o Iesu ina ua latou vaaia lenei mea, ua faapea mai “ua alu atu ia [Iesu] i le tagata agasala e api ai.” Ae na silasila Iesu i le agalelei o Sakaio ma fetalai atu, “Ua oo mai le faaolataga i le aiga nei i le aso ina ua fai o ia ma atalii o Aperaamo.” (Tagai i le Luka 19:1–10.)

Na faaali atu e lesu le alofa mutimutivale e ala i le tuuina atu i isi o avanoa e tele e salamo ai ma ia faamagaloina.

I le amataga o Lana galuega, na toe foi ai Iesu i le sunako o Lona nuu i le aai o Nasareta, lea na Ia tapuai ai i le tele o taimi. Na ia faitau atu ia i latou o e na faapotopoto mai mo le Sapati se valoaga mai ia Isaia e uiga i le Mesia. Ona Ia molimau atu lea ma le manino ia i latou o Ia o le Mesia. O tagata sa i le malumalu sa “faatumuina i le toasa” i Ana upu, ma sa latou “tuli ia te ia i tua o le aai . . . ina ia latou lafo ifo ia te ia” mai le tofē. (Tagai i le Luka 4:16–30.) Na avea uo o Iesu i le olaga atoa ma Ona fili. I se taimi mulimuli ane, na toe foi atu ai Iesu i Nasareta ma aoao atu i tagata. Ma e ui lava ina latou toe feita foi ia te Ia, ae sa Ia taumafai faalua e fesoasoani ia i latou ina ia malamalamā. (Tagai i le Mataio 13:54–57.)

O taitai Iutaia o fili ia na sili ona feita i le Faaola. Sa latou saili e fasioti ia te Ia aua sa lamatiaina e Ia a latou tu ma aga masani. Ae sa faaauau pea ona uunaia i latou e Iesu ina ia salamo ma ia faaleleia i le upumoni. O loo faamaumauina i tusitusiga paia le le itiiti ifo ma le 10 ni lauga tetele na tuusao atu e Iesu i nei taitai, lea na Ia faailoa atu ai a latou agasala ma valaaulia i latou ina ia salamo.

Na faaali atu e lesu le alofa mutimutivale e ala i le aloese mai le [loto] tiga.

O Ierusalema o le nofoaga mulimuli lea na puapuagatia ma maliu ai le Faaola. Na mafai lava ona maua o Ia i le le

fafia ma le ita i le nuu ma ona tagata; ae nai lo lena, sa masani ona Ia faaalia le faanoanoa i lo latou amioleaga ma le mumusu e salamo.

I aso a o lumanai Lona Faasatauroga, na tietie atu ai Iesu i Ierusalema i se asini. Na olioli le motu o tagata o e na mulimuli ia te ia, ma faataatitia o latou ofu i luga o le auala i Ona luma ma vivii atu i le Atua. (Tagai i le Luka 19:28–38.) Peitai na silafia e Iesu o le a le tumau le faamoni o tagata i Ierusalema. A o Ia silasila atu i le aai i le taimi o Lona vaiaso faaiu, na tutulu le Faaola, ma fetalai atu, “Ierusalema e, Ierusalema e, o lē fasiotia perofeta, ma fetogi i maa i e ua aauina atu ia te oe; ua tele lava o’u manao e faapotopoto i la’u fanau, . . . a e lei mafafai outou!” (Mataio 23:37; tagai foi i le Luka 19:41–44).

O nai aso mulimuli ane, na liliu ane ai le motu o tagata ia Iesu ma faatonuina le fasiotiga o Ia. A o taitaieseina atu le Faaola ina ia faasatauroina, “sa mulimuli atu ia te ia le motu o tagata e toatele, ma fafine, . . . ua taufaitaguiti ma taufaitagiaue ia te ia.

“A ua faliu Iesu ia te i latou, ua fetalai atu, Tama fafine a Ierusalema e, soia le tagi ia te au, a ia outou tagi ia te outou, atoa foi ma a outou fanau” (Luka 23:27–28). E ui lava i le tauemuina o Ia i luma o tagata lautele ma mafatiaga matautia faaletagata lava ia i lima o tagata Ierusalema, ae sa lei ita lava le Faaola ia i latou ma sa faaali atu le faanoanoa i lo latou mumusu e salamo.

Na faaali atu e lesu le alofa mutimutivale e ala i le fesoasoani atu i isi e i ai manaoga.

I se tasi o Ana malaga, na afio atu ai Iesu i le aai o Naina, lea na Ia vaia ai “se tagata oti, o le tama e toatasi o ia a lona tina, o ia foi le fafine ua oti lana tane” (Luka 7:12). Na faamatalaina e Elder James E. Talmage (1862–1933) o le Korama a Aposetolo e Toasefululua le vavega na tupu i se taimi mulimuli ane e lei mamao i lana tusi *Jesus the Christ*: “Na silasila atu lo tatou Alii ma le agaalofa i luga o se tina faavauvau, lea ua tuua nei e le tane ma le atalii; ma, na lagonaina e Ia lava le tiga o lona mafatiaga, o lea na Ia fetalai atu ai i se siufogea malu, ‘Aua e te tagi.’ Na Ia pa’i atu i le fata [ma . . .] fetalai atu i le tagata oti ua Ia faapea atu: ‘Le taulealea e, ou te fai atu ia te oe, Ina tulai ia.’ Ma na lagona e le tagata oti Lona siufogea o le Alii o mea uma lava, ma vave ona nofo i luga ma tautala atu. Na tuuina atu ma le agaalofa e Iesu le taulealea i lona tina.”⁵

Na faatinoina e Iesu le tele o isi vavega mo tagata i taimi



Na faatinoina e Iesu le anoanoai o vavega mo tagata i taimi o mafatiaga. Na la faamaloloina se lepela, faatoofilemuina le sami, ma toe faatuina le afafine o Iairo mai le oti.

o mafatiaga. Na Ia faamaloloina se lepela, faatoofilemuina le sami, ma toe faatuina le afafine o Iairo mai le oti. Sa Ia faatoatoaina se tagata ma'i i le taelega i Petesa, le tagata tutuli ma e le lelei lana tautala, ma faamamaina ni lepela e toe 10. Na matuai leai lava se faamoemoe o i latou taitoatasi.

Ua faailogaina e le Faaola le ala e mulimuli ai. E mafai ona tatou taumafai ia alofa mutimutivale e ala i le tuuaia o isi, filifili e alofa atu nai lo le faasala, tuuina atu i isi le tele o ni avanoa e salamo ai, ma aloese mai le le fiafia, ma fesoasoani atu i isi o i ai manaoga. O le tele o lo tatou iloa ma manatua o le anoanoai o alofa mutimutivale ua tuuina mai ia i tatou e ala mai ia Iesu Keriso, o le tele foi lea o lo tatou aoao e faasafua atu le alofa mutimutivale i isi.

Ua fautua mai Peresitene Uchtdorf: "Ua lava le lototiga ma le faanoanoa i lenei olaga e aunoa ma lo tatou faaopoopo atu i ai e ala i lo tatou lotomaaa, lē fiafia, ma le ita. . . . E tatau ona tatou lafoai a tatou faitioga. . . . O le ala lena a le Alii."⁶

Ina ua asiiasi atu le Alii toetu i tagata sa Nifae i Amerika, na Ia aoao atu i tagata. Ma ina ua oo i le taimi e malaga ese ai o Ia, "sa toe silasila solo faataamilo ona fofoga i luga o le

motu o tagata, ma silasila atu ua maligi o latou loimata. . . .

"Ma sa ia fetalai mai ia te i latou: Faauta, ua tumu lo'u loto i le agaalofa ia te outou.

"E i ai ea ni isi o ia te outou ua mama'i? . . . Ia aumai i latou iinei ma o le a ou faamaloloina i latou, ona ua ou agaalofa tele ia te outou; ua tumu lo'u loto *i le alofa mutimutivale*" (3 Nifae 17:5–7; faaopoopo le faamamafa). O Lona alofa mutimutivale e le iu. O le a Ia faamanuiaina i tatou i le meaalofa faalelagi o le alofa mutimutivale pe a tatou o mai ia te Ia (tagai i le Moronae 10:32). ■

E alala le tusitala i Niu Ioka, ISA.

Mo nisi faamatalaga i lenei autu, tagai Dallin H. Oaks, "O Soo o Keriso," *Liahona*, Me 2013, 96.

FAAMATALAGA

1. Tagai i le *Aoaoga a Peresitene o le Ekalesia: Iosefa Samita* (2011), 76.
2. Dieter F. Uchtdorf, "O Le e Alofa Atu e Alofaina Mai," *Liahona*, Me 2012, 76.
3. O le upu Eleni i le Mataio 5:7 o le *eleémón*, o lona uiga o le *aga-alofa*. O le upu Eleni i le Luka 6:36 o le *oiktirmón*, o lona uiga foi o le *agaalofa*.
4. Charles Edward Jefferson, *The Character of Jesus* (1908), 154.
5. James E. Talmage, *Jesus the Christ*, 33rd ed. (1977), 252.
6. Dieter F. Uchtdorf, "O Le e Alofa Atu e Alofaina Mai," 76–77.

E Faapefea ona Faamautuina Aoaoga Faavae?

Saunia e LaRene Porter Gaunt

Mekasini a le Eklesia

*E oo mai aoaoga
faavae i aso nei
e pei ona sa i
ai anamua—e
ala mai i se faa-
aliga faalelagi i
perofeta.*

Le avea ai ma Au Paia o Aso e Gata Ai, “matou te talitonu i mea uma na faaalia mai e le Atua, ma mea uma ua ia faaali mai nei, ma matou te talitonu foi o le a Ia faaalia mai le tele o mea silisili ma le taua tau le Malo o le Atua” (Mataupu Faavae o le Faatuatua 1:9).

O le sootaga i le va o le faaaliga ma aoaoga faavae, na saunoa ai Elder D. Todd Christofferson o le Korama a Apostetolo e Toasefululua e faapea, “I le Eklesia i aso nei, e pei foi o anamua, o le faamautuina o le aoaoga faavae a Keriso po o le faasa’oina o aoaoga faavae sese o se mataupu lea o faaaliga faalelagi ia i latou ua faaee i ai e le Alii le pule faa-apostolo.”¹

E pei lava ona avea faaaliga ma auala e oo mai ai aoaoga faavae i perofeta, tagata-vaaai, ma talifaaaliga, e mafai foi e i tatou

taitoatasi ona maua a tatou lava faamaoniga i le moni o aoaoga faavae o le talalelei a Iesu Keriso. O lenei faaaliga faaletagata lava ia e oo mai e ala i le tatalo, suesue i tisutusiga paia, ma le molimau a le Agaga Paia. Tatou te faaali atu tatou te taliaina le aoaoga faavae a Iesu Keriso e ala i le salamo, i le papatisoina, mauaina o le meaalofa o le Agaga Paia, ma faaauau pea ona mulimuli i tulafono ma tausi feagaiga o le talalelei i o tatou olaga ataoa.

O le siata faasolo lenei, e faatatau lea i le saunoaga a Elder Christofferson i le konafesi aoao ia Aperila 2012, o loo faailoa atu ai le ala e faavae ai se aoaoga faavae.² ■

FAAMATALAGA

1. D. Todd Christofferson, “O Le Mataupu Faavae a Keriso,” *Liahona*, Me 2012, 87.
2. Tagai D. Todd Christofferson, “O Le Mataupu Faavae a Keriso,” 86–90.

O Le Au Peresitene Sili



O Le Korama a Apostetolo e Toasefululua



O LE FAAALIGA O AOAOGA FAAVAE E OO MAI MAI IA IESU KERISO

Pe afai o le faaaliga o le aoaoga faavae mo le Eklesia atoa, e na o le Au Peresitene Sili ma le Korama a Aposetolo e Toasefululua e oo mai i ai (tagai i le Amosa 3:7; MF&F 1:38; 28:2).

E OO MAI FAAALIGA E ALA I ...

LONA LAVA AFIO MAI

Na faaali atu le Atua ia Mose, ma faasino atu ia te ia galuega a Ona lima (tagai i le Mose 1:1–9; tagai foi i le Iosefa Samita—Talafaa-solopito 1:15–20).

LONA LAVA SIUFOFOGA

Na fetalai mai le Alii ia Nifae ma poloaiina o ia e fau se vaa e ave ai lona aiga i Amerika (tagai i le 1 Nifae 17:7–8).

I LE SIUFOFOGA O LE AGAGA PAIA

O lenei ituaiga o faaaliga e fesootai atu le Agaga i le agaga. O Aposetolo o le Feagaiga Fou na mauaina se faamaoniga e ala i le Agaga Paia e le tatau ona latou faamalosia ni tagata fou liliu mai e tausia le tulafono a Mose (tagai i le Galuega 15:5–29).

AVEFEAU

Na faaali mai ia avefeau o Mose, Elaia, ma Elia ia Iosefa Samita ma Oliva Kaotui ma tuuina atu ki o lona tisipenisione i le Perofteta (tagai i le MF&F 110:11–16).

E OO MAI FAAALIGA I ...

LE PERESITENE O LE EKALESIA LAVA IA

O le perofeta ma le Peresitene o le Eklesia e mafai ona maua se faaaliga faaletagata lava ia e avea ai ma aoaoga faavae pe a lagolagoina e ala i le finalo autasi o le Au Peresitene Sili ma le Korama a Aposetolo e Toasefululua (tagai i le Galuega 10; Tautinoga Aloaia 2).

PEROFETA O LOO GALULUE I AUFONO

Sa tatalo le au soo i Amerika ia iloa po o le a le igoa e tatau ona faaigoa ai le Eklesia. Na faaali mai Keriso ia i latou ma tali mai, "O lea, soo se mea tote faia, ia outou faia i lou igoa; o lea ia outou faaigoa ai le eklesia i lou igoa" (3 Nifae 27:7).

*O faataitaiga amiontu e
mafai ona faamanuiaina
tele ai le tupulaga i se tasi
o tulaga e sili ona ogaoga
o o latou olaga.*



E MANAOMIA E ALII TALAVOU O ASO NEI NI

Faataitaiga Amiotonu

Saunia e Hikari Loftus

Mekasini a le Ekalesia

Ile aoga mauauluga, sa i ai ni sini se lua a Todd Sylvester: ia maoae i le pasiketipolo ma ia tautaua i le aoga o le tagata e sili ona fiafia e pati.

I le 14 o ona tausaga, sa amata ai e Todd ona inupia ma faaaoga fualaau faasaina. Sa le o ia o se tagata o le Ekalesia, ma sa le'i aoaoina o ia e ona matua "i soo se auala" e faatatau i lana amio, e pei ona ia faamatalaina ai. I le aluga o tausaga, sa faatamaia ai e lana vaisu o fualaau faasaina ma le inupia ia lana matata o le pasiketipolo lea sa faapea e faamanuiaina ai ma auina atu ai o ia i lalo i se ala na tuua ai o ia e mafaufau e pule i le ola.

O le mea e leaga ai, o elemene o le tala a Todd e mafai ona vaaia i olaga o le toatele o alii talavou i aso nei, e oo lava foi i tagata o le Ekalesia. Ae peitai, e i ai se mea e le'i i ai ia Todd o loo i ai i alii talavou o le Ekalesia: o ni faataitaiga amiotonu. O taitai matutua o le Ekalesia e mafai ona avea ma se faamanuiaiga tele i le tupulaga i se tasi o tulaga e sili ona ogaoga o o latou olaga. Ona o le tulaga sa i ai lona olaga, o Todd, o lē sa auai i le Ekalesia i le 22 o ona tausaga, ua taumafai nei ia avea ma se faataitaiga lelei i le autalavou o lana uarota.

O le liliuga o Uso Sylvester na oo mai i lona taimi sa sili ona pogisa, sa ia faia ai se tatalo faatauvaa: "Le Atua, ou te manaomia se fesoasoani." O se masina ma le afa mulimuli

ane, sa valaau atu ai ia te ia se uo ua leva, o se tagata o le Ekalesia, ma fai atu, "Todd, na ou lagona le musuia e fai atu ia te oe matou te manaomia oe i le matou au. . . . O le a e fesoasoani i ni tagata se toatele, ae maise lava o le autalavou ma tamaiti."

O ni nai tausaga mulimuli ane, ina ua uma lona papatisoga ma le faaipoipoga i le malumalu, na valaauna ai Uso Sylvester e auauna atu i le polokalama a Alii Talavou—o se valauga o le a taitai atu ai o ia e auauna atu i alii talavou mo le 14 tausaga.

O le faaaogaina o lona tuanai e fai ma uunaiga e fesoasoani ai i alii talavou sa valaauna ai o ia e auauna atu i ai, sa maua ai e Uso Sylvester se auala e faatatau atu ai i tauiviga sa ia vaaia e aafia ai nei alii. "Ou te manatu o le toatele o tamaiti e fefefe e talanoa e uiga i ai pe a latou feagai ma tauiviga," o lana tala lea. "Ae sa ou faasoaina atu la'u tala ma nei tamaiti i tausaga uma lava. Ou te manatu ona o lena mea, latou te lagona ai le toafimalie e o mai ai ia te au ma fai mai, 'Ei, o loo o'u tauivi ma ponokalafi po o le inupia, po o mafaufauga e pule i le ola.'" E lagolago e Uso Sylvester i latou a o latou galulue i le salamo, lea e aofia ai feiloaiga ma le epikopo.

O taitai o e faalogo ma tuuina atu le tali alofa i le autalavou i taimi faigata, e mafai ona fatuina se fesootaiga malosi lea e fesoasoani e mamanu ai le faasinomaga o se tagata

talavou. Fai mai, Mat Duerden, o se polofesa lagolago i le Iunivesite o Polika Iaga o le na maua lona PhD i le atinagega o le autalavou, “O tausaga i le olaga talavou o le [taimil] e atiae ai e [tagata taitoatasi] se lagona o le faasinomaga patino: tulaga faatauaina, talitonuga, tiute, ma isi. O se faagasologa suesue lena. O se vaega o lena faagasologa o le maua mai o manatu faaalia mai tupulaga po o matua po o isi tagata matutua, ma e mafai ona matuai mamana pe afai o se tagata matua faaaloalogia ma faatauaina.”

Na faaauau le faamatalaga a Uso Duerden, “O matafaioi faafaufautua e sili ona aoga e fausia i luga o le vafealoaloai tutusa mo le tasi i le isi ma le lagonaina e le autalavou e faapea, o loo i ai se tagata e alofa moni ia te ia e tusa lava pe o a ona ofu e fai ma ana tala e fai.”

“O le toatele o tama e moomoo ia i ai se mafutaga ma o latou tamā,” o le tala lea a Uso Sylvester. “Afai latou te le maua lena mea, o le isi mea sili ona lelei e sosoo ai o le mafai lea ona i ai o se alii matua e mafai ona latou talanoa i ai, lafo atu i ai manatu, ae e le faamasinoina, ulagia, pe faitioina ona o o latou faafitauli. Ou te le’i i ai iina e suitulaga i o latou tamā, ae sa ou manao e i ai iina ina ia

“E taua le i ai o aafiaga tutusa ma le autalavou ina ia e i ai i le malae taalo e tasi. Nai lo le tutu i autafa o le laina, e manao-mia lava lou auai ma le punouai. O loo i ai le malosiaga moni i aafiaga e fefaasoai.

“E tatau i tagata uma o le Ekalesia ona auai punouai ma le autalavou, e tusa lava po o a o latou valaauga.”

**Mat Duerden, polofesa lagolago,
Iunivesite o Polika laga**

mafai ona latou talanoa mai ia te au i se auala lelei.”

E ui o taitai matutua o le Ekalesia e mafai ona faia se matafaioi taua i le fesoasoani lea e faufautua ma taiala se talavou, ae ua saunoa mai perofeta ma aposetolo, o faataitaiga muamua lava mo le autalavou o o latou matua. Mo se faataitaiga, na saunoa mai Elder M. Russell Ballard o le Korama a Aposetolo e Toasefululu e faapea: “Tama, o outou o faataitaiga autu o le tulaga faatamatane mo ou atalii. O oe o le latou uo ma le taitai e sili ona taua, ma talitonu i ai pe leai, o oe o le latou tama autu i le anoanoai o itu. O au upu ma au faataitaiga o se faatosinaga tele lea ia i latou” (“Tama ma Atalii: O Se Mafutaga Tulaga Ese,” *Liahona*, Nov. 2009, 47).

E leai ma se tasi o sootaga malolosi na fatuina e Uso Sylvester ma alii talavou na vave tupu; sa tatau ona ia atiaeina na sootaga i le gasologa o tausaga o auaunaga. O le 20 o alii talavou sa ia aoaoina, e 17 sa o e fai ni misiona. E le ititi ifo ma le toa 5 o nei alii sa leai se faamoemoe e auauna atu a o le’i fegalegaleai ma Uso Sylvester.

“O le mafuaaga na tele ai lo’u faamanuiaina i nei alii ona, sa latou iloa sa matuai ou alofa ia i latou,” o le tala lea a Uso Sylvester. “Sa latou iloaina—e le ona sa ou fai atu i ai ae ona sa ou faaali atu i faatinoga. Sa matuai ou taulai atu i lo latou mauaina o se sootaga ma lo latou Faaola. Sa ou lagonaina o le ki lena mo i latou e sao ai mai mea uma ma ia agai ai i luma i le olaga ma ia faamanuiaina.”

O le fesoasoani atu i nei alii talavou e atiae se sootaga ma le Faaola, ua faamoemoe ai Uso Sylvester o a latou molimau o le a taitai atu ai i latou i le faia o ni misiona, faaipoipo i le malumalu, ma le tausia o se aiga amiontonu. “O le fuafuaga lena o le fafia,” o lana tala lea. “O le mea lena e taua ai le [fesoasoani i le autalavou].” ■



TALA FAAMANUIAINA

O alii talavou o loo ta'ua i lalo sa ia i latou ni tagata sa avea ma ni faataitaiga lelei o e sa faia se eseesega i o latou olaga.

Ou te Le'i Toe Misia Lava se Sauniga Faamanatuga

Ile avea ai ma se talavou, sa ou oo ai i tofotofoga masani o talavou o na vaitausaga. Ma le isi, sa i ai so'u tamā sa le malosi i le Eklesia, ma sa na o lo'u tina lo'u sootaga ma le talalelei. E ui atonu ou te le'i iloina, ae sa ou manaomia se tagata e umia le perisitua e faataitai i ai.

Sa tuu mai e le Tama Faalelagi i lo'u ala se alii o lē, e oo mai i le asō, o loo faatinoina pea ni faatosinaga maoae ia te a'u. O lona igoa o Paulo César dos Santos.

Ou te manatua se tasi o Aso Sa na ou le fia alu ai i le lotu. Sa ou manao i lo'u tina e tuua au i le filemu. Sa ou fai atu ia te ia e muamua atu i le lotu ae o le a ou sauni ona ou alu atu mulimuli ai lea. Ou te le'i alu ae sa ou nofo i le fale ma matamata se tuuga sa sau i le televisé. Ae peitai, ina ua mavae sina taimi, sa ou faalogoina le leo masani o Epikopo Paulo o taufonō mai i le faitotoa. Sa ia talanoa mai ma le faapalepale ia te a'u, ma sa ou alu atu ma le musuā i le sauniga faamanatuga.

O lenei aafiaga sa i ai se taunuuga tumau ia te a'u, ma talu mai lena aso ou te le'i toe misia lava se sauniga faamanatuga.

Vinicius Elias Barbosa Jardim, São Paulo, Pasila



Sa la Vaai Mai ia te A'u o se Atalii o le Atua

Ilo'u olaga talavou atoa i Misuri, ISA, sa avea ai Blaine Bartholomew, o se sui o le au peresitene o Alii Talavou a le siteki, ma se uo lelei ia te au i gaoioiga. Ae peitai, ou te le'i faatauaina lava lana faauoga po o ana fautuaga. Ae ana le atoa lava lo'u 18 e le amata moni ona i ai se sootaga loloto atu. Sa ia vaai mai i lo'u tauivi ma faaauau ona ou pau, ma i le avea ai ma o'u epikopo i le taimi lena, sa tau-mafai ai o ia e fautuaina a'u ma toe taitai mai a'u i le ala o le amiontonu. Sa iu ina ou pau atu i fualau faasaina ma le ava malosi, ma ina ua ou siitia ese, sa faaauau pea ona ou uia lena auala tifato.

Ina ua ou toe foi mai i le fale, sa ou manatua Blaine ma lona alofa ia te a'u. Sa ia faaaauauina ma le naunautai lena faauoga ma fai a'u ma se vaega o lona aiga. Sa le gata ina avea o ia ma se uo ae sa avea foi ma se tamā lona lua. E tele taimi sa ou onā ai pe oo foi i faatosinaga a fualau faasaina, ae sa ia tausia lava au.

Ua ou matua nei ma teufatuina le ma mafutaga ma Blaine. O lana faamalosiau, alofa, ma le lagolago faifaipea sa sili atu ona taua nai lo le mea e mafai ona ia iloa. Na te le'i masalomia lava lo'u gafatia i le avea ai ma se atalii o le Atua. O le taimi nei o loo ou taumafai e faatoilalo a'u agasala ma le faamaualuga ma ua ou latalata atu lava i le osia o feagaiga ia sa ou le mafaufauna o le a mafai ona ou faia. Ou te faafetai ona sa saunia e le Tama Faalelagi se alii faapenei e fai ma se faataitaiga mo a'u.

Ua taofia le igoa, luta, ISA

Avea Pea OSE VALAAU MALOSI

Ua tautino mai e perofeta ma aposetolo e faapea. “O Le Aiga: O Se Folafolaga i le Lalolagi” ua sili atu foi le taua i aso nei nai lo le taimi na tuuina muamua mai ai.

Saunia e Richard M. Romney

Mekasini a le Ekalesia

I se lalolagi lea ua lamatia ai faaipoipoga ma osofaia ai aiga masani, e tasi se faamauga patino ua tuuina mai ai le manino ma le taitaiga. Ua saunoa perofeta ma aposetolo e faapea, “O Le Aiga: O Se Folafolaga i le Lalolagi” e tutusa lava pe ua sili atu foi le faatatauga i aso nei nai lo le taimi sa tuuina mai ai i le 1995.¹

O Se Tagavai o le Saolotoga i Onapo Nei

O le folafolaga i le aiga ua tumau pea ona avea “ma se valaaau malosi e puipui ma faamalosia aiga,” o le saunoaga lea a Elder M. Russell Ballard o le Korama a Aposetolo e Toasefululu.²

O le tatou lalolagi ua tutusa lava ma le nuu o sa Nifae lea sa atili faasolo ina amioleaga i le Tusi a Mamona, ma ua uunaia e Elder Ballard le Au Paia o Aso e Gata Ai ia “fai [le folafolaga] ma se tagavai ia pei o le ‘tagavai o le saolotoga’ a le Taitaiau o Moronae, ma ia tautino atu o tatou tagata ina ia ola ai i ona mataupu.”³

Taua Tele i le Fiafia

E tele auala eseese i le fiafia ua faalauihoa mai e le lalolagi. Ae ua folafola mai e perofeta o aso nei e faapea, o auala aupito silisili e maua ai le fiafia o loo i ai lea i le faaipoipoga faaselesitila.⁴

Afai tatou te ola ma galulue e tusa ai ma lo tatou malamalamaaga e faapea e mafai ona faavavau aiga, ua folafola mai e Elder Ballard, “o le a tatou faatosina maia le lalolagi ia i

tatou. O matua e tuu se faamuamua maua-luga i o latou aiga o le a agai mai i le Ekalesia. . . .

“O la tatou vaaiga e faatotonugalemu i le aiga, e tatau ona faia ia tauivi ai le Au Paia o Aso e Gata Ai ia avea ma matua e sili ona lelei i le lalolagi. E tatau ona tatou maua ai se faaaloalo tele mo a tatou fanau, o e moni o o tatou tei faaleagaga, ma e tatau ona afua ai ona tatou tuuto atu soo se taimi e manaomia e faamalosia ai o tatou aiga. O le mea moni lava, e leai se mea e sili atu ona taua lona fesootai i le fiafia—e le gata mo tatou ae faapea i a tatou fanau—nai lo le lelei o le tatou alolofa ma lagolago le tasi ma le isi i totonu o le aiga.”⁵

Malosi e sili atu nai lo Lou Lava [Malosi]

Ua fautuaina e Elder Ballard ia aiga i soo se mea ia i ai se kopi o le folafolaga ma ia faaogatasi i latou lava ma ona aoaoga.

“Ia avea ma tagata e sili atu ona lelei ma ia galue i le mea sili e te mafaia. O le a tuuina atu e le Atua ia te oe le malosi e sili atu nai lo lou lava malosi a o e taumafai i aso taitasi e faataunu ia tiutetauave faaleolaga nei e aupito sili ona paia ua Ia tuuina mai i Lana fanau. Faalogo i le leo o le Agaga ma fautuaga a perofeta soifua. Ia outou lototetele. E le’i tuuina mai oe e le Atua i luga i le lalolagi ina ia toilalo, ma o au taumafaiga i le avea ai ma matua o le a le faitaulia o ni toilalo sei-loga lava ua e fiu.”⁶



S u'e ma faasoatatu le folafolaga i le aiga i le [lds.org/topics/family](https://www.lds.org/topics/family).

Faamoemoe mo le Ola Faavavau

Ua aoao mai le folafolaga i le aiga e faapea o aiga e mafai ona tumau e faavavau. Ua aoao mai Elder Russell M. Nelson o le Korama a Apostolo e Toasfululua e faapea “e ui o le faaolataga o se mataupu e patino i le tagata, ae o le faaaeaga o se mataupu faaleaiga. . . . A faamauina se aiga i le malumalu, e mafai ona faavavau lena aiga e pei foi o le malo o le Atua lava ia.”⁷

Ua faamalamalama mai e Peresitene

Henry B. Eyring, Fesoasoani Muamua i le Au Peresitene Sili e faapea, o o tatou aiga ‘o le iunite faavae e le gata i malo ma le Ekalesia, ae faapea foi i lo tatou faamoemoe mo le ola e faavavau.”⁸

O Se Lapataiga ua muamua mai i Lona Taimi

Ua lapatai mai Peresitene Eyring, o tau-nuuga o le le amanaiaina o aoaoga i le folafolaga i le aiga, “o le a sili atu ona matautia nai lo le leai o se filemu i lenei olaga po o le leai foi o se fiafia.”⁹

Fai mai a ia, o le folafolaga e faaperofeta, aua ua lapatai mai ai ia tetee i mea tonu lava ua faavaivai aia aiga i tausaga e le'i mamao atu. Ua ia sii mai le lapataiga faaperofeta ma le valaau ia faatino lea o loo faai ai le folafolaga:

“Matou te lapata’i atu o tagata taitoatasi o ē ua solia feagaiga o le ola mama, o ē faasaunoa i taitoalua po o fanau, o ē ua faatalalé i le faataunuina o tiutetauave faaleaiga, o le a i ai se aso tou te tutū atu ai e tali atu i luma o le Atua. E le gata i lea, matou te lapata’i atu foi, o le faamalepeina o le aiga o le a aumai ai i tagata taitoatasi, alaalafaga, ma malo, faafanoga ia na ulua’i ta’u mai e perofeta anamua ma aso nei.”¹⁰

O Se Pepa o Faamatalaga Faavaomalo

Ina ua faalauiola mai e Peresitene Gordon B. Hinckley (1910–2008) le folafolaga i le aiga i le fonotaga aoao a le Aualofa i le aso 23 o Setema, 1995, sa ia saunoa ai o lona faamoemoega ina ia “lapatai ma muai lapataia”¹¹ le lalolagi mai le o ese mai tulaga faatonuina [o le aiga]. Talu mai lena taimi, ua faapea ona lolomiina ma faasalalauina ai le pepa o faamatalaga i le tele o gagana, ua faafia ona talanoaina i konafesi aoao, ma ua faaalia i falelotu ma aiga i le lalolagi atoa. O se folafolaga faaperofeta ua tuuina mai e se Tama Faalelagi alofa e aumai ai le taitaiga i Lana fanau—le taitaiga lea sa leai se isi taimi ua sili atu ai ona manaomia nai lo le taimi nei. ■

FAAMATALAGA

1. Tagai M. Russell Ballard, “O Le Mea E Sili Ona Taua e Sili Atu Foi Ona Umi,” *Liahona*, Nov. 2005, 41.
2. M. Russell Ballard, “O Le Mea E Sili Ona Taua e Sili Atu Foi Ona Umi,” 41.
3. M. Russell Ballard, “O Le Mea E Sili Ona Taua e Sili Atu Foi Ona Umi” 42.
4. Tagai Russell M. Nelson, “Faaiipoipoga Faaselesita,” *Liahona*, Nov. 2008, 92–94.
5. M. Russell Ballard, “O Le Mea E Sili Ona Taua e Sili Atu Foi Ona Umi,” 42.
6. M. Russell Ballard, “O Le Tiutetauave Paia o Matua,” *Liahona*, Mat. 2006, 17.
7. Russell M. Nelson, “Faaiipoipoga Faaselesita,” 92, 93
8. Henry B. Eyring, “O Le Aiga,” *Liahona*, Oke. 1998, 23.
9. Henry B. Eyring, *Liahona*, Oke. 1998, 23
10. “O Le Aiga: O Se Folafolaga i le Lalolagi,” *Liahona*, Nov. 2010, 129.
11. Gordon B. Hinckley, “Ia Tu Malosi e Tetee atu i Togafiti a le Lalolagi,” *Liahona*, Ian. 1996, 119.

O LE LAUGA I TUA ATU O LE PULELAA

Ao nonofu lou aiga i nai atulaina i tua atu o tiakono i se tasi sauniga faamanatuga, na pau lava le mea na ou mafaufau i ai ao lei usuina le pese amata o se tasi o tiakono e lei seleina faalelei lona fusiua umi, ma le le sao o le tuuina i totonus o lona ofutino maanuminumi. Sa ou mafaufau e tatau i se tagata ona fesoasoani ia te ia. Aua o le mea moni lava, a o tufaina le faamanatuga, o tiakono e tatau ona avea ma faaa'oa'o le o Faaola i le faatinoga ma laei.

Na faaauau le sauniga, ma na galo o ia ia te au. Ina ua uma ona tufa e le au tiakono le faamanatuga, sa amata loa lauga. O le failauga lona lua o le tina o le alii talavou lea. Sa ia lauga i lona liliu mai, i ona tofotofoga i le tuputupu ae, ma ona tauiviga i

le avea ai ma se tina nofofua. O se lauga matagofie lea na tuua ai o ia i loimata. Sa ia nofo i lona nofoa i le tulaga ma faaauau pea ona tagi ao faapotopoto le aufaipese o le uarota e pepese.

I lena lava taimi, sa tu ai i luga lana tama ma lona fusiua pio ma lona ofutino o loo tautau mai i fafo, ma savali atu i le tulaga. Sa ia opoina mai lona tina ma faapupu atu i ona autafa e faamafanafana ia te ia. Na oo mai loimata i ou mata ao faatino mai lenei mea i ou luma; sa ou lagona le ootia ma lē magagana. Ona gafoa ae lea o se malamalama, ma sa punou ifo lo'u ulu. I le saofai ai ma lo'u peleue mafolafola e lua itu, faatasi ai ma lo'u fusiua ua lelei le seleina ma seevae uli ua uma ona polesi, sa ou iloa ai

lou matuai misia lava o se mea i le saunia ai mo le faamanatuga.

Na o mai i lalo mai le tulaga le alii talavou ma lona tina ma nonofu faatasi a o amata ona usuina e le aufaipese le pese. Sa ou saofai ai iina, na le mafai ona ou faalogologo i le musika, aua o le lesona na aoao mai e lenei tiakono na faatumulia ai lo'u loto i se savali o le alofa faa-Keriso.

Sa ia faatinoina lana galuega ma le faapelepele ma le alofa. E lei i ai ma sina faailoga o le mā i ona foliga talavou—na o le alofa mama lava. O savali na sosoo ai i luga o le pulelai i lena aso sa lelei, ae o le a ou manatua pea le lesona i tua atu o le pulelaa. ■

Jeff Fullmer, Idaho, ISA

Faatasi ai ma lona fusiua pio ma lona ofutino sa tautau mai i fafo, sa tula'i o ia ma savali atu i luga o le tulaga. Na ia opoina lona tina ma faapupu atu i ona autafa e faamafanafana atu ia te ia.



TIAKONO FOU E TOALUA

Oni nai tausaga ua mavae, sa ou maua ai le avanoa e auauana atu o se faufautua o le korama a tiakono. I la matou korama sa i ai ni tiakono toaaga e tolu, na valaauna i latou uma e avea ma se vaega o le au pere-sitene o le korama.

I se tasi o a latou fonotaga, sa filifili ai lenei au peresitene talavou latou te mananao ina ia le itiiti ifo ma le toalua ni tiakono e le toaaga i le latou korama ia amata ona auai i sauniga Lotu ma gaoioiga. Sa latou faatulagaina ma le agaga tatalo se aso—o se Aso Sa e ono vайaso le mamaao—lea ia ausia ai la latou sini. Sa latou tatalo mo le manuia o lenei taumafaiga paia ma tuuto atu ma le agaga tatalo ina ia faia mea nei:

- Tatalo faatasi e le aunoa.
- Anapopogi faatasi.
- Asiasi i tiakono taitasi o loo i le tauvalaauga.
- Fuafua gaoioiga, ina ia mafai ona ulufale atu se tiakono e toe foi mai i se polokalama e lelei le faatulagaina.

Na maua e le au peresitene se lagona loloto e faapea, o nei sini o le finagalo lea o le Alii, ma o lea sa latou agai ai loa i luma i le faatuatua ma le mautinoa.

I le aluga o vaiaso na sosoo ai, na faia ai e nei alii talavou e toatolu mea na latou folafola atu, ma faamoemoe o le a tali mai a latou tatalo. Sa latou tatalo faatasi, anapopogi faatasi, asiasi atu i tiakono le toaaga ma valaaulia i latou e toe foi mai, ma saunia ni gaoioiga, ma talitonu e tatau ona latou saunia mo le faateleina o le auai.

E ui lava i lo latou maelega, e leai ni tiakono na toe foi mai—i le lotu po o soo se isi gaoioiga lava. Na lata mai le aso, ma e ui sa latou le fiafia i le le foi mai o tagata o lo latou korama i le lotu, ae na tumau pea le faatuatua o alii talavou o le a tali mai e le Tama Faalelagi a latou tatalo.

Na oo mai ai le Aso Sa tuupoina o le latou sini, ma e leai se tasi o alii talavou ia na aapa atu i ai le au pere-sitene na o mai i le lotu. Ae na folafola mai e le epikopo i le taimi o le sauniga faamanatuga e toalua ni alii talavou e tai 12-tausaga-le-matutua o


e na sailili i le Ekalesia o le a papati-soina i lena afiafi.

Oka o se faamanuiaga mo nei tagata fou o le Ekalesia e toalua e auai atu i se korama o i ai sea ituaiga au peresitene. Ma o se faamanuiaga mo le au peresitene le vaaia o le tuusao mai o tali ia latou taumafaiga ma tatalo ma le iloaina e tausia e le Alii Ana folafolaga.

O se ituaiga fiafiga lea na i ai i totonu o le korama lea na fai mai ai se tasi o sui o le au peresitene, “Sei o tatou toe faia lenei mea.” ■

Anthony Poutu, Niu Sila

I le aluga o vaiaso
na sosoo ai,
na tatalo faatasi
nei alii talavou e
toatolu, anapo-pogi faatasi, ma
valaaulia tiakono e
le toaaga ina ia toe
foi mai i le lotu.



O LE ALOFA O LE TAMA FAALELAGI

se taimi ua mavae atu, sa talosaga mai ai ni a ma uo pe mafai e lo la atalii o Ioane, ma lana uo teine ona nonofo i lo matou fale mo se vайaso e asiаi mai ai. O Ioane e le toaga i le lotu, ae o lana uo teine e le o se tagata o le Ekalesia. Sa ma tuuina le teine i le potu o le ma tama tama ae tuu Ioane e moe i le nofoa umi i totonu o le potu malolo.

A e la te lei taunu mai, na ma tatalo i le Tama Faalelagi, ma fesili i ai pe faapefea ona ma faailoa atu i maua ia i laua — pe o ni faiaoga, matua, pe tau lava o ni uo? Na oo mai le tali e manaomia ona ma mulimuli i musumusuga a le Agaga ma fesoasoani ia i laua faaleagaga.

O afiafi uma lava matou te saofafai ai i lalo ma lou toalua, le ma atalii,

ma suesue i tusitusiga paia. O le afiafi muamua ma o matou malo, na matou lagona ai e le tatau ona valaaulaina i laua matou te suesue faatasi. Ae o le afiafi na sosoo ai a o le'i faia ia suesuega o tusitusiga paia, na tuitui mai Ioane ma le matamuli i lo ma faitotoa ma fai mai, "E fefe Maria e fesili atu, ae sa ia fia iloa pe mafai ona ma faatasi atu ia te outou."

Na matou tatalaina le faitotoa, valaaulaina i laua e o mai i totonu, ma amata ona suesue faatasi i le Tusi a Mamona. E lei faitau muamua lava Maria i ni tusitusiga paia ma e na te le iloa pe na te talitonu i le Atua. Sa ia ta'u sao mai lava ina ua oo mai i lo matou fale, sa fefe nei matou taumafai e faaauai o ia i se mea faalelotu na te le malamalama i ai.

Ina ia faato'afilemuina ia Maria, sa faamatala atu e lo'u toalua ia te

ia le ata o le faaolataga, le Faaola o Iesu Keriso, le Uluai Faaaliga a Iosefa Samita, ma le Tusi a Mamona. Sa matou talatalanoa seja oo i le vaeluapo.

O le aso na sosoo ai, na matou faatasi ma Ioane ma Maria e talatalanoa ma faifeautalai. O le a le galolava ia te au le agaga na faatumulia ai le potu. Ina ua maea se talanoaga faigofie, sa matou talanoa e uiga i le natura o lo tatou Tama Faalelagi. Ona fesili mai lea o Maria pe aisea e faataga ai e le Atua mafatiaga pe afai e alofa o Ia ia i tatou, o se fesili lea sa ou mafaufau loloto i ai mo se taimi umi.

I ni nai aso ua mavae atu na ou mauaina ai se tusi mai se uo o lē na faatolu ona faaletonu ona ma'itaga, ma o le fesili a Maria na ou ootia ai. Ou te molimau atu e le tutusa le loloto ma le faavavau o le aoaoina o i tatou i nisi taimi e le fiafia ma le olioli nai lo taimi o faalavelave faaletagata lava ia. Sa ou ta'u atu ia Maria e mafai ona faamalosia e le faanoanoa i tatou e pei foi ona faia e le afi i le uamea. Afai tatou te tumau faamaoni i le Atua ao tatou uia tofotofoga, o le a tuputupu ae lo tatou faatuatua.

O se talanoaga sa le mafaagaloina. Mulimuli ane na matou nonofo le leoao molimau mai le Agaga i le alofa o lo tatou Tama Faalelagi. Ina ua ea ae i luga ia Maria, na susulu ma loimatā ona mata.

Ou te le iloa se mea o le a tupu i tau-saga a sau, ae ou te iloa ma le mautinoia o le malamalama sa ou vaaia i mata o Maria i lena aso, o le a fesoasoani ia te ia i lona olaga atoa ma atonu o le a fesoasoani e taitai atu o ia i lona Tama Faalelagi. ■

Ana Nikiticheva, Rusia



NA IA FAAMANUIAINA AU NOTA LE LELEI

Na momu sesega ou taliga i le maasiasi ina ua uma ona ma usuina ma lou atalii talavou o, Derek, le pese “Be Still, My Soul”¹ i le sauniga faamanatuga. E lei lelei le sauniuniga o lou leo ao lei amataina le sauniga, ma o le taunuuga la, ina ua ou taumafai e usu se nota mauluga, na matuaita'e lava lou leo.

Sa ou toe nofo ifo i lou nofoa, ma lagona o le le mautonu e ui i foliga ataata ma le lagolagosua mai o lo'u toalua, ma faamautinoa mai ia te au ou te lei aveesea le agaga o le sauniga.

Ina ua maea le tatalo faaiu sa ou agai atu i la'u taavale e aumai se tusi lesona. Sa tu i autafa o le faitotoa se tamaitai o le matou uarota, o loo masūsū. Sa fesoasoani atu sana uo ia te ia i le tuu o lona lima i lona tauau. A o ou ui atu i autafa, sa valaau mai lou igoa e le tamaitai lea na tagi ma faailoa mai lona agaga faafetai ia te au mo le filifilia o le pese na ma usuina ma le ala na usuina ai lea na matuaoitia ai lava o ia.

Sa ia faamatala mai sa fanau le au lana pepe i nai aso ua mavae, ma sa ia tauivi ai ma le ita ma le faanoanoa talu mai lena taimi. A o ma usuina ma Derek le pese, sa ia lagonaina le au'iina o lona agaga ootia e le Agaga i se faamafanafanaga toofilemu ma le faamafanafana loto. Na faatumulia o ia i le faamoemoe na ia manaomia e tauave ai lona satauro o le faanoanoa.

Sa ou memumemu atu ma le le to'alelei le faafetai ma agai atu i le faitotoa, ma le lagona faamanuiaina ma le faamaualalo ona o ana upu. Ina ua ou oo atu i le taavale, sa ou manatua se lauga i se faigalotu na saunia e Kim B. Clark, o le

peresitene o le Iunivesite o Polika Iaga—Idaho. Na ia faapea mai, “A tatou galulue i le faatuatua ia [Iesu] e fai Lana galuega, tatou te o faatasi ma Ia” e auauna atu i isi ma “faamanuiaina i tatou e ta'u atu tau lava o mea e manaomia ona latou faalogo i ai.” Sa ia aoao mai foi o “mea moni tatou te fai atu ai ma faia atonu e lagona ai si le mautonu po o le lelei ona polesiina. . . . Ae e aveina e le Faaola a tatou upu ma a tatou amioga ma Na te tauaveina e ala i Lona agaga i loto o tagata. Na te tauaveina a tatou taumafaiga faamoni ae e le o atoatoa ma liliuina i se mea e fetau lelei lava, ioe, i se mea e atoatoa.”²

Na maligi o'u loimata o le agaga faafetai a o ou toe foi atu i le falelotu. Na faamanuiaina e le Alii se musika e lei lelei le polesiina ma tauaveina atu atoatoa lana savali i le loto faavauvau o se tamaitai talavou e faamafanafana ai lona agaga faanoanoa. E le gata i lea, na faaaogaina e le Alii lenei aafiaga ootia e momoli mai ai i totonu o lo'u loto se malamalamaaga sili atu o se mataupu faavae loloto o le talalelei. ■

Randy Lonsdale, Alberta, Kanata

FAAMATALAGA

1. *Viiga*, nu. 124.
2. Kim B. Clark, “Love by Faith,” Brigham Young University—Idaho devotional, July 29, 2010, www.byui.edu/Presentations/Transcripts/EducationWeek/2010_07_29_Clark.htm.

Elei lelei le sauniuniga o lou leo ao lei amataina le sauniga, ma o le taunuuga la, ina ua ou taumafai e usu se nota mauluga, na matuaita'e lava lou leo.





UA Lava LONA ALOFA TUNOA

*E faapefea ona galue
moni le alofa tunoa
o le Atua?*

Saunia e Brad Wilcox

Na sau se tamaitai talavou ia te au i se tasi taimi ma talosaga mai pe mafai ona ma talanoa. Sa ou fai atu i ai, "Ioe. E mafai faapefea ona ou fesoasoani ia te oe?"

Sa fai mai o ia, "Ou te le malamalama i le alofa tunoa."

Sa ou tali atu, "O le a le mea lena e te le malamalama i ai?"

Sa ia faapea mai, "Ou te iloa e tatau ona ou faia le mea sili, ona faia lea e Iesu o mea o totoe, ae ou te le mafaia lava ona ou faia le mea sili."

Sa ou fai atu, "O le mea moni, ua uma ona totogi atoa e Iesu la tatou aitalafu. Na te lei totogiina uma vagana ai se vaega itiiti. Sa Ia totogiina atoa. Ua ma'ea."

Sa fai mai o ia, "Sao! E pei o le leai o se mea ou te faia?"

"Oi, e leai," sa ou fai atu ai, "e tele mea e te faia, ae e le o le totogiina o lena aitalafu. O le a tatou toetutu uma. O le a tatou toe foi uma atu i le afioaga o le Atua ina ia faaminoina. O le mea o loo totoe e fua e ala i lo tatou usiusitai, o le po o le a le toafimalie ua tatou fuafua e i ai i le afioaga o le Atua ma po o le a le tikeri o

le mamalu ua tatou fuafua e maua."

Na fetalai mai Keriso ina ia faaali atu le faatuatua ia te Ia, salamo, osia ma tausia feagaiga, maua le Agaga Paia, ma tumau e oo i le iuga. E ala i le usiusitai, ua tatou le totogiina ai ni mea e poloaiina e le faamasinoga tonu—e oo lava i se vaega aupito itiiti. Nai lo lena, o loo tatou faaali atu le agaga faafetai mo mea ua faia e Iesu Keriso e ala i le faaaogaina e ola ai i se olaga e faapei o Ia. E manaomia e le faamasinoga tonu le vave faaleleia po o se faasalaga pe a tatou toilalo. Ona na tauave e Iesu lea faasalaga, e mafai ona Ia ofo mai ia i tatou le avanoa mo le atoatoa sili (tagai i le Mataio 5:48; 3 Nifae 12:48) ma fesoasoani ia i tatou ia ausia lena sini. E mafai ona ia faamagalo mea e le mafai lava ona faia e le faamasinoga tonu, ma e mafai ona Ia liliu mai ia i tatou i le taimi nei ma Ana lava mea e manaomia (tagai i le 3 Nifae 28:35).

O le Alofa Tunoa e Suia i Tatou

O le faatulagaga a Keriso ma i tatou e talitutusa lava ma se tina o loo tuuina atu ni lesona o le musika i lona

tama. E totogi e tina le faiaoga ta piano. Talu ai e totogi e Tina le pili atoa, e mafai ona ia liliu atu i lana tama ma talosaga atu mo se mea. O le a? Ta faataitai! Mata e totogi e le ta faataitai a le tamaitiiti le faiaoga ta piano? E leai. Pe o totogi e le ta faataitai a le tamaitiiti le tupe a Tina na totogi ai le faiaoga ta piano? E leai. O le ta faataitai o le ala lea o faaali atu ai e le tamaitiiti lona talisapaia o le meaalofa matagofie a Tina. O le ala lea o loo ia faaaoga tatau ai le avanoa matagofie na tuuina atu e Tina ina ia ola ai i se tulaga maualuga atu. O le fiafia o Tina e le maua i le toe totogiina atu ae i le vaaia o faaaoga lana meaalofa—o le vaaia o le alulau i luma o lana tama. Ma o lea e faaaauai ai pea ona ia valaau atu mo se faataitaiga, faataitaiga.

Afai e manatu le tamaitiiti i tulaga manaomia a Tina o le ta faataitai ua matua malosi tele ("Oka, Tina, aisea e manaomia ai ona ou ta faataitai! E leai a nisi tamaiti o tata faataitai! O le a avea au ma se tagata taalo pesipolo faapolofesa!"), e masalo ona na te le'i vaaai mai i le vaaiga a Tina. Na te le o iloa le tulaga o le a sili atu ai lona



***Pe a tatou malama-
lama i le alofa tunoa,
ua tatou malamalama
o faamanuiaga o le
Togiola a Keriso e
faifaipea ma o Lona
malosi e atoatoa i o
tatou vaivaiga.***

olaga pe afai e na te filifili ina ia ola i se tulaga maualuga atu.

I le auala lava lea e tasi, aua na totogi e Iesu le faamasinoga tonu, e mafai ona Ia liliu mai ia i tatou ma fetalai mai: “Muli-muli mai ia te au” (Mataio 4:19); “Tausi au poloaiga” (Ioane 14:15). Afaí tatou te vaai atu ua fai si faigata naua o mea o loo Ia manaomia mai, atonu ona tatou te le’i vaai e ala i fofoga o Keriso. Tatou te le i malamalama lava i mea o loo Ia taumafai e avea ai i tatou.

Na saunoa mai Elder Dallin H. Oaks o le Korama a Aposetolo e Toasefulula e faapea, “E tatau ona mafatia le tagata agasala ua salamo mo ana agasala, ae o lenei mafatiaga e i ai se faamoemoega ese mai nai lo o se faasalaga po o le totogiina. O lona faamoemoega o le *sui*” (*O Le Ala a Le Alii* [1991], 223; faaopoopo le faamamafa i le uluai kopi). Sei o tatou faatatauina lena mea i tulaga o se tamaititi ta piano: E tatau ona aoao le tamaititi i le piano, ae o lenei faataitaiga e ese se faamoemoega nai lo le faasalaga po o le totogiina. O lona faamoemoega o le *sui*.

O le vavega o le Togiola e le na o le ia mafai ona tatou ola pe a mavae le otí, ae ina ia mafai ona tatou ola faamanuiaina atili (tagai i le Ioane 10:10). O le vavega o le Togiola e le na o le ia mafai ona tatou mama ma faamafanafanaina ae ina ia mafai ona tatou suia (tagai i le Roma 8). Ua faamanino mai e tusitusiga paia e leai se mea e le mama e mafai ona nofo faatasi ma le Atua (tagai i le Alema 40:26), ae e leai se mea e le o suia o le a manao i lena mea.

O le vavega o le Togiola e le na o le ia mafai ona tatou toe foi atu i le aiga ae o le tulaga—faavavega—ia mafai ona tatou lagonaina le lagolelei iina. Ana faapea e le manaomia e le Tama Faalelagi ma Lona Alo le faatuatua ma le salamo, semanu o le a leai se manao e suia. Mafaufau i au uo ma tagata o le aiga o e ua filifili e ola e aunoa ma le faatuatua ma aunoa ma le salamo. Latou te le mananao e sui. Latou te le o

taumafai e lafoai le agasala ma maua le mafanafana ma le Atua. Nai lo lena, o loo latou taumafai e lafoai le Atua ma maua le mafanafana i le agasala. Ana faapea e le manaomia e le Tama ma le Alo ni feagaiga ma faaee mai le meaalofa o le Agaga Paia, semanu e leai se auala e suia ai. O le a tuua i tatou e faavavau i le na o le malosi, e aunoa ma le mauaina o Lona mana. Ana faapea e le manaomia e le Tama Faalelagi ma Lona Alo le tumau e oo i le iuga, semanu e leai se faaogatotonu o na suiga i le aluga o taimi. O le a faavavau ona i ai i le laualuga ma avea ma teuteu ae le goto ifo i totonu ma avea ma se vaega o i tatou—se vaega o o tatou tagata. I se faaupuga faigofie, ana faapea e le manaomia e Iesu le faataitai, semanu tatou te le avea lava ma Au Paia.

E Fesoasoani le Alofa Tunoa ia i Tatou

“Ae e te le iloaina le faigata o le faataitai? Ou te le lelei tele i le piano. Ou te taina le tele o nota sese. E umi se taimi o tau ta ia sa’o.” Faatali la. Pe le o le vaega uma ea lena o le faagasologa o le aoaoina? Afai ae ta e se ta piano talavou se nota sese, tatou te le faapea atu ua le agavaa o ia e faaauau pea le aoaoina ma faataitai. Tatou te le o faamoemoe ia te ia ina ia atoatoa. Tatou te faamoemoe ia te ia ina ia tau-mafai pea. Atonu o le atoatoa o lana sini tupito lea, ae mo le taimi nei e mafai ona faamalieina i tatou i le alulu i luma i le ala sa’o. Aisea e matua faigofie lava le vaai atu i lenei vaaiga o le aoaoina o le piano ae matua faigata lava i le vaaiga i le tulaga o le aoaoina o le lag?

Ua toatele ua faavaivai i le Ekalesia ona ua latou lelavava i le lagonaina soo e faapea ua latou toilalo. Sa latou taumafai i aso ua mavae, ae o loo

MANATU AUTU

- Ua faasaoina i tatou ona o le alofa tunoa o Keriso, o lē na totogia le tau o a tatou agasala.
- O a tatou galuega, e pei o le salamo ma le tausia o polo-aiga, e le laveaia ai i tatou, ae o *ni* tulaga manaomia ua faatulagaina e le Faaola e fesoasoani e suia i tatou.
- O le alofa tunoa o le Atua o le mana paia e fesoasoani ia i tatou i o tatou sese uma ma e mafai ona tatou maua i taimi uma.

faaauau pea ona latou lagona e le o lava lo latou lelei. Latou te le o malamalama i le alofa tunoa.

E le tatau lava ona na o le lua ni filifiliga: atoatoa po o le faavaivai. Pe aoaoina le piano, pe o filifiliga ea e na o le faafafia i le Carnegie Hall po o le faamavae? E leai. O le tuputupu ae ma le atinainea e faifaipea i le aluga o taimi. O le aoaoina e umi se taimi e fai ai. Pe a tatou malamalama i le alofa tunoa, ua tatou malamalama o le Atua e faapalepale, o lena suiga o se faagasologa, ma o lena salamo o se mamanu i o tatou olaga. A tatou malamalama i le alofa tunoa, tatou te malamalama o faamanuiaga o le Togiola a Keriso e faifai pea ma o Lona malosi e atoatoa ona lelei i o tatou vaivaiga (tagai i le 2 Korinito 12:9). Pe a tatou malamalama i le alofa tunoa, tatou te mafaia, e pei ona fai mai le Mataupu Faavae ma Feagaiga, ona “faaauau pea i le onosai seia faaatoatoaina i [tatou]” (MF&F 67:13).

O le alofa tunoa e le o se faate’i afi pe afai ua uma la tatou sapalai o le suauu. Nai lo lena, o se punavai o lo tatou malosi faifaipea. E le o le malamalama i le faaiuga o le ana ae o le malamalama lea e tuleia i tatou i totonu o le ana. O le alofa tunoa e le ausia i se nofoaga i le ala. E maua iinei i le taimi lava lenei.

Ua Lava le alofa Tunoa

Ua lava le alofa tunoa o Keriso (tagai i le Eteru 12:27; MF&F 17:8)—ua lava e totogi ai la tatou aitalafu, ua lava e faaliliu ai i tatou, ma ua lava e fesoasoani ia i tatou po o le a lava le umi o le faagasologa o lena suiga. Ua aoao mai i tatou e le Tusi a Mamona ina ia faalagolago faapitoa atu i “galuega, ma le alofa mutimutivale, ma le alofa tunoa o le Mesia Paia” (2 Nifae 2:8). A o tatou faia, tatou te le iloa—e pei ona talitonu ai nisi Kerisiano—e le manaomia e Keriso se mea mai ia i tatou. Ae, ua tatou iloa le mafuaaga e manaomia ai e Ia le tele o mea ma le malosi e faia ai mea uma ua Ia poloai mai ai (tagai i le Filipi 4:13). O le alofa tunoa e le o le leai lea o se faamoe-moega maualuga a le Atua. O le alofa tunoa o le i ai lea o le mana o le Atua (tagai i le Luka 1:37).

Ua lava le alofa tunoa o le Atua. Ua lava le alofa tunoa o Iesu. Ua lava lena. Ua na o le pau lena o le mea tatou te manaomia. Aua nei fiu. Tau-mafai pea. Aua le sailia ni solaaga po o ni alofaga. Vaavaai mo le Alii ma Lona malosi atoatoa. Aua le sailia se tasi e tuuaia. Saili mo se tasi e fesoasoani ia te oe. Saili ia Keriso, ma, pe a o e faia, o le a e lagonaina le mana gafatia ma le fesoasoani faalelagi tatou te ta’ua o Lona alofa tunoa. ■

Mai se lauga sa faia i se faigalotu i le Iunivesite o Polika Iaga i le aso 12 o Julai, 2011. Mo le anotusi atoa i le Igilisi, asiasi i le speeches.byu.edu.



Saunia e
Elder D. Todd
Christofferson
O Le Korama
a Aposetolo e
Toasefululua

O **LAASAGA** I LE FIAFIA

O poloaiga e le i tuuina mai e taoefiofi ai
ae nai lo lena ia mafai ai mea tatou te
mananao moni lava i ai ma mea e fina-
galo i ai lo tatou Tama Faalelagi, o le
e alofa ia i tatou, mo i tatou.





AUAI I LE TALANOAGA



nisi taimi, e le mautonu ai nisi o tagata, ma mafaufau ai o poloaiga o ni taofiofiga po o ni tapulaa e faaafaigata ai le olaga, lea e aveesea ai avanoa po o le fafia po o mea fafia o le olaga. O le mea moni, o poloaiga e puipui ai i tatou ma taialaina i tatou i le fafia. E le o ni mea e taofiofia ai ae nai lo o lena ia mafai ai—ona faatagaina i tatou ia ausia i lenei olaga ma le isi—o mea tatou te matua mananao moni lava i ai ma mea e finagalo i ai lo tatou Tama Faalelagi, o lē e alofa ia i tatou, mo i tatou.

E pei uma lava o ni faasologa o faasitepu. O sitepu taitasi e mafai ona faatusa i se poloaiga se tasi, ma o poloaiga taitasi tatou te usitaia, o le a mafai ona tatou agaigai ai i luga. Ma, afai tatou te malamalama i le agaga o le poloaiga, o le a tatou mananao atili i ai. Tatou te le lagonaina se le fafia e faatatau i poloaiga; tatou te mananao atili i ai ina ia mafai ai ona alualu i luma. Ma o le a tuuina mai ia i tatou e se Tama Faalelagi o lē e alofa ia i

tatou e tusa ma o tatou manaoga. Afai tatou te mananao i ai, o le a Ia tuuina mai ia i tatou nisi poloaiga ina ia mafai ai ona faatautaia lo tatou alualu i luma.

O lea, le tupulaga talavou e, faamolemole aua nei faitio e uiga i poloaiga. Aua nei fai mai, “Ou te le toe manao i ai”, ae ia fai mai, “Ioe, ia atili aumai, ma toe aumai. Ou te manao ia alualu i luma. Ou te fia maua le fafia. Ou te manao ia avea faapei o lo’u Tama Faalelagi. Ma o poloaiga e faaali mai ai ia te au le ala e fai ai. Latou te tatalaina le ala i ou luma ma puipuia foi au mai mea leaga ma mea e faatamaia ai le fafia —ma o nisi taimi latou te puipuia ai foi le ola lava ia.”

Ou te faamoemoe ua e talitonu. E ao ona tatou faia mea uma e tatau ai e tausi ai poloaiga, e tusa lava pe foliga mai ua tuua na o i tatou pe a tatou faia lena mea. ■

Mai se lauga na tuuina atu i le autalavou i Salta, Atenitina, ia Novema 2011.

Mo nisi faamatalaga i lenei autu, tagai Thomas S. Monson, “O Le Usiusitai e Aumaia ai Faamanuiaga,” *Liahona*, Me 2013, 89; ma L. Tom Perry, “O Le Usiusitai i le Tulafono o le Saolotoga Lea,” *Liahona*, Me 2013, 86.

O Setema atoa o le a outou suesue ai e uiga i poloaiga i a outou korama o le perisitua ma vasega a Tamaitai Talavou ma le Aoga Sa. Atonu e te manao e mafaufau i ni poloaiga e matele ina tauivi ai au uo. O a faamanuiaga ua e maua pe ua maua e nisi e ala i le mulimuli i na poloaiga? Mafaufau i ni auala e mafai ona e molimau atu ai e uiga i na faamanuiaga i tagata o loo siomia oe, ma mulimuli i le Agaga ia iloa le tala e fai atu ma le taimi e fai atu ai. E mafai ona e faatinoina nisi o faataitaiga i le taimi o se afiafi faaleiga pe faasoa atu lau molimau i le taimi o se lesona o le Aoga Sa.



O Le A La Le Mea e **SILI** Ai le Fale **TELE** ma le **ATEATEA?**

Saunia e Dennis C. Gaunt

Ua fiafia tele Abby o le a alu i le siva ae sa momoo ia faapei teisi lona ofu fou o ofu o ana uo ia o le a ofuina. Na manatu o ia o le a sili atu ona foliga matagofie ma aulelei ana uo i o latou ofu e leai ni lima nai lo lona ofu e tauagafau, ma sa popole o le a matilatila mai o ia.

Na tafafao Nate ma ana uo i se tasi afiafi ae aumai ai e se tasi o ana uo ni apa pia ma tufatufa solo. Ina ua musu Nate i le taimi muamua, ma fai atu, "Ou te le inuina," sa amata ona talie ana uo ma tauaalili ia te ia. E le manao Nate e faapea ana uo o ia e le tautaua, o lea na ia mafaufau ai e miti laitiiti i le apa pia e taofi ai le talie o ana uo.

Pe e foliga masani ea nei tulaga? E pei o Abby ma Nate, tatou te oo uma lava i ni fetaulaiga ala i o tatou olaga lea e fofola mai ai i o tatou luma ni filifiliga eseese e pei o ni auala. I nei vaega o filifiliga faigata ma taua, o nisi taimi tatou te fefefe ai e tutu atu mo mea tatou te talitonu i ai aua ua tatou fefefe o le a tatou matilatila ai.

Ua oo Abby ma Nate i nisi o faafitauli o loo faamatala mai i le faaaliga a Liae i le laau o le ola. I lena faaaliga, ua tatou iloa ai o mafuaaga autu e lua o le tuua e tagata o le ala sa'o ma le

lauitiiti, ona ua faatauasoina i latou i faatosinaga o faaosooosoga (tagai i le 1 Nifae 8:23; 12:17) ma ua latou maasiasi e ala i le tauemu mai o i latou o i le fale tele ma le ateatea (tagai i le 1 Nifae 8:26–28). Sei o tatou iloiloina ia vaega nei e lua o le faaaliga a Liae ia iloa ai e le gata ia tatou malamalama lelei ai ae ia aoao mai ai foi ia maua le malosi e tutu atu ai ma ia matilatila atu mo le mea sa'o.

Savali i le Ala Lenei

O le faafitauli i faaosooosoga o le lalolagi o le, ua matua *taufaaosooso tele*, aea? E pei o le saunoaga a Peresitene Spencer W. Kimball (1895–1985): O ai na fai mai o le agasala e le malie? . . . O le agasala e lalelei ma manao-mia. . . . O le agasala e faigofie ma ua i ai se kamupani tele o ni soa e fiafia.¹

E ui lava ina tatou inoino e tau atu, ae o le tele o isi na auala e masani ona foliga moomia. O nisi o auala e faafusei lava ona pio ese atu i ni auala mananaia, ao o isi e tau le iloa le pi'o ese lea o sina taimi e foliga mai ai o loo ogatasi lava ma le ala o le talalelei. O nisi ua matuai mananaia le ufiina i le kapeta lanumumu ma lagonaina ai le patipatia. O nisi e

foliga mai ua sausau auro ma fola i maataua.

O le faatosina o le fale tele ma le ateatea lava ia e talitutusa lava. Ae a faafeafea foi, o ni isi o tagata sili ona mauoa, sili ona iloga, sili ona aulelei, ma sili ona malolosi i le lalolagi o loo nonofo ai iina! O ai se o le a le manao e tafafao faatasi, amio faapei, ma oofu faapei o na tagata? E masani ona latou foliga mai o loo sili atu lo latou fiafia nai lo le toatele o i tatou o loo taumafai e tumau i le ala o le talalelei.

E pei o la tatou uo, o Abby, o le tele lava o le ua'i atu tatou tuuina atu i tagata o loo nonofo i le fale tele ma le ateatea, o le tele foi lena o le tatou ono lagonaina o le lotoleaga po o le le fiafia po o le ita foi. Atonu tatou te mafaufau faapea e le fea lo latou mauaina o le tele o mea mananaia ao lea o loo tatou taumafai e tumau i le ala o le laau o le ola.

Ua iloa e Satani o se tasi o auala sili e aumai ai ni tagata ia tuua le ala o le talalelei o le faaseseina lea o i latou i le talitonu e faigata tele, le mananaia, pe ua autausaga, le tumau ai i le ala. E le popole o ia po o fea o auala tatou te uia—soo se auala lava o le a talafeagai—pau lava le mea ia le o le auala o le talalelei.

A ta'u mai e le lalolagi e sili atu le latou ala, ia maua le lototele e tu atu ai ma ola i upumoni o le talalelei.



TUTU ATU MO MEA TATOU TE TALITONU I AI

Ina ia maimoa i se vitio e uiga i le tutu mo mea tatou te talitonu i ai ma faalogo i le autalavou o faamatala mai pe aisea ua latou filifili ai e tausia o latou tulaga faatonuina, asiiasi i le youth.lds.org ma vaavaai mo vitio o le "la Lototele e Tu Toatasī" ma "Sa ou Filifili la Mama" i lalo o le vaega o Vitio Faaalia (o loo maua i le gagana Peretania, Potukale, ma le Sipaniolo).

"Pe Faapeī Le Tofo o Lena Fua?"

O le tauemuina o e faamaoni o se gaoi-oiga e sili ona fiafia i ai le fale tele ma le ateatea. Na saunoa Peresitene Thomas S. Monson, "O loo faatupulaia pea, o nisi o tagata lauiloa ma isi . . . i le vaaiga a tagata lautele, ua i ai se lagona e taufaifai i tapuaiga i tulaga lautele ma, o nisi taimi, ua faapitoa lava i le Ekalesia. Afai e le o matuai mauaa a tatou molimau, o faitioga faapena e mafai ona tatou masalomia ai o tatou talitonuga pe faavaivai ai foi lo tatou naunautaiga [e tausi poloaiga]."²

E foliga mai e tusa lava po o fea tatou te o i ai i le olaga, pe faafesagai pe o le initonetī, o le a i ai lava se faamalama e matale mai le fale tele ma le ateatea lata ane ma se tasi ua sauni e tusi mai se tamailima ma talie mai i mea tatou te faatauaina. Atonu ua tatou oo uma i lenei tauemuga i taimi eseese, ma e mafai ona matuai tiga lava. Ua tatou iloa e tatau ona tatou tali atu i se auala faa-Keriso, ae e le faigofie i taimi uma. E leai se tasi e manao e talie ia te ia pe tuuitiitia ni talitonuga ua matua uumauina. E pei o Nate, atonu o nisi taimi tatou te tali atu ai i se fuaitau faapea "E le mafai—o au o se Mamona," ae faalogoina ai le talie tetele mai o isi.

"E Le Mafai . . ."

Na e matauina le ala o loo taulai atu ai ia tauemuga i upu *e le mafai?* E pei o le, "Aisea e le mafai ai ona e inuina lena mea?" "Aisea e le mafai ai ona ta o ta te faatau i le aso Sa?" po o le "Aisea e le mafai ai ona e faia ni feusuaignae e te lei faaipoipo?"


O lenei taulaiga i upu *e le mafai* e ona oo ai i tatou i lagona o le leai o se malosiaga. Atonu e lagonaina ai e pei lava tatou te vaivai ma palaaai. Atonu o le a lagona e pei lava i tatou o ni tagata ua tuulafoaia e se Atua puleputetu ma ua lokaina ina ia aua nei o tatou maua le fiafia.

O lenei metotia ua matuai matua lava. Le mea moni, na faaaogaina lava e Satani talu mai le amataga. Ina ua tuuina e le Atua ia Atamu ma Eva i le Faatoaga o Etena, na Ia fetalai atu ia i laua, "O laau uma o le faatoaga e mafai ona e ai saoloto ai" (Mose 3:16). Faamata o upu "laau uma" o se tapu-laai lau faalogo? E ui na fetalai atu le Atua ia Atamu ma Eva o le a i ai ni taunuuga faapi-toa mo le 'aiina o le laau e iloa ai le lelei ma le leaga, ae Na te lei faatapulaaina faaletino i laua. Sa la mauaina le faatoaga atoa mo i laua lava ma sa faatonuina, "e mafai ona e filifili mo oe lava, ona ua tuuina atu ia te oe" (Mose 3:17). E foliga e pei o le saolotoga lena mea ia te au!

Ma o se mea mataina ina ua oo ane Satani i se taimi mulimuli ane ma ia fai atu, "Ioe, na fetalai mai ea le Atua—Aua lua te aai i laau uma o le Faatoaga?" (Mose 4:7). O le mea moni lava, sa fesili Satani, "Aisea e le mafai ai ona lua aai i le fua o lena laau?" i lena lava leo faatauemu lea e sau mai i le faamalama o le fale tele ma le ateatea. Na taulai atu Satani i le mea e tasi lea na tuuina atu ai e le Atua ni taunuuga, ma sa ia faia ina ia foliga mai na finagalo le Atua ina ia aveesea mai ia Atamu ma Eva. Na mimilo e Satani ia afioga a le Atua, ma faaopoopo i ai ni pepelo i se tau-mafaiga e tauanau ai i laua e mulimuli ia te ia nai lo le Atua. I le iuga, o le 'aiina o le fua o se vaega lava o le fuafuaga i le taimi atoa. Ma na saunia e le Atua se Faaola e tuuina atu ia Atamu ma Eva ma a laua fanau le avanoa e tuputupu ae ai ma toe foi atu i le aiga.

"Ou te Le Faia!"

Ma o le a tonu lava se mea o tatou fai atu ai pe a tatou tali atu, "E le mafai—o au o se Mamona?" Pe o tatou fai atu ea faapea, "Mai-mau pe ana mafai, ma pe ana le o au o se Mamona, ou te faia lava?" Sa i ai sau uo i se tasi taimi e masani lava ona talasua e uiga i



O LE MANA E FILIFILI AI

"Ma ona ua togiolaina i latou [o fanauga a tagata] mai le pau ua latou saoloto ai e faavavau i le iloa o le lelei mai le leaga; e fai mo i latou lava ae le faamalosia" (2 Nifae 2:26).

mea uma lava na te fia manao e fai pe ana le o ia o se tagata o le Ekalesia. O le faafitauli la, sa le mafai i taimi uma ona ou iloa pe o tausua o ia.

Nai lo le taulai atu i le *e le mafai* ma le *aua*, o le a sili atu ia i tatou pe afai tatou te faaaogaina upu *le faia*. E pei o le, "ou te le faia — o au o se Mamona." O le faaaogaina o *le faia* nai lo le *e le mafai* ua suia ai le taulaiga o le fuaitau ma ua faailoa atu ai ua ia i tatou le mana e filifili ai mo i tatou lava. O le faapea atu "ou te le faia," ua tatou tali atu ai, "ua ou *filifili* e aua nei faia lena mea, e le faapea la ona o au o se tagata o loo mulimuli tauaso pe ona ua faasāsāina, ae ona ua ou talitonu i le fitalia ma le tali atu mo au lava ia, ma ou te *manao* e fai le mea sao. Ua ou filifili e galue ae le o le faamalosia" (tagai i le 2 Nifae 2:14, 26).

O le faaaogaina o le "Ou te le faia" nai lo o le "e le mafai" o se faatinoga maoae foi o le lototele. E leai se

lototele e manaomia e mulimuli ai i le tumutumu o tagata i lalo o auala eseese o le lalolagi. Soo se tasi e mafai ona faia lena mea. O le tutu atu mo le upumoni e faaalia ai le faatuatua moni. O le tutu atu mai le lalolagi e manaomia ai le moni o le lototele. E faaalia ai lo tatou faaaogaina moni lava o lo tatou fitalia ma le mafau-fau moni mo i tatou lava. O tagata o i le fale tele ma le ateatea e ta'ua pea lava pea o se faapotopotoga o tagata e leai ni igoa, o se faapotopotoga o tagata leaga e leai ni foliga. I le iuga, o a latou upu e 'ōō ma e leai se uiga. O le faaaogaina ma le faamaoni o lo tatou fitalia, o le a mafai ai ona tatou maua le lototele e faapea atu ai, e pei ona faia e Liae ma tagata lototoa ma le faamaoni o lona aiga, "sa matou le amanaiaina i latou" (1 Nifae 8:33).

I le ogatotonu o se lalolagi ua faateleina le amioleaga, o i latou o e tutu i luga ma savavali i ala o le talalelei,

e moni lava o le a tutu matilatila atu. Ae e le o tuua ai na o i latou. E pei ona valaaulia ai i tatou e Peresitene Thomas S. Monson, "Tau ina ia tatou lototetele pea ma saunia e tutu mo mea ua tatou talitonu i ai, ma afai e tatau ona tatou tutu na o i tatou i le faagasologa, tau ina ia tatou faia ma le lototele, ua faamalosia e lo tatou iloa, e moni lava e le o tuua na o i tatou pe a tatou tutu faatasi ma lo tatou Tama o i le Lagi."³ ■

E alala le tusitala i Iuta, ISA.

FAAMATALAGA

1. Spencer W. Kimball, *Faith Precedes the Miracle* (1972), 229.
2. Thomas S. Monson, "Ia Lototele e Tu na o Oe," *Liahona*, Nov. 2011, 60.
3. Thomas S. Monson, "Ia Lototele e Tu na o Oe," 67.



IA AVEA MA SE

MALAMALAMA

I AU UO



Saunia e
Elder Benjamín
De Hoyos
O Le Fitugafulu

Sa ou ola ae ma ni uo lava e tasi mo uluai tausaga e 12 o lou olaga. Sa matou tuaoi. Sa tutusa aoga matou te aooga ai ma auai i pati o aso fanau o le tasi ma le isi. O nisi taimi ou te 'ai ai i o latou fale, sa latou o mai i lou fale, ma sa matou maua le fiafia faatasi. Ae ina ua matou talavou, na amata ona suia na mea. Sa lei avea i latou o ni tagata o le Ekalesia, na latou palalaувale, ulaula, ma inupia. Na matuai ese lava se latou vaaiga e uiga i le tulafono o le ola mama nai lo au.

Sa ou mafaufau ma le toto'a e uiga i le faafitauli, ma o lea sa ou talanoa atu ai i lo'u tama e uiga i le mea e fai. Sa ia faapea mai, "E tatau ona e filifili. O nei uo lelei e ese mai ia te oe. I le amataga sa lei mafai ona e iloaina, ae o le taimi nei ua matuai tele lava se eseesege."

Sa ou faatuatuaina le fautuaga a lo'u tama. Na iloa e a'u uo o a'u o se tagata o le Ekalesia, ma afai ou te filifili ou te le alu i mea latou te o i ai i taimi uma, sa latou malamalama. Na iu lava, ina faaititia ia taimi matou te faatasiasi ai e ui lava sa matou faaauo pea.

O se tofotofoga ia te au le tuua o au uo, ae na ou iloaina sa taua le tausisia o mataupu faavae o le talalelei i lo'u olaga. Sa ou manatu e uiga i le fautuaga a Alema i ona atalii ina ua ia aoao i latou e faatuata i le Atua. Sa ia faapea atu, "O ai lava e tuu atu lo latou faalagolago i le Atua e lagolagona i o latou tofotofoga" (Alema 36: 3).

O se tasi o mea na fesoasoani ia te au ina ia manumalo ai i lenei taimi

faigata o le auai i gaoioiga a le Ekalesia i vaitaso taitasi, e aofia ai le Mutualie. Sa ou faaaluina lou taimi i siva, taaloga, ma konafesi a le autalavou.

Sa ou feiloai i se uo fou e le auai i le Ekalesia, ma o nisi taimi na te valaualiaina au ma te o i pati. O nei pati na pau tonu lava i aso o le Mutualie, o lea sa ou fai atu ai ia te ia, "Ou te faamalie atu. Ou te fia alu, ae e i ai isi au fuafuaga."

Sa ia fesili mai pe o le a la'u mea sa fai. Sa ou ta'u atu ia te ia, "Ou te alu i le Mutualie."

"O le a le Mutualie?" na ia fesili mai.

Sa ou faamatala atu e tele ia o a matou gaoioiga malie e fai i le Mutualie ma ou te galue o se fesoasoani i le au peresitene. Ina ua uma ona ou teena ni valaaulia se tolu i ana pati, na ia fai mai, "Valaaulia au i le Mutualie."

O lea sa ma o ai, na aoaoina o ia e faifeautalai, ma na iu ina papatisoina o ia.

Ou te valaaulia outou e faia ni filifiliga i le taimi nei ina ia mafai ona avea outou o se malamalama i a outou uo. E tasi le mea e mafai ona e faia o le auai i le seminare. E faia e a outou faiaoga seminar a *latou* vaega, latou te tuu atu se taumafaiga tele i le sauniaina o lesona mo oe. O le a sili atu ona avea le seminare o se faamunuiga ia te outou pe afai e te faia *lau* vaega: fai tau meaaoga, tatalo ma anapogi, maua ma talia aoaoga. O le a tupu le aoaoina pe a fai e vaega uma e lua mea e manaomia ona fai.

Ina ua ou i ai i le aoga maualuga, sa valaaulia au e se tasi o a'u uo i se

pati ma faapea mai, "Ta o e fesili i lo'u tama pe mafai ona ta faaaogaina lana taavale." Sa lei manao lona tamā e tuu atu ia te ia le taavale. Ma, ina ua vaai mai lona tama ia te au, sa ia faapea mai, "Ua lelei, o le a ou tuuina atu le taavale, ae na o Peniamina lava e aveina le taavale."

Na iloa e lenei tamalii o lo matou aiga o ni tagata o le Ekalesia, matou te le inu ava malosi, ma o le a avea au ma se avetaavale saogalemu.

O tali mai o le tama o la'u uo na fesoasoani ia te au e talisapaia ia aoaoga a o'u matua ma faataitaiga la te faia. I le fale sa matou faia afaifi faaleaiga ma tatalo faaleaiga. O le Aso Sa o se aso lea matou te malolo ai. O nei ituaiga mea o ni faatinoga o le talalelei mo i matou, ma sa matou fiafia tele i ai. E masani ona valaaulia e lou tama nisi tagata o le Ekalesia e o mai i lo matou fale i aoauli o Aso Sa e talatalanoa e uiga i le talalelei. Na matou aai faatasi, matou talatalanoa e uiga i le talalelei, ma matou faasoaina se faigauo vavalalata.

Saunia nei e fausia o outou lava aiga malolosi o le lumana. E te faia lena mea pe a e toaga e aoao e uiga i le talalelei. Manatua afai o le a e faalagolago atu i le Atua; fai ni tatalo faatauanau i aso uma; fai tau ia tusi-tusiga paia; tausisia lo outou lava mama; ma galue i lau Tiute i le Atua po o le Alualu i Luma o le Tagata Lava Ia, o le a puipuia outou mai fai-gata, o le a avea ma se malamalama i au uo, ma o le a maua le olioli i lou olaga. ■

TUUSAO I LE MATAUPU

O le mea ou te nofo ai, afai lua te o
ma se tagata i se tafaoga faamasani
se tasi, ona faapea lea ua oulu
feoai tumau o se alii ma se tamaitai.

E mafai faapefea e se tagata ona
tafao faamasani i ni
tagata eseese e aunoa ma
le mauaina o se tulaga le tauleleia
faapea o se tagata faiata
pe le faamaoni foi?



O se luitau tele lea mo le toatele o talavou o le Au Paia o Aso e Gata Ai i le lalolagi atoa. Ua fautuaina i latou e “aloese mai le tafafao soo ma le tagata lava e tasi” ina ia aua nei o latou atinaeina se mafutaga tumau i se vaitausaga laiti (*Mo le Malosi o le Autalavou* [tamaitusi, 2001], 4). Ae i le tele o aganuu i le lalolagi, o le valaaulia mo se mafutaga o se uo tama/uo teine e masani lava ona tupu a o lei faia se tafaoga faamasani muamua; ma e faapena foi, o le na o le tasi o se tafaoga faamasani e mafai ona tupu mai ai se mafutaga faapitoa ma se faamoemoega mo se tautinoga. I se aganuu faapena, o le tafaog faamasani ma ni tagata eseese o le a foliga mai o le a solia ai se “mafutaga” ma e mafai ona faapea ai o oe o se tagata faiataa pe le faamaoni. O le a la le mea e tatau ona e faia?

Muamua lava, ia mautinoa ua uma ona faailoa i tagata uma lou talitonuga ma tautinoga i tulaga faatonuina a le Alii e faatatau i le ola mama ma le mama mai feusuaga ina ia aua lava nei i ai se masalosalo e uiga i lou tagata ma au amioga. O le isi mea e sosoo ai, e mafai ona e galue ma le punouai e suia le aganuu o loo siomia ai oe e faatatau lea i tafaoga faamasani, mo le lelei e ala i le talanoa atu e uiga i taiala o le Eklesia. Afai e fesiligia oe e tagata e uiga i ou tulaga faatonuina o tafaoga faamasani, fesili atu ia te i latou pe aisea, afai latou te le o saili e faaipoipo i se taimi vave, latou te lagonaina ai le manaomia o se mafutaga faalelagona ma faaletino molitino i se vaitausaga talavou. Valaaulia i latou e auai atu i se aso o se tafaoga faamasani faalevaega ina ia latou iloa e mafai ona latou maua le fafia a o aloese mai se mea matautia e le manaomia ma mea e tutupu faalelagona i faigau talavou. Ma faailoa atu ia i latou ia taiala ma apoapoaiga ua e mauaina e ala mai perofeta soifua ma aposetolo. ■



**Aisea e amata avea ai alii talavou ma
faiaoga o aiga pe a 14 o latou
tausaga ae o tamaitai talavou e amata ona
faiaoga asiasi pe a 18 o latou
tausaga?**

Se faaaliga na tuuina mai i le taimi na faatulagaina ai le Eklesia i le 1830, na folafola mai e le Alii, "O le tiute o le aoao o le leoleo lea i luga o le eklesia e le aunoa, ma faatasi ma faamalosi i latou" (MF&F 20:53). E ese mai i faiaoga o le Perisitua Arona, o lenei tiute e tausoaina e ositaulaga ma i latou o e umia le Perisitua Mekisateko (tagai i le MF&F 20:45–52). O le faiaoga o aiga o se tasi lea o auala e faataunu ai lenei tiute e ala i le taliaina o tofiga patino mai taitai o le perisitua. O faiaoga asiasi, e ui e talitutusa, ae i ai se eseesege teisi i le faamoemoega, o loo tuuina atu ai se avanoa mo uso o le Aualofa e faamalosia ma aoao atu le tasi i le isi e ala i tofiga mai le au peresitene o le Aualofa (pe a faamaonia e le epikopo po o le peresitene o le paranesi). O le mea moni, e tatau i tamaitai talavou (aemaise lava au peresitene o vasega) ona taumafai e faamalolosia ma lagolago e le tasi i le tasi i auala eseese, ae e le tofia i latou e fai ni asiasiga i masina taitasi i ni tagata faapitoa. ■

**O a ni tulaga manaomia o le
malosi faaletino e auauna
atu ai i se misiona?**

Oni luitau ogaoga faaletino po o le tapulaa faafomai e mafai ona taofia ai nisi o tagata mai le faatinoina lelei o tiute faafaifeautalai ma e mafai ona le lelei ai foi le auaunaga a o latou soa. O na ituaiga tagata e masani ona le auauna atu faamisiona. Mo se faataitaiga, o i latou o e manaomia se nofoa faataavalevale po o ni tootoo po o le le mafai ona faatinoina ni galuega i aso taitasi e aunoa ma le fesoasoani a isi ua le fautuaina mo se auaunaga faafaifeautalai. Ma o le matuai ova o le puta e mafai ona mafua ai le i ai o se faafitauli ogaoga i auaunaga masani o se misiona, ma o lea e ono talosaga atu ai taitai perisitua i nisi o tagata e faapau ni pauna a o lei fautuaina atu i latou mo se auaunaga. E faatatau i le malosi atoa, o se tasi o taiala e ono faapea atu e tatau ona e savali pe a ma le ono maila (9 km) i se aso e aunoa ma se faafitauli.

Afai e i ai ni au fesili e uiga i soo se tasi o nei mataupu, e mafai ona tuu atu ia te oe e lau epikopo po o le peresitene o le paranesi ni tali ma se taitaiga. ■

**O a fea e tatau ai
ona ou amata totogiina
ia taulaga
anapogi ma
faia isi foai?**

A fai e i ai sau alatupe maua ma se loto naunau, e mafai ona e amatalia le foai atu o ni taulaga anapogi i soo se vaitausaga. O le mea moni, pe a maua sau tupe, ua poloaiina oe e le Alii e totogi le sefuluai o au tupe maua. E le gata i lea, "o le usitaia lelei o le aso anapogi e aofia ai . . . tuuina atu se taulaga anapogi ma le lima foai e fesoasoani ai ia i latou e le tagolima" (*Mo le Malosi o le Autalavou* [tamaitusi, 2001], 39). E le faapea a totogi e ou matua meaai a lou aiga ona le mafai lea ona fai sau oe lava saofaga pe a lagona le uunaiga pe a anapogi lou aiga i masina taitasi. Ia manatua, e ui lava o loo e talavou, e tusa lava po o le a le aofaiga o le saofaga, o le mea e sili ona taua o loo e usitaia ia poloaiga a le Alii ma fesoasoani ai ma le le manatu faapito e faamanuia atu i isi. O le a faamanuiaina oe faapea foi ma isi e ala i lou ositaulaga. Ma afai e te lagona le musuia ma e mafai ona e faia lena mea, atonu e mafai foi ona e mafaufau e talatalanoa ma ou matua ma faia ni foai i nisi teugatupe a le Eklesia i luga o le lisiti o le Sefuluai ma Isi Taulaga. ■



Saunia e
Rosemary M. Wixom
Peresitene Aoao
o le Peraimeri

○ FAATOSINAGA a MUSIKA

Ua faaalia i se suesuega e faaaaoga ai isumu le ala e aafia ai i tatou i le tele o musika tatou te faalogologo i ai.



Inua ou fesili atu i se tasi, “O le a se mea e sili ona e manatuina e uiga i le Peraimeri?” o le tali masani lava, “O Le musika.” O upu i pese Peraimeri e le o ese lava ma i tatou—o loo totoina mausali i o tatou loto. Ia, mo se faataitaiga, o pese Peraimeri nei. E mafai ona e faamaeaina fuaitau taitasi?

“Ou te taumafai e avea . . .”

“Le Tama e, o . . . ?”

“Tala o le Tusi Mamona . . .”

A o e faamaeaina ia fuaiupu taitasi, na e iloaina lou usuina o le fati?

Afai o lea, masalo ona o musika e faaleleia ai o tatou lagona faaletagata, faagaeetia ai o tatou lagona, ma fatuina ai ni mea e manatua. E leitioa a tatou faamanatuina ai faapaiaga o malumalu i se gaoioiga faaleaganuu lea e auai ai talavou i musika musuia ma siva. O nei mea e tutupu tatou te “alalaga atu i le Atua” ma “pepeste atu i lona suafa mamalu” (Salamo 66:1–2).

E Aafia i Tatou e Musika i Taimi Uma

O loo aoao mai le *Mo le Malosi o le Autalavou* faapea, “e i ai se aafiaga loloto o musika i lou mafaufau, agaga, ma le amio.”¹ O musika e mafai ona faatamaoiga ai lou olaga i le tele o auala, ae e mafai foi ona lamatia ai. Na saunoa peresitene Thomas S. Monson, “O musika e mafai ona fesoasoani e te latalata atili atu ai i lou Tama Faalelagi. E mafai ona faaaoga e aoao ai, faamalamalama ai, musuia, ma lotogatasi

ai. Ae peitai, o musika e mafai, e ala i lona fati, pao, leotele, ma upu, ona aveese ai lou mataalia faaleagaga. E le tatau ona outou faatumuina o outou mafaufau i musika lē lelei.”² Ma atonu e le afaina pe afai e te faalogologo lelei i upu pe leai; o upu e tuu i musika e masani ona faigofie ona aoaoina ma faigofie ona manatua.³ E leitioa a lapataia i tatou ina ia “filifili ma le faaeteete ia musika [tatou] te faalogologo i ai.”⁴

Isumu, Musika, ma Aoaoa

O lau filifiliga o musika e mafai foi ona aafia ai lou gafatia e faataunu ni galuega po o le aoao. Na faailoa mai e ni tagata suesue e toalua lenei fesootaiga e ala i le suesueina o ni aafiaga o le musika ma le pao i o neura o le isumu. Mo le valu vaiaso, o se tasi o vaega o isumu na faalogologo i taimi uma i pese uosi a Strauss (o ni musika e maualuga le faatulagaina ma le faagasologa), a o le vaega lona lua na faalogologo i leo paovale faifai pea o tanipalau. O le vaega lona tolu na tausia i le le leoa.

Ina ua mavae le valu vaiaso, sa tuu isumu i se auala felavesa’i e o e su’e ai ni meaai. O isumu sa i le vaega lona lua na savavali e au-noa ma se lagona o le taitaiga—“o se failogog manino o loo latou pagatia i le aoaoina”—ma sa sili atu le umi na saili ai meaai nai lo le mea na latou i ai i le amataga o le suesuega. O isumu ia na aafia “i leo paovale e le gata ina atinaeina ni faigata o le aoaoina ma le manatua, . . . ae sa i ai foi ni suiga taua i sela o o latou faiai.” O le sailiiliga a le au

suesue sa matuai mataina lava: "Matou te talitonu na taumafai isumu e taui atu mo lenei osofaiga faifaipea o leo pisapisao. . . . Sa latou tauivi e tetee atu i le vevesi."⁵

Mata o le a se tulaga "vevesi" i nisi o musika o aso nei—o mea e ono taofia ai oe mai le aoaoina ma le mataalia? Atonu e fesootai i le fati ma le pao o le musika (e pei o le isumu) po o upu foi na faaaoga po o le savali na faailoa mai ai. Na saunoa peresitene Boyd K. Packer, Peresitene o le Korama a Apostolo e Toasefululua, "O loo i ai le lalolagi i se suiga maaleale ae malosi. Ua faateleina le tuufau o musika ua oo i se tulaga ua taliaina na musika i faafiafiaga. Ma o lona tau-nuuga, o le tele o musika ua usuina e tagata faafafia laulioa i ona po nei, ua foliga mai ua faamoemoe e faaoso ai le vevesi ae le o le faamalieina, ma



ua faateleina ai le popole ae le o le toofilemu."⁶

O Mea e Taua o le Taimi ma le Agaga

E le na o le pao o le pese ma upu o musika paovale lea e le lelei. O le faalogologo i ia ituaiga musika, ua tatou taofia ai foi taimi filemu lea e mafai ai ona tatou mafaufau ma le manino ma faalogo i le Agaga. I le *The Screwtape Letters*, o se tala tusia laulioa faaKerisiano, o se tagata e igoa ia Screwtape e faatusaina ia Satani ma o loo taumafai e taitaiina ia agaga lelei i lana galuega. Fai mai Screwtape, "E malie tele le auala e masani ona mafaufau ai tagata o loo matou tuuina ni manatu i o latou mafaufau: ae o le mea moni lava o le matou galuega sili lava o le tau-mafai lea e taofi i fafo ia mea."⁷ I le tulaga lava ia, e iloa e Satani e le o taimi uma e na te faatumu ai o tatou mafaufau i ni mafauauga leaga pe a fai e na te mafai ona taofia i tatou mai le taulai atu i mea a le Agaga. "Afai e

te faalogologo i musika i taimi uma, atonu e te le maua se taimi filemu e manaomia mo le mafaufau, lagona, ma le mauaina o le taitaiga faaleagaga."⁸

Tatou te manaomia le Agaga Paia e faatasi ma i tatou i taimi uma. Mo lena mafuaaga, e tatau ona tatou filifili ma le faaeteete musika tatou te faalogologo i ai ma siva tatou te auai atu i ai. Tuu atu i le Agaga e avea ma ou taiala, ma a i ai ni ou masalosaloga e uiga i le musika o loo e faalogologo i ai po o tulaga o e i ai, ia maua le lototoa e galue ai ina ia mafai ona tumau ai le Agaga ma outou. ■

FAAMATALAGA

1. *Mo Le Malosi o le Autalavou* (tamaitusi, 2011), 22.
2. Thomas S. Monson, *A Prophet's Voice: Messages from Thomas S. Monson* (2012), 77.
3. Tagai Jack R. Christianson, sii mai i le "Author's criterion for picking music: does it encourage a proper life style?" *Church News*, Me 6, 1989, 5.
4. *Mo Le Malosi o le Autalavou* 22.
5. Richard Lipkin, "Jarring Music Takes Toll on Mice," *Insight*, vol. 4, nu. 14, Aperila 4, 1988, 58.
6. Boyd K. Packer, "Musika Lelei, Mafauauga Lelei," *Liahona*, Ape. 2008, 33.
7. C. S. Lewis, *The Screwtape Letters* (1982), 20.
8. *Mo Le Malosi o le Autalavou* 23.





O SE TATALO O LO'U LOTO

O le siitia o o'u tulaga faatonuina o musika ou te faalogologo i ai na fesoasoani ia te au ina ia ou fiafia atili i ai.

Saunia e Ma. Consuelo N.

O u te fiafia i musika, ma e foliga mai e le atoatoa lo'u aso sei vagana ua ou faalogologo i ai pe usuina. Talu ai nei lava, ua ese le ala ua tuputupu ae ai lou fiafia i musika, ma ua ou aoaoina ai nisi o mea ua sua o le ala ou te mafaufau i ai ma faaaoga ai le musika.

Sa amataina ina ua ou faitauina le mau lea na fetalai mai ai le Alii, "Aua e fiafia lo'u agaga i le pese a le loto; ioe, le pese a e amiontonu o se tatalo mai ia te au, ma o le a talia ma se faamanuiaga i luga o o latou ulu" (MF&F 25: 12). Ina ua ou faitauina lena fuaiupu, sa ou manatuina se mea sa aoaoina ai au e lo'u tina. I se tasi taimi, ina ua ou usuina ia viiga i se auala le talafeagai, sa ia faamanatu mai ia te au e faapea, e mafai ona avea viiga ma ni tatalo ma e tatou ona ou usuina faalelei i latou. Ou te manatu o nei fuaiupu o loo faatatau e le gata i viiga lava ia ae faapea foi i soo se pese tatou te usuina ma se faanaunauga amiontonu. Vaai faalemafaufau pe o a faamanuiaga o le a oo mai i luga o i tatou, e pei ona fai mai le mau, pe a tatou usuina ni pese i le Alii.

Sa ou aoaoina ai foi le taua o le faalogologo i musika lelei. Ina ua maea le faitauina o lenei mau, sa amata ona ou tilotilo solo i lau lisi o pese ma tapeeise ia pese ia e lei lagolagoina ia aoaoga o i le *Mo le Malosi o le Autalavou*.

E lei umi ae ou faia ni filifiliga e uiga i le musika e sili atu i le mea sa i ai i la'u lava faaputuga. I se tasi aso ao ou i ai i le aoga, sa amata ona tataina e se uo mai le vasega se pese leaga. E lei lelei ou lagona e uiga i le pese, o lea sa ou fai atu ia te ia e sui le pese, lea na ia faia. Ou te iloa e mafai e i tatou taitoatasina ona maua lena foi lototele i tulaga

faapena. Ma i nisi taimi pe a le suaia ai e tagata le musika mo i tatou, o loo ia i tatou lava se isi filifiliga: e mafai ona tatou o i se isi nofoaga.

Ou te iloa e ala i musika lelei e mafai ona tatou lata-lata atili atu ai i lo tatou Tama Faalelagi. E mafai e musika ona faamalamalamaina i tatou, musuia i tatou, valaaulia le Agaga Paia e faatasi ma i tatou, uunaia i tatou i ni amioga amiontonu, ma fesoasoani ia i tatou e tetee atu i faaosoosoga a le fili (tagai i le *Mo le Malosi o le Autalavou* [tamaitusi, 2001], 22–23).

Ia manatua a o tatou usuina le pese a e amiontonu, o loo tatou tatalo moni lava i lo tatou Tama o i le Lagi. ■

E alala le tusitala i Metro Manila, Filipaina.

FILIFILI MUSIKA LELEI

"E i ai se aafiaga loloto o musika i lou mafaufau, agaga, ma le amio.

"Filifili ma le faaeteete ia musika e te faalogologo i ai. Ia nofoua i ou lagona pe a e faalogologo. O isi musika e mafai ona aumaia savali faatiapolo ma faataumaoi. Aua e te faalogo i musika e uunaia ai le ola le mama pe faavivii i faiga faatupu vevesi e ala mai i upu, fati, po o le soona leotole. Aua e te faalogologo i musika e faaaoga ai gagana masoa pe faatiga pe faalauiloa ai foi faiga faatiapolo. O na ituaiga musika e mafai ona faapogisaina ou lagona faaleagaga."

Mo Le Malosi o le Autalavou (tamaitusi, 2011), 22.

FAAOSO LOULLUMANAI

la faatumuina i le atamai ma vaai po o le a
le mamao o le a ave ai oe e lou malamalama.



E ALA I PUIPUI MANIFINIFI

Matou te lei iloaina lava seia oo i se taimi mulimuli ane, a o matou aoaoina se tasi o aiga i le talalelei, na matou aoaoina foi lo latou tuaoi e sosoo atu.

Saunia e Monica Garcia Adams

Le avea ai ma ni tamaitai faifeautalai, sa ma faasoaina atu ai le talalelei i se tamaitai na ola i ni tulaga faatauvaa i le pito i lalo o se mauga tele i talaane o se mea e sasaa ai lapisi a le tamai aai i nuu a uta o Asunción, Parakuei.

O Soledad ma lona toalua o Oscar, sa nonofo i se tasi o potu o se fale umi, ma le vaapiapi lea sa avea mona lava o se faasologa o potu e pipii faatasi itu, ma e manifinifi ia puipui. O potu taitasi sa avea o se tamai fale mautotogi e tasi le faamalama, tasi le faitotoa, tasi le laulau, ma tasi le moega. Sa tele ia ituaiga fale i lenei eria, na fausiaina i laupapa, o le taualuga e ato i lau ma le fola e palapala. O kelei sa faaaoga e faapipii i pupu lea na taofia ai i fafo nisi o le malulu.

Na Faalogo Soledad

O Soledad o se tina o se fanau laiti e toatolu, ma sa talavou foi o ia lava—ma lofituina. Na pau ia o mea na mafai ona ia faia e tausi ai lona aiga ma mea e manaomia o aso taitasi e lana fanau. Peitai sa foliga mai sa ia fiafia i a maua asiasiga ma iloaina se manaomia o le Atua i lona olaga.

Sa saoloto le faaalia e Soledad ona manatu ma lagona. Sa alofa o ia ma faamemelo atu ia Oscar ma sa la

sosolaese ma Oscar mai lona aiga, e ui sa lei fiafia i ai ona matua. Sa lei ma'ua e i laua uma ma lona toalua ni aoaoga po o ni galuega, ma sa le mautonu lo laua lumanai. Sa ia mafaufau pe ua lafoaia o ia e le Atua ma pe sa Ia faasalaina i laua ona o filifiliga le lelei sa la faia.

Na tuleia e Oscar se taavale tosollima e i ai ni mea teuteu mo tamaitai i lea faitotoa i lea faitotoa i se taumafaiga e fesoasoani ai i lona aiga ina ia

feola. A lelei sona aso, na te faataua se meaai ma, o nisi taimi, o ni mealofoa ititi mo tamaiti. Ae a le lelei se faatauga, e masani lava ona ia toe foi faanoanoa, ita, ma onā i le aiga.

Sa ma lagona le luituina ina ia fesoasoani ia i laua i le taulimaina o le tele o popolega faaletino. Ae sa ma lagonaina foi le uunaiga a le Agaga ina ia faaauau pea ona alofa ma aoaoina i laua, e ui lava na i ai taimi sa faalelelei ai lo laua alualu i luma.



Ina ua mavae le tele o nisi asiasiga ma ni tatalo faamaoni, na iu lava ina ma lagonaina le manaomia o le tuuina atu ia i laua sina taimi e mafaufau ai i mea sa ma aoaoina ai i laua, suesue i le Tusi a Mamona, ma tatalo mo na o i laua lava.

Sa ma faamalamalamaina atu ia Soledad o maua atugaluga, ma sa le fiafia o ia. Sa ia manatu ua ma tuulafoaia lona aiga. Sa ia tau mai foi ia i maua o loo maitaga i lana tama lona

fa ma e na te leiloa pe faapefea ona latou ola. I lona ita sa ia fai mai ai ia i maua ma te o ese loa ma aua nei toe foi atu.

Na Faalogo Foi Juan

Ae peitai, ma te le'i iloaina, o le tuaoi na sosoo ai, o Juan, sa faalogo-logo mai i puipui i mea sa ma aoaoina atu. Sa talavou o ia, fialoa, ma e matamuli tele. A o ia faalogologo, sa i ai ni ana fesili se tele e uiga i le ata o le faaolataga, le Tusi a Mamona, ma le salamo. Na ia nonoina foi le kopi o le Tusi a Mamona a Soledad, faitau i ai, ma tatalo e tusa ai ma mea uma na ia aoaoina ma le le leo.

Na mavae atu aso. Na amata ona popole Juan ina ua ma le toe foi atu e aoao Soledad ma Oscar. Ona oo lea i se tasi po, a o faamalumalu mai ia afa malolosi o le taumalulu, sa ia fesili ai ia Soledad po o fea ma te nonofo ai ma pe faapefea ona ia faafesootaia i maua. Sa fai atu o ia [Soledad] e na te leiloaina, ma sa amata ona tagi o ia [Juan]. Sa ia tuuina atu lana molimau ia te ia [Soledad] i le moni o la maua savali ma tamoe atu i fafo i le po matagia e saili mo i maua ao maligi timuga, ma amata ona liua magaala i vaitafe palapala.

Sa faaauau pea le sailiga i itula mulimuli ane, i le vaivai ma le malulu. Na amata ona ia tatalo ao agai atu i le pogisa, folafola atu i lona Tama oi le Lagi, afai o le a Ia fesoasoani ia te ia i le sailiga o i maua, o le a ia papatiso ma auaua atu ia te Ia i aso uma o lona olaga. I lena lava taimi, o Soledad, i le faagaeetia ai i le

molimau a Juan, na amata ona tatalo ina ia ma toe foi atu. Na toe foi Juan i le fale ae na faaauau pea ona tatalo ma faitau le Tusi a Mamona mo le lua aso na sosoo ai. Na tatalo faatauanau foi Soledad ma talanoa ma Oscar. Na amata ona la faitaua faatasi le Tusi a Mamona.

Ma Na Faafogaga mai le Tama Faalelagi

O le lua o aso ina ua maea le matagi, a o ma tootutuli ma la'u soa i le tatalo, na ma lagonaina le manaomia o le toe foi atu i na tamai fale e i le pito i lalo o le mauga. Sa vave ona ma o, ma ina ua ma taunu, sa faafeiloaia i maua i loimata o le fiafia ma le naunautai mai ia Soledad, Oscar, le la laua fanau, ma Juan. Sa latou faamatala mai mea uma na tutupu, ma talu mai lena taimi, na latou naunau uma e aoao e uiga i le talalelei. E lei umi ae papatisoina ia Juan, o Soledad ma Oscar na sosoo ai.

Ou te manatua le mafaufau ai pe aisea na matuai faagaeetia ai le faaauau ai pea ona aoao atu e ui lava e le o lelei le tali mai a Soledad ma Oscar. Ou te manatua le mafaufau ai pe aisea na ma lagona ai se faanatinati e toe foi atu ao lea sa tuliesea i maua i le ita. Ae ina ua ou vaaia le olioli lea na oo mai i le olaga o Juan ma sosoo ai ma Soledad ma le aiga a Oscar, na ou iloa ai e le gata sa faalogologo mai Juan i puipui manifinifi ae na faafogaga mai foi le Tama Faalelagi ia matou tatalo auauai taitoatasii, o tatalo e sau mai le loto. ■

E alala le tusitala i Iuta, ISA.





Saunia e Elder
Neil L. Andersen

O Le Korama
a Aposetolo e
Toasefululuia

AOAO MAI PEROFETA SOIFUA

Mata e mafai ona sili atu ona malolosi, auiliili,
ma taliaina lo tatou gauai atu i fautuaga
ma aoaoga a le Usoga?

Emoni tatou te alolofa ia Peresitene Thomas S. Monson, o fesoasoani e toalua i le Au Peresitene Sili, ma le Korama a Aposetolo e Toasefululuia. Ae i le faailoaina atu o lo latou alofa ma lo tatou lotonuu, o le a fesili atu ai, Mata e mafai ona sili atu ona malolosi, auiliili, ma taliaina lo tatou gauai atu i fautuaga ma aoaoga a le Usoga?



O Le Au Peresitene Sili—Henry B. Eyring, Peresitene Thomas S. Monson, Dieter F. Uchtdorf

O Fesili e Fa e Fesiligia

Mafaufau pe faapefea ona e tali atu i fesili nei:

1. Mata e mafai ona e ta'u mai ia te au ia suafa o sui e toatolu o le Au Peresitene Sili ma suafa o i latou taitoatasi o e auai i le Korama a Aposetolo e Toasefululuia? O nei tamalii e toa 15 ua e lagolagoina ma ou lagolagoina o ni perofeta, tagata-vaaai, ma talifaaaliga.
2. Afai tatou te tuuina i luga se ata o nei Uso, mata e te iloaina i latou taitoatasi? E seasea ona tatou gauai latalata atu i se tasi tatou te le matauina pe lei iloa.
3. Mata e mafai ona e faasoa maia ia te au le fautuaga na tuuina atu e le Au Peresitene Sili ma le Korama a Aposetolo e Toasefululuia mai le konafesi aoao na tea nei? Ma pe mafai ona e faailoa mai ia popolega o Peresitene Monson, Peresitene Eyring ma Peresitene Uchtdorf i Savali a le Au Peresitene Sili o *Liahona* o lenei tausaga?
4. Atonu o le mea sili ona taua, mata e mafai ona e faasoa mai ia te au se faa-iuga talu ai nei lea na e suia ai se mea i lou olaga ona o se fautuaga na maua mai i se tasi o nei tamalii e toa 15?

O Le Mamanu a le Alii

O mafuaaga e taua tele ai a tatou tali i nei fesili e faalagolago lea i valaauga ma tiute-tauave o le Au Peresitene Sili ma Aposetolo e Toasefululuia. Soo se taimi lava na faatuina ai le Ekalesia a le Alii, na valaaufina e le Alii ia perofeta ma aposetolo. Na fetalai mai le Faaola, “Ua le filifilia a'u e outou, a ua filifilia outou e a'u, ua ou faauufina foi outou” (Ioane 15:16). I nei tamalii o lena faauuga e aumai ai se mana faaleagaga ma se tiutetauave paia—o se mana e iloa ai ma molimau atu ai ma o se tiutetauave e aoao atu ma faamanuia. E aumaia ai foi se tiutetauave ma se folafolaga

O SE TAFE PEA MAI O FAAALIGA

"Ua ia i tatou le Tusi Paia, o le Tusi a Mamona ma le Tusi o Mataupu Faavae ma Feagaiga; ae peitai o nei tusi uma, a aunoa ma tagata faivaloaga soifua ma se vai e tafe pea mai o faaaliga mai le Alii, o le a le taitaiina atu ai se tagata i le Malo Selesitila o le Atua. . . .

"O le mea moni, o nei faamaumauga e le gata mai lona ttau. E le mafai ona saga faamaualugaina le tau, pe soona aoaoina lelei foi. Peitai o totolu, faatasi ai ma le malamalamama e mafai ona latou aumaia, ua le lava lea etaiatalaina ai fanau a tagata ma taitaiina atu ai i latou i le afioaga o le Atua. Ina ia mafai ona taitaiina e manaomia ai se Perisitua soifua ma faaaliga faifapea mai le Atua i tagata e tusa ai ma tulaga e faaono tuu i ai i latou."²

**Peresitene George Q. Cannon (1827-1901),
Fesoasoani Muamua i le Au Peresitene Sili, Upumoni o le Talalelei: Discourses ma Tusitusiga a Peresitene George Q. Cannon, comp. Jerreld L. Newquist (1987), 252.**

ia i tatou uma. Ua ia i tatou le tiutetauave e faalogo ma mulimuli ai, ma ua ia i tatou se folafolaga e faapea o le a oo mai faamanuiaga pe a tatou talitonu ma faatinoina a latou upu.

Ina ua valaauna e le Alii ia soo e toasefululuia i Amerika ina ua mavae Lona Toetu, sa Ia aoao atu ai i tagata: "Amuia outou pe afai tou te uai atu i upu a lenei toasefululuia o e ua ou filifilia mai totolu ia te outou, e auauna atu ia te outou, ma avea ma a outou auauna" (3 Nifae 12:1). I lo tatou vaitaimi, i se taimi sili ona faigata, na folafola atu ai e le Faaola i le Au Paia, "Ma afai e faalogo mai lo'u nuu i lo'u leo, ma le leo o a'u auauna o e ua Ou tofia e taitaia lo'u nuu, faauta, e moni Ou te fai atu ia te outou, o le a le aveesea i latou i fafo mai lo latou nofooga" (MF&F 124:45).

O le mamanu lenei a le Alii. Na Ia valaauna ni tamalii e toa 15 mai "tulaga le aloaia o le olaga"¹ ma faaee atu i ai ki ma le mana e taialaina ma faatonutonu i tatou. E le o faamalosia i tatou e usitai i ai; e leai se fosi. Ae

afai tatou te gauai atu i a latou upu, afai tatou te talia ma naunau e suia a tatou amioga e pei ona faamautinoia mai e le Agaga Paia a latou fautuaga, o le a le aveesea mai i tatou mai lo tatou tulaga—o lona uiga o le a tatou pipiimau i le ai uamea ma o le a faavavau pea ona tumau ma le saogalemu i le ala e tau atu i le laau o le ola. ■

Sii mai se faeasaite a le Ofisa o Aoga a le Ekalesia na faia i le aso 4 o Mati, 2007, lua tausaga ao lei valaauna Elder Andersen i le Korama a Aposetolo e Toasefululuia.

FAAMATALAGA

1. Boyd K. Packer, "O Aposetolo e Toasefululuia," *Liahona*, Ian. 1997, 6.
2. O le faatusi i le ttau o perofeta soifua, na saunoa ai Peresitene Uilifoti Utilafi faapea: "Ana faapea e i o tatou luma faaaliga uma ua tuiina mai e le Atua i tagata; ana faapea e ia i tatou le Tusi a Enoka; ana faapea e i o tatou luma ia papatusi e lei faaliliuin i le gagana Peretania; ana faapea o ia i tatou faamaumauga a Ioane le Talifaaliga ia sa faamaufaailogaina, ma isi uma faaaliga, ma faaputu ai iinei sei oo i se selau futu le maualuga, o le a le mafai ona tupu le ekalesia ma le malo o le Atua, i lenei tupulaga po o nisi lava augatupulaga o le lalolagi, e aunoa ma ni perofeta soifua a le Atua" (*Aoaoga a Peresitene o le Ekalesia: Wilford Woodruff* [2004], 206).


O Le Korama a Aposetolo e Toasefululuia




Boyd K. Packer



L. Tom Perry



Russell M. Nelson



Dallin H. Oaks



M. Russell Ballard



Richard G. Scott



Robert D. Hales



Jeffrey R. Holland



David A. Bednar




Quentin L. Cook



D. Todd Christofferson



Neil L. Andersen



*Na iloa e Kara le upumoni.
Ae pe na te maua le lototele
e tusi e uiga i ai?*

Tusi Ia Sa'

Saunia e Jan Pinborough

Mekasini a le Eklesia
E faavae i se tala moni

*"Ou te le ma i le talalelei ia Keriso"
(Roma 1:16).*

Na tuu i lalo e Kara lana penitala ma sioa atu i le fasipepa o loo i luga o lana kesi. Sa leai se mea na tusia ai vagana ai lona igoa ma se faailoga o le mea na tape." O le a se mea e tatau ona ou tusia?" na ia mafaufau ai.

I le isi itu o le ala savali, sa i ai lana uo o Lili na pisi e tusitusi. Sa punou ifo le ulu o Kara ma faalagolago i luga o lona ogalima.

Na matuui fiafia lava Kara i lana a'oga fou. Sa fai i se fale o se isi lotu, ma o lana vasega fou sa fetaui lelei le toatele na mafai lava e lona fiaaoga, o Mrs. Schmidt, ona maua se taimi e fesoasoani ia te ia i le matematika. O aso uma lava pe a maea le matematika, sa aoaoina ai e Mrs. Schmidt se lesona mai le Tusi Paia. E masani lava o lesona o le Tusi Paia sa tele lava ina pei o mea ia sa aoaoina e Kara i le fale ma le Peraimeri.

Ae o ni nai vaioso talu ai, i le taimi o se lesona e uiga i le papatisoga, na ta'u atu ai e Mrs. Schmidt i le vasega o pepe o e ua feoti ae lei papatisoaina e le mafai ona o i le lagi. Ona ia fai mai lea sa oti se tasi o lana fanau ina ua fanau mai. Ina ua ia fai mai lena mea, na pei a melo tagi ia Mrs. Schmidt.

"A o pepe e feoti e o i le lagi," o le fia fai atu lea a Kara. Maimau e pe ana iloa e Mrs. Schmidt lena mea,

atonu o le a le toe faanoanoa tele o ia. Ae na lagona e Kara le matamuli tele e fai atu ai se tala.

Ina ua tuua le aoga, na tau atu e Kara ia Tina le tala a Mrs. Schmidt. "O le iloaina o pepe e o i le lagi o se tasi na o faamanuia ga ua tatou maua ona o le Tusi a Mamona," o le tala lea a Tina. Sa faamoemoe Kara o le a fatauina e Mrs Schmidt le Tusi a Mamona i se aso. Sa moomoo o ia maimau pe ana ia maua le lototele e ta'u atu ia lena mea.

O le lesona la o le aso lenei, na tau atu ai e Mrs. Schmidt i le vasega, o le Atua, Iesu, ma le Agaga Paia o le tagata e toatasi. Na mafaufau Kara e uiga i le ala na faaali mai ai le Tama Faalelagi ma Iesu Keriso ia Iosefa Samita i le Vao Paia. Sa ia iloaina o i Laua o ni tagata mavaevae e toalua ma ua tofu ma le tino. Sa fiafia o ia ona sa ia mautinoaina lena mea, ae e lei talanoa atu ia Tina po o Tama e uiga i ai.

Ona fai mai lea o Mrs. Schmidt, "Tamaiti, faamolemole aumai i fafo se fasipepa ma tusi ai e uiga i le mea na tatou talanoa i ai."

O le taimi lena na maua ai e Kara se lagona popole i lona manava. Sa manao o ia e fai le meaaoga i le auala lea e manao lona faiaoga na te faia ai. Mata e lava lona lototele e tusi ai le mea na te iloaina e moni?

Ma lona ulu i luga o lana kesi, na amata ai ona fai e Kara se tatalo le leoa. "Faamolemole, le Tama Faalelagi pele, o le a se mea e tatau ona ou faia?"

Toetoe lava o le taimi lava lena, na amata ai e Kara ona lagona le toafimalie ma le toofilemu i totolu. Sa musumusu mai le Agaga Paia afai na te tusia mea sa i ai i lona loto, o le a lelei lava mea uma.

Na tuu i luga e Kara lona ulu, piki i luga lana penitala, ma amata loa ona tusi.

O le Tama Faalelagi ma Iesu o ni tagata mavaevae se toalua. Ua ia i Laua ni tino o aano ma ivi e pei o i tatou. O le Agaga Paia o se Agaga e mafai ona talanoa mai ia i tatou i o tatou loto.

Ina ua uma ona tusia o ni nai fuaiupu, na tuu i lalo e Kara lana penitala. Na te lei iloa po o le a se manatu o Mrs. Schmidt i le mea na ia tusia, ae sa ia lagoinaina le fiafia ona ua ia mafai ona ta'u atu i lona fiaaoga se mea taua ma le faamaoni. ■



"la lotomaulalo ma molimau atu e uiga i le Toefuataiga o le talalelei. . . . la lototoa. la faatuatua. Aua le fefe. Faalagolago i le Alii."

Peresitene Dieter F. Uchtdorf, Fesoasoani Lua i le Au Peresitene Sili, "The Restoration," New Era, Oct. 2011, 5.

O Iesu o Lo'u Leoleo Mamoe

(Ua Faafaoigofie)

Mālū ♩ = 86-98

Upu ma musika na saunia e Tammy Simister Robinson
a tempo

The musical score consists of four staves of music. The top staff is soprano, the second is alto, the third is tenor, and the bottom is bass. The music is in common time (♩ = 86-98). The key signature is one flat. The first staff begins with a forte dynamic (mp) and a ritardando (rit.). The second staff continues with a ritardando. The third staff begins with a forte dynamic and a ritardando. The fourth staff begins with a forte dynamic and a ritardando. The lyrics are as follows:

1. Ie - su o lo'u Le-o-
rit.
2. Ie - su o lo'u Le-o-

le - o O a'u La - na ma - mo - e. Na te ta - i - ta - i a - u
le - o. E si - la - fia a - u. E a - lo - fa i A - na

i Lo - na a - a - o. Na te ta - i - tai a - u i vao mu-a ma vai
ma - mo - e u - ma. A fe - se - a'i o'u a - la Na te su - e

ta - fe le - mu. Ie - su o lo'u Le-o - le - o. E alo - fa ia a - u.
a'u ia ma - ua.

1.
2.
rit.

E alo - fa ia a - u. p E alo - fa ia a - u.



Saunia e Jean A. Stevens

Fesoasoani Muamua i le
Au Peresitene Aoao o le
Peraimeri

Faataitaiga Faamaoni

“Ma o le a taitaiina i latou e le tamaitiiti” (2 Nisae 21:6).

Ile avea ai ma se tasi o le au pere-sitene aoao o le Peraimeri, ou te fiafia e feiloai i tamaiti i le lalolagi atoa. Soo se mea ou te alu i ai, ou te feiloai i ni tamaiti lelei lava o e o mulimuli ia Iesu Keriso ma ola faamaoni i le talalelei. E masani ona latou taitaia o latou aiga ma isi i le tausia o poloaiga.

I se tasi taimi sa asiiasi ai se Pulega Aoao i se uarota i Hong Kong lea sa tauivi ai tagata tausi o latou aiga. Sa ia ta'u atu i le epikopo e tatau

ona totogi e tagata o le ekalesia a latou sefuluai.

Sa popole le epikopo. Sa toe-toe lava a leai ni meaai ma ni tupe a tagata e faafetaiaia ai o latou manaoga.

“Afaí o le a latou totogiina a latou sefuluai, o le a faamanuiaina i latou e le Alii,” o le saunoaga lea a le Pulega Aoao.

Sa mafaufau le epikopo mo sina taimi. Ona ia fai atu lea, “O le a ou

talanoa atu i nisi o tagata e sili ona faamaoni o le matou uarota—o tamaiti o le Peraimeri!”

O le Aso Sa na sosoo ai, na asiiasi atu ai le epikopo i le

Peraimeri. Sa ia aoaoina le fanau e uiga i le tulafono o le sefuluai. Sa ia fai atu ia i latou e totogi le sefuluai mai tupe na latou mauaina. Na folafola atu e tamaiti o le a latou faia—ma sa latou faia!

I ni nai masina mulimuli ane, sa faia ai se fonotaga a le epikopo ma tagata matutua o le uarota. Sa ia fai atu ia i latou o loo totogiina e a latou fanau le sefuluai.

“Mata e mafai ona outou totogiina foi le sefuluai?” sa ia fesili atu ai.

Sa ootia lava tagata matutua e ala i faataitaiga faamaoni a le fanau. Sa latou fai mai o le a latou totogi foi a latou sefuluai. Talu ai na faia e tamaiti se faataitaiga, na maua ai e o latou aiga ia faamanuiaga sa latou manaomiaina (tagai i le Malaki 3: 8–10). Na tuputupu ae le faatuatua ma molimau a tagata uma.

Po o fea lava o e ola ai, e mafai ona e taitai isi i au faataitaiga lelei. Tausi poloaiga ma mulimuli ia Iesu Keriso. Ona avea lea o oe ma se faamanuiaga i lou aiga ma isi.

Matou te tatalo mo outou. Ma ua matou iloa lena mea, e pei lava o le fanau i Hong Kong, o au faataitaiga e mafai ona faia ai se eseesege mo le lelei! ■



O Le Malumalu o Navu ma le Falepuipui o Karefaesi

*O mai tatou o e suesue nei
nofoaga taua i le talafaaso-
lopito o le Eklesia!*

Saunia e Jennifer Maddy

I le 1841 o le toatele o le Au Paia i Navu na matitiva. Ae na latou iloaina o le mea latou te manaomia ona fausia o se malumalu, e pei ona ta'u atu e le Alii ia i latou. Na silia ma le 1,000 alii na faigaluega e fausia le malumalu. O tamaitai na suiina ofutino ma kuka mo le aufaigaluega. O le toatele o tagata na ositaulaga e fausia le malumalu. Sa latou tulimatai atu i faamanuiaiga o le a latou maua ai iina.

Falepuipui o Karefaesi

O le galuega o le malumalu na taofia ia Iuni 1844, ina ua fasiotia le Perofeta o Iosefa Samita. Na aveina atu Iosefa ma nisi o alii i le Falepuipui i Karefaesi. I le aso 27 o Iuni na osofaia ai e tagata leaga le falepuipui. Sa latou fanaina ma fasiotia ai Iosefa ma lona uso o Ailama.

Faaumaina o le Malumalu

Sa ootia loto o le Au Paia ina ua leai lo latou Perofeta. Na silafia e Polika Iaga, lea sa avea ma Peresitene o le Korama a Apostetolo e Toasefuluua, o le a faaauau pea le galuega

a le Alii. Na iu lava ina faamaeaina e le Au Paia le malumalu. Na galulue taitai o le Eklesia i le malumalu i ao ma le po ina ia mafai ona papatisoina le Au Paia mo o latou tuaa ma faamauina o ni aiga e faavavau.

*Sa i ai i le Malumalu muamua
o Navu ni ma'ala e 30.*

*O se masina faaofuofu
o loo vaneina i luga
o le puipui i fafo o le
malumalu.*



O faatagata o Iosefa ma Ailama o loo tutu i luma o le Falepuipui o Kerefasi. "Sa lei fevaevaeai i laua i le soifuaga, ma sa lei tuuveseeseina i laua i le oti!" (MF&F 135:3).



Sa taufetuli atu tagata leaga i luga o lenei faasitepu i le Falepuipui o Kerefasi ina ia maua mai Iosefa ma ana soa.



O Iosefa ma isi alii sa i ai i potu i luga o le falepuipui.

Toefausiaina o le Malumalu

Ina ua tuua e le Au Paia o Navu, sa faaleagaina le malumalu e ala i le afi ma se asiosio. Na fofogaina i le 1999 e, Peresitene Gordon B. Hinckley (1910–2008) o le Malumalu o Navu o le a toefausia i lea lava nofoaga. I le taimi nei e mafai ona e vaai i lenei malumalu matagofie e pei lava o se tepa i tua i le vaitau o le 1840. ■




Saunia e
Elder L. Tom Perry

O Le Korama a Apose-
tolo e Toasefululua

*O uso o le Korama
a Aposetolo e
Toasefululua o ni
molimau faapitoa
a Iesu Keriso.*

Aisea e taua ai le i ai uma o le Tusi Paia ma le Tusi a Mamona?



E manaomia uma le Tusi Paia
ma le Tusi a Mamona mo lo
tatou faaolataga.


O se faamanuiaga le i ai o le tala
e uiga i le misiona a lo tatou Alii
ma le Faaola i le Tusi a Mamona
e faaopoopo atu o se molimau
lona lua i aoaoga faavae o loo
faailoa mai i le Tusi Paia.

Tatou te manaomia uma le
lua e aoao atu ai ma aoao mai
ai e uiga i le mataupu faavae
atoa a Keriso.

Sa Ou Filifilia le MEA SA'Ο

Na saunia e Ekene B.,
7 tausaga, Nigeria

*Afai ou te
musu e inu le
uaina e mafai
ona faasala-
ina au, ma e
faapena foi
lo'u aiga.*



"Aoao i lou talavou e tausi i poloaiga a le Atua" (Alema 37:35).

Sa matou o ma lo'u aiga e asi-
asi i le nuu o ou matua mo le
faamanatuina o le Tausaga Fou.
Ua tolu tausaga talu mai lo matou
asisiga mulimuli, ma sa matou
tulimatai atu e toe vaai i tagata o le
aiga ma uo. Ina ua matou taunu, sa
faafeiloaia fiafia i matou.

Ina ua oo i le Vaeluaga o le Tau-
saga Fou, sa matou faatasiasi ma
isi mo se sauniga masani e faamu-
nuia ai le puipuiga, ola umi, ma
le manuia i atalii ulumatua o aiga
taitasi. O au o le atalii ulumatua
i lo'u aiga. Sa ou iloaina o tagata
uma lava o e auai i lea vaega o le a

faamoemoe e inuina le uaina o se
vaega o lea sauniga.

Na ou matuā popole lava. Na ou
iloaina o le inuina o le uaina o le a
solia ai le Upu o le Poto. Ae na ou
iloa foi afai ou te le inuina le uaina,
e ono faasalaina au ona o le le faa-
aloalo—ma e ono faasala ai foi ma
lo'u aiga. Ona ou manatuaina lea o
se mea na aoao ai au e lo'u tina: pe
a e oo i se tulaga ua le mafai ona
e taulimaina, e tatau ona e tatalo i le
Tama Faalelagi ma ole atu ia te Ia e
fesoasoani ia te oe.

Sa ou tatalo le leoa, "Tama Faale-
lagi, ia taiyalaina au e Lou Agaga ma
fesoasoani mai ia te au e fai le mea
sao."

Ina ua oo i lo'u taimi ou te inu ai
i le uaina, sa ou popole lava, ae sa
ou tautala atu leotele ma le manino.
"O lo'u tino o se malumalu. Ou te
le solia le Upu o le Poto," sa ou fai
atu ai.

Na matuā tei lava le toeaina
matua o le nuu. Sa liliu mai o ia ia
te au ma faapea mai, "E foliga mau-
tinoa lava lau mea lena o loo e faia.
Faamolemole, matou te fia faalogo
i nisi o ou manatu."

Sa lei faasalaina au ma lo'u aiga,
ma na faamalosia ai lo matou faa-
tuatua. Ou te iloa na fesoasoani
mai le Tama Faalelagi ia te au ia
maua le lototele e filifili ai le mea
sa'o. ■

O LA TATOU ITULAU



Ou te alofa
tele i lo'u tina
ma ou te fia
fesoasoani ia te
ia i le fuluina
o ipu. Ou te
tatalo foi mo
lo'u tama. Ou
te iloa na fetalai
mai le Tama Faalelagi ia i tatou, "Aua nei
fasia se tagata, aua nei valaaui na i ni igoa
faatiga, ma aua nei fasia ia manu laiti."

Ya-Se C., 4 tausaga, Taiuani



*E faitauina e Prince ma lona tuafafine ia
tusitusiga paia i le taimi o afiafi faaleaiga.*

I le taimi o afiafi faaleaiga, ou
te fia tuuina atu se mafaufauga
faaleagaga ma fai se tatalo. Ou te
fiafia i a'u uo o le Peraimeri, ma
ou te fiafia i le faafoaleleina ma le
tausiga o lupe. Ou te fia alu i le
Malumalu o Navu Ilinoi i se aso,
ma ou te manao foi e avea o se
faifeautalai. Ou te matuui alofa
lava i lo'u aiga! Ou te iloa e moni
le Ekalesia, ma ou te fiafia i le
Tusi a Mamona.

Prince M., 9 tausaga, Filipaina



Macarena G., 8 tausaga, Chile



**Manuia le Aso Fanau,
saunia e James C., 5
tausaga, Peru**



Ou te iloa o loo soifua lesu Keriso,
e alofa o la ia i tatou, ma e moni
le Ekalesia. Ua aoao mai le tala
i le laau o le ola afai tatou te
mulimuli i le talalelei, e mafai ona
tatou maua le fiafia.

**Manuelis R., 5 tausaga,
Venezuela**






**Sarah G.,
6 tausaga,
Kuatemala**



I se tasi taimi
sa ma o ai ma
lo'u tina e ave
o'u uso i le
malaevaalele
aua sa latou o
i se malaga. Sa
fetaiai i matou
ma le poloka

o le auala i taavale, ma sa ma popole nei
misia e i laua le la vaalele. Sa lei lelei tele foi
le faalogona a lou tina. O le taimi lena na ou
tatalo ai, ma sa ou faatuatua o le a taliina
mai. Sa mafai ona mauaina e ou uso le la
vaalele! Ou te iloa sa faafogaina e le Tama
Faalelagi la'u tatalo.

Sara P., 11 tausa, Italia



Ina ua toe o
se aso pe lua
foi oo i lou
papatisoga ma
le faamauga,
sa ou fiva ma
sa matuai le
lelei lava sou
faalogona. Ou

te lei manao e tolopo lo'u papatisoga. Sa ou
lagona e tatau lava ona faataunuina i le aso
na atofaina. O le toatele o tagata o le aiga
ma uo, o nisi e le o ni tagata o le Eklesia, na
o mai i lo'u papatisoga. Ina ua ou papatiso,
na pau i lalo lou fiva ma mou ese atu, ma
sa lelei ou faalogona. O lena aso sa matuai
malosi lava lou lagonaina o le Agaga Paia.
Ou te faafetai lava ona sa mafai ona ou
papatiso ma maua le Agaga Paia.

Sara M., 8 tausaga, Sepania



**E fiafia tamaiti
Peraimeri o
le Uarota a
Monay, Siteki
a Cuenca
Ekuatoa, e
aoao e uiqa i
le talalelei.**

TAUMAFAI IA AVEA FAAPEI O IESU

Ina ua ou aluese mai le faetaalo o le aoga
i se tasi aso, o au mea uma na i totonu o
lau ato faafafa ua sasaase, ma sa leai se
meataalo sa i ai i totonu. Sa ou manatu ua
ave e lau uo lau meataalo ona sa ia taumafai
e faatau atu mai ia te au i le amataga o lena
aso. Sa ou faanoanoa ona o lona uiqa o le
a ma le toe uo. I lena po sa ou tatalo ai lava
po o ai lava ua aveina la'u meataalo o le a
iloaina o se mea sese ma o le a toe faafoi
maia ia te au. O le aso na sosoo ai i le aoga
na toe faafoi mai ai e lau uo le meataalo ma
sa ia talosagaina lou faamagaloga o ia ina ia
mafai ona ma toe uo. Sa ou matuai fiafia lava,
ma sa ou faamagalo ia te ia. Ou te faafetai i
le fesoasoani a le Agaga Paia i la'u uo faapea
ma au i le faia o le mea sao. Ou te iloa e
mafai ona ou tatalo i le Tama Faalelagi i soo
se taimi ma o le a la fesoasoani mai ia te au.

Brandon A., 8 tausaga, Mekisiko



**O Milton ma lona tama i le
aso o lona papatisoga.**

Ou te manatuaina pea le aso o lo'u papati-
soga aua o le aso aupito sili lea ona taua
o lo'u olaga. O le aso lena na ou osia ai se
feagaiga ma le Tama Faalelagi. Ou te iloa o
loo soifua le Tama Faalelagi ma Lona Alo o
lesu Keriso, ma la te alolofa tele ia te au. Ou
te fiafia e alu i le malumalu, e ui lava e le o
mafai ona ou ulu i ai i totonu i le taimi lenei.

Milton Aarón V., 10 tausaga, Ekuatoa

O Le a Ou Auauna atu i le Atua ma Lou Loto Atoa, ma Lou Manatu Atoa, Mafaufau, ma le Malosi

Ise tasi aso i le malologa puupuu, sa vaai ai Madison i se teineitiiti o tagi ona sa fai e se tagata se upu le alofa ia te ia. Na lagona e Madison le faanoanoa mo le teineitiiti ma sa savali atu ma faamafanafana ia te ia. "E te manao ta te taaalo faatasi?" sa ia fesili atu ai i le teineitiiti.

O lena aso, sa auauna atu ai Madison ma lona loto i ai. Sa ia mulimuli i faataitaiga a Iesu Keriso ma na faaalia le alofa i se tasi o manaomia le fesoasoani. E mafai ona tatou faaali atu lo tatou alofa mo le Tama Faalelagi e ala i le auauna atu i isi i o tatou loto, lo tatou manatu atoa, o lo tatou mafaufau, ma lo tatou malosi. E mafai ona tatou auauna atu ma o tatou tagata atoa!

E faapefea ona tatou auauna atu ma o tatou loto? E mafai ona tatou auauna ma o tatou loto e ala i le faaalia o le alofa ma le agalelei i isi. Tatou te popole e uiga i manaoga o isi. Pe a tatou auauna atu ma le fiafia, ua tatou auauna atu ma o tatou loto.

E faapefea ona tatou auauna atu ma o tatou mafaufau? E mafai ona tatou auauna atu ma lo tatou mafaufau e ala i lou mafaufau i ni auala e fesoasoani ai i isi. Pe a tatou vaai i manaoga o i latou o siomia i tatou ma mafaufau e uiga i le mea e mafai ona tatou faia e fesoasoani, ua tatou auauna atu i o tatou mafaufau.

E faapefea ona tatou auauna atu i lo tatou manatu ma le malosi atoa? O le auauna atu i o tatou manatu ma le malosi atoa e mafai ona faataunuina e ala i le faia o feau ma le galulue

TATOU TALANOA

Faatasi ai o se aiga, filifili ni mea e mafai ona outou faia faatasi a o e auauna atu ma lou tagata atoa. Faamalamalama atu soo se taimi lava tatou te auauna atu ai i isi, o loo tatou tautuaina le Tama Faalelagi.

malosi e fesoasoani i isi. E masani lava ona tatou faamanuiaina ma auauna atu i tagata matutua i le faia o mea e faigata ia te i latou ona fai. ■



AUAUNA ATU MA LOU TAGATA ATOA

Filifili se auala e te manao e auauna atu ai mai auala taitasi o eria o i lalo po o le mafaufau i ni ou lava manatu.


A uma se tasi o galuega fesoasoani, valivali le siepi e sosoo ma le faamatalaga lea.

FATU



Ta'u atu i ou matua po o nai ou tei e te alofa ia i latou.

MAFAUFAU



Tusi se tusi i se matua o matua.

MANATU MA LE MALOSI ATOA



A talosaga atu ou matua e te faia se mea, galue malosi i ai.



Fai se mea agalelei mo se tasi o loo tuua toatas. Ataata atu i se tasi.



Ofo atu e fesoasoani i se uso po o se tuagane/tuafafine i ana meaaoga.



Fesoasoani i se uso po o se tuagane/tuafafine i se feau.

PESE MA LE MAU

- “Tofia e Auauna,” *Tusipese a Tamaiti*, 94
- Mataupu Faavae ma Feagaiga 59:5



Fesoasoani e fuafua se galuega faatino o le auauna atu faaleaiga.



Salu laulaau, vele ese vao, pe fai foi se isi mea e fesoasoani ai i lou aiga.

Ua Faafilemu e Iesu le Matagi


Saunia e Charlotte Mae Sheppard, luta, ISA



I se tasi aso ao folau Iesu ma Ona soo i se
vaa, sa i ai se matagi matautia.




Nafafati mai galu. Na agi mai le savili. Na fefefe le
au soo nei magoto le vaa.




Na saili e le au soo Iesu. Sa latou maua o ia o moe.
“Laveai i matou!” sa latou tagi mai.
“Aisea ua outou fefe ai?” O le fesili lea a Iesu.



Sa tulai i luga Iesu ma poloaiina le matagi e taofi. Na vaai le au soo a o taofia lefafati mai o galu ma ua le toe agi mai le savili. Ua leai se matagi, e pei lava ona poloaiina ai e Iesu.



O nisi taimi pe a tutupu mai ni mea taufaafefe, tatou te lagonaina le fefe. Ae o loo latalata mai Iesu. O le mafaufau ia te Ia e mafai ona fesoasoani tatou te lagona ai le saogalemu ma le toafimalie. ■

**Ua Faafilemu e Iesu le Matagi**

“Ona tulai ai lea o ia [Iesu], ua vavao i le matagi ma le vai; ona tele ai lea o le malu” (Mataio 8:26).

O LE SAUNIGA FAAMANATUGA AUPITO UMI

Saunia e Okon Edet Effiong

Ou te fiafia e faitau tusi faalelotu o le Au Paia o Aso e Gata Ai. Ma talu ai o nei tusi e le faigofie ona maua i Nigeria, sa ou nono-inia mai ai mai se uo. O le manao e toe faafou atu le tusi a la'u uo i ni nai aso, na ou tauaveina ai i taimi uma ma faaaogaina ai ou taimi avanoa e faitau ai.

I se tasi Aso Sa sa i ai ia te au se tusi nono mai a o ou auai i le sauniga faamanatuga i le uarota lea e tofia i ai au o se fautua maulugia. Sa ou faitauina le tusi a o ou faatali e tuuina atu i le epikopo se savali mai le au peresitene o le siteki. Ina ua taunu atu le epikopo, sa ia fai mai ia te au e talanoa i lona fesoasoani muamua talu ai na te fia faafeiloai atu i ni tagata asiiasi. Ina ua uma ona tuuina atu le savali i le fesoasoani muamua, sa ou alu ma nofo i luga o le tulaga.

E lei leva lava ona ou saofai i lalo, ae, ou iloaina loa ua leai se tusi a la'u uo. Pe a ma le lima minute ao lei amataina le sauniga—ma faatasi ai ma le taitai pulefaamalumalu o loo nofo i luga o le tulaga—sa ou manatu ai e le tatau ona ou aluese. O le le fiafia i le faafanoanoaina o la'u uo, sa faapea ai ona amatalia lo'u mafatia i se sauniga faamanatuga aupito sili ona umi sa ou auai.

Sa ou faamoemoe o le a vave ona faaga-solo le taimi, ae peitai o aitema uma lava na i ai o le fonotaga na foliga mai o le a alu ai




*O le sauniga
faamanatuga
e masani lava
ona oo atu i le
70 minute. Ae o
se tasi Aso Sa na
foliga mai na
toso atu lava i le
faavavau.*

le olaga atoa. Sa ou le mautonu, sa ou tatalo lemu ia puipua e le Atua le tusi. E moni lava, e lei umi ia lauga, ae sa lofituina lou mafafau i se popole faigata. O le lima minute a o lei faaiuina le sauniga, sa le mafai lava ona ou toe tatalia. Sa ou pasia atu i le fesoasoani muamua se faamatalaga tusitusia ma fesili i ai pe na ou tuua le tusi i ona autafa. Sa ou momoo ina ia lue mai lona ulu i le ioe. Nai lo lena sa lulu mai lona ulu.

Sa le moeiini ou mata i le taimi o le tatalo faaiu ae na ou mataituna ma le faaeteete ia nofoaga e lua ia na totroe sa ou manatu atonu o i ai le tusi. O le taimi lea, na ou filifili ai, pe a talafeagai ai, o le a ou alu i vasega o le Aoga Sa e folafola atu ai le leiloa o lau tusi.

Ae peitai, o le mea e ofo ai, ina ua faaiuina le sauniga faamanatuga, na suia atoa ou lagona, ma sa ou le popole i le tusi. Na faaali mai ia te au e le Agaga Paia—i ni nai taimi puupuu o le malamalamama faaleagaga—ua gallo o'u popolega. Sa ou iloaina ai o le mea na taua *moni*, o le pe o le a ou puipua pe leai foi ia na mea sa tuuina mai e le Atua i lau tau-siga. Sa faafusei lava ona lisiina i lou mafafau mea ou te manatuina na tuuina mai ia te au e le Atua: lou agaga, lou aiga, i latou ou te faiaoga asiiasi ai, i latou e tatau ona ou faasoa atu i ai le talalelei, tagata o le uarota ou te au-auna i ai, o'u tuua ua maliliu ma e manaomia le galuega faalemalumalu, ma isi mea.

Ou te lei maua le tusi i le mavae ai o se mea na avea ma se aafiaga taua o le sailiga loloto. Ae i le faaiuga o le sauniga faamanatuga aupito umi, sa ou maua ai foi ni vaega o lou olaga lea e manaomia le faaleleia. Ma sa ou maua ai le tautinoga e galue ai i mea e finagalo le Tama Faalelagi e faamuamua. ■
E alala le tusitala i Lagos, Nigeria.



ATA NA TUSA E ROBERT T. BARRETT

SIAOSI ALAPATI SAMITA

O Siaosi Alapati Smith sa 21 ona tausaga ina ua muai valaaufina e auaua atu i alii talavou o le Ekalesia. Na amata ona ia auai i **Tama Sikauti a Amerika**, lea na faamamaluina ai o ia mo lana auauunaga. A o auaua atu o se Apostolo, sa avea foi Siaosi Alapati Samita o se taitai i le tele o faalapotopotoga faifaatoaga i le lotoifale ma faavaomalo. Sa ia faapaiaina le **Malumal o Idaho Falls Idaho**.



Ilana tusiga, “O Le Faamasinoga Tonu ma le Alofa Mutimutivale o le Atua,” o loo faaaoga ai e Elder Jeffrey R. Holland o le Korama a Aposetolo e Toasefululuia le totoina o vaotuitui e fai ma se faataoto o le maileia i totonu o le agasala. “Tatou te totoina se vaotuitui laititi, ma tatou manua ai le tele o vaotuitui—o tau-saga ma tausaga o vaotuitui, o togavao tetele ma ona lala. Ina ia faitau i lana faantuaga i auala e mafai ona tatou salamo ma manua ai le aiā i le alofa mutimutivale, tagai i le itulau e 20.